

Mary Carpenter Series.

মেবী কাৰ্পেণ্টাৰ গ্ৰন্থাবলি।

PRABANDHA-KUSUM

BY

RAJANIKANTA GUPTA.

AUTHOR OF "HISTORY OF THE GREAT SEPOY WAR" &C

প্ৰবন্ধ কুসুম।

শ্ৰীৰজনীকান্ত গুপ্ত বিৰচিত।

দ্বিতীয় সংস্কৰণ।

CALCUTTA:

PRINTED BY BEHARY LALL BANNERJEE  
AT MESSRS J G CHATTERJEE & Co's PRESS,  
41, AMHERST STREET  
PUBLISHED BY THE MEDICAL LIBRARY  
97 COLLEGE STREET

1881

All rights reserved

✓ 27.00  
Acc 23020  
~~22910~~

## বিজ্ঞাপন ।

যে উদ্দেশ্যে “প্রবন্ধ-কুমুম” মুদ্রিত ও প্রচারিত হইল, স্থানা-  
স্তবের বিজ্ঞাপনে তাহা পবিস্কুট হইবে ।

পুস্তক খানি অপেক্ষাকৃত উচ্চ অঙ্গের ও গুণোৎকর্ষ-সম্পন্ন  
কবিত্তে সভাব ইচ্ছা ছিল । তদনুসাবে ইহাব ভাষা নিতান্ত  
সবল করা হয় নাই । ভাষা অপেক্ষাকৃত উচ্চ অঙ্গের হইলেও  
বোধ হয়, ইহাতে মাধুর্য বা লালিত্যের অভাব লক্ষিত হইবে না ।  
সকল স্থানেব ভাষাই কোমল, মধুর, ললিত ও গ্রাম্যতা-হীন  
কবিত্তে যথাশক্তি প্রয়াস বিহিত হইয়াছে ।

সভাব মতানুসাবে “প্রবন্ধ-কুমুমে” ইতিহাস, বিজ্ঞান প্রভৃতি  
মান্য বিষয় সন্নিবেশিত হইয়াছে । এই বিষয় গুলি কেবল  
মহিলাদিগেব নয়, তরুণমতি ছাত্রদিগেবও সম্যক পাঠোপযোগী  
হইয়াছে । এজন্য আশা কবি, “প্রবন্ধ-কুমুম” শিক্ষার্থিনী  
যুবতীদিগেব ন্যায্য যুবকদিগেবও একখানি পাঠ্য গ্রন্থ হইবে ।

“প্রবন্ধ-কুমুমেব” ঐতিহাসিক ও বৈজ্ঞানিক বিষয় বিবিধ  
পুস্তক ও সাময়িক পত্রিকা হইতে সংগৃহীত হইয়াছে । তজ্জন্য সেই  
সমস্ত গ্রন্থকাবদিগেব নিকট কৃতজ্ঞতা-পাণে বদ্ধ রহিলাম । ইতি ।

হিন্দুছোফেল,  
কলিকাতা ।  
১১৭ পৌষ ১২৮৬ ।

শ্রীবজনীকান্ত গুপ্ত ।



## বিজ্ঞাপন ।

---

জাতীয় ভাবতসভার স্থাপয়িত্রী কুমারী মেরী কার্পেণ্টার লোকান্তবিত হইলে তাঁহার স্মৃতি টিহু বাখিবাব জন্য তদীয় সম্মানিত নামে বঙ্গীয় মহিলাদিগের পাঠোপযোগী গ্রন্থাবলি প্রচাৰেব প্রস্তাব হন ।

প্রথমে এই গ্রন্থাবলিব অন্তর্গত যে দুইখানি গ্রন্থ প্রকাশ কবিবার সঙ্কল্প কবা হয, উপস্থিত পুস্তক খানি সেই গ্রন্থদ্বয়ের অন্যতব । বঙ্গ-কুল-যুবতীদিগেব জন্য এই পুস্তক মুদ্রিত ও প্রচাৰিত হইল । আশা কবি, ইহা তাঁহাদিগেব একখানি প্রদান পাঠ্য গ্রন্থ হইবে ।

শ্রীমনোমোহন ঘোষ ।

এম্, এম্, নাইট ।

জাতীয় ভাবত সভাব বঙ্গশাখাব অবৈভনিক সম্পাদক ।



## সূচী ।


---

কলনা-চতুষ্টয়	.	..	.	১
উদ্ভিদ-তত্ত্ব	.			৬
ইতরপ্রাণিদিগের মনোরক্তি	.		.	১৩
শিক্ষা ..	.		..	২২
দূরশ্রবণ-যন্ত্র				২৬
বানক .. ..			.	৩১
হুর্গাবতী			..	৩৮
বড়বাঘি	.	.	.	৪৭
ক্রীসেনা			.	৫৩
অদ্ভুত সামুদ্রিক জীব			.	৫৬
ঘীরাবাই ..	.			৬১
মেঘ .. ..				৬৯
অশোক ..	.		..	৭৮

---







# প্রবন্ধ কুম্ভ ।

## ললনা-চতুষ্টয় ।

স্ত্রীজাতি সমাজের লক্ষ্মী স্বরূপ । লজ্জা, বিনয়, নম্রতা ও শীলতা প্রভৃতি সদৃশ্যে ভূষিত হইলে নারীগণ দুঃখ দারিদ্র্য-পূর্ণ ও বোগ-শোক-তাপময় সংসার-ক্ষেত্রে সর্বদা শান্তির অমৃত-ধাবা বর্ষণ করিয়া থাকেন । হিন্দু শাস্ত্রকাবেরা এই জন্যই স্পষ্টাক্ষরে নির্দেশ করিয়া গিয়াছেন, স্ত্রীতে ও স্ত্রীতে কোনও বিশেষ নাই । ফলে ললনাগণ মূর্তিমতী দেবতা হইয়া ভুলোককে স্বর্গেব তুল্য আনন্দময় করিয়া তুলেন । সুকোমল প্রাভাতিক লক্ষ্মী ও সাযন্তন-স্ত্রী উভাবিধ শোভাই নাবীক কমনীষ হৃদয়ে প্রতিফলিত হইয়া থাকে । যে গুণের প্রভাবে মানবগণ বিজ্ঞান ও গণিতের জটিল অর্থ প্রকাশ করিয়া সকলকে চমৎকৃত করিতে-ছেন, যথানিয়মে রাজশক্তি প্রয়োগ করিয়া সুরাজতার পবিচয় দিতেছেন এবং রণ-পাণ্ডিত্য ও নীতি-কৌশল প্রদর্শন করিয়া পৃথিবীতে বিখ্যাত হইতেছেন, নাবীজাতিতেও সে গুণ বিরল নহে । লীলাবতী, খনা প্রভৃতিতে আমবা বুদ্ধি-গৌরবের পরা-কাষ্ঠা দেখিতে পাই, সংযুক্তা, অহল্যাবাই প্রভৃতিতে সুশাসন-নৈপুণ্য ও সুরাজশক্তি দর্শন করিয়া পুলকিত হই এবং তাবাবাই, দুর্গাবতী প্রভৃতিতে সামরিক কৌশল ও নীতি-জ্ঞানের পরিচয় পাইয়া মুক্তকণ্ঠে তাঁহাদের যশোগানে প্রবৃত্ত হই । এস্থলে অতি সংক্ষিপ্ত ভাবে যে কয়েকটা ভারতীয় ললনাব বিবরণ লিখিত

হইতেছে, তাঁহারাও নারীজাতির আদর্শভূতা এবং স্বর্গস্থ দেবী সমাজের বরণীয়া । ইহাদেরও বিবরণ পাঠে স্পষ্ট হৃদয়ঙ্গম হইবে যে, নারীজাতি বিদ্যা, অভিজ্ঞতা ও হিতৈষিতা প্রভৃতিতে পুরুষ জাতি অপেক্ষা কোন অংশে হীন নহে ।

### আবিয়ার ।

আবিয়ার দক্ষিণাপথ-বাসিনী । ইনি কবি কামবনের \* সম-কালবর্তিনী ছিলেন । কামবনের ন্যায় আবিয়ারও পাণ্ডিত্যগুণে প্রসিদ্ধ হন । জ্যোতিষ, চিকিৎসা-শাস্ত্র, ভূবিদ্যা প্রভৃতি অনেক বিষয়ে তাঁহার পাবদর্শিতা ছিল । তিনি এই সকল বিষয়ে কতিপয় অতি উৎকৃষ্ট প্রবন্ধ লিখিয়া গিয়াছেন । আবিয়ার চিরকুমারী ছিলেন, তাঁহার স্বভাব অতি পবিত্র ছিল । শাস্ত্র জ্ঞানের সহিত চারিত্র-গুণ তাঁহাকে একপ অলঙ্কৃত কবিয়া তুলিয়াছিল যে, সকলেই তাঁহাকে মূর্তিমতী পবিত্রতা বলিয়া, আদর, সম্মান ও ভক্তি সহিত তাঁহার গুণ-গৌরব ঘোষণা করিত । আবিয়ারের প্রণীত ধর্মনীতি বিষয়ক প্রস্তাব সকল তামিল বিদ্যালয়-সমূহে পাঠিত হইয়া থাকে ।

আবিয়ারের উপজা, বালী ও উরুব্যা নামে তিনটি ভগিনী ছিলেন । ইহাও কখনও বিদ্যোপার্জনে অবহেলা কবেন নাই । উপজা এক খানি ধর্মনীতি বিষয়ক গ্রন্থ প্রচার কবেন, ইহা তামিল ভাষায় এক খানি অত্যুৎকৃষ্ট গ্রন্থ । বালী ও উরুব্যা কবিত্ব-শক্তি স্নেহে স্নাতিশয় প্রসিদ্ধা ছিলেন ।

### মৃগনয়না ।

মৃগনয়না গুর্জব-বাজের কন্যা । ইনি গোয়ালিয়রের অধিপতি মহারাজ মানসিংহের মহিষী ছিলেন । অসাধারণ রূপ-

\* কামবন তামিল ভাষায় বাসায়ণ রচনা কবেন । তামিল ভাষাভিজ্ঞ লোকে এই গ্রন্থ আপন সহকায়ে পাঠ করিয়া থাকেন ।

লাবণ্য যুগনয়নার সুকোমল দেহ সাতিশয় কমনীয় ও মনো-  
হব করিয়া তুলিয়াছিল। যুগনয়না কেবল অসামান্য রূপ-  
লাবণ্যবতী বলিয়া প্রসিদ্ধা ছিলেন না, অন্যান্য গুণগ্রামেও  
তাঁহার খ্যাতি চাবিদিকে প্রসারিত হইয়াছিল। সঙ্গীত শাস্ত্রে  
যুগনয়না সবিশেষ ব্যুৎপত্তি লাভ করিয়াছিলেন। তাঁহার সময়ে  
গোয়ালিয়র বাজ্যে সঙ্গীত শাস্ত্রেব আত্যন্তিক আদর ছিল ;  
এবং প্রকৃষ্ট পদ্ধতি ক্রমে উহার অনুশীলন হইত। সঙ্গীত শাস্ত্রেব  
অনেক গুলি বাগিনী যুগনয়নাব নামে প্রসিদ্ধ আছে। সংগীত  
শাস্ত্রে যুগনয়না একপ পারদর্শিনী ছিলেন যে, প্রসিদ্ধ সঙ্গীত-  
চার্য্য ভামসেন তাঁহার সঙ্গীত শ্রবণ মানসে গোয়ালিয়রে  
আসিতে সঙ্কুচিত হন নাই।

হঠী বিদ্যালঙ্কার ।

হঠী বিদ্যালঙ্কার রাঢ়ী-শ্রেণীয় ব্রাহ্মণকন্যা। ন্যায় ও স্মৃতি  
প্রভৃতি শাস্ত্রে ইনি সাতিশয় ব্যুৎপত্তা ছিলেন। হঠী বারাণসীতে  
যাইয়া চতুষ্পাঠী স্থাপন কবেন। বাদ্গালা, উত্তর পশ্চিম প্রদেশ ও  
দক্ষিণাপথবাসী অনেক ছাত্র এই চতুষ্পাঠীতে আসিয়া তাঁহার  
নিকট অধ্যয়ন কবিত। হঠী সবিশেষ নৈপুণ্যের সহিত ও পরি-  
শুদ্ধ প্রণালীতে এই সকল ছাত্রদিগকে দর্শন, ন্যায়, স্মৃতি  
প্রভৃতি বিষয়ে শিক্ষা দিতেন। অসামান্য শাস্ত্রাভিজ্ঞতা-বলে  
তাঁহার সম্মান এতদূর বর্দ্ধিত হইয়াছিল যে, সকলেই তাঁহাকে  
শ্রদ্ধা ও ভক্তি করিত এবং ক্রিয়া-কাণ্ড উপলক্ষে সকল স্থান  
হইতেই তাঁহার নিকট নিমন্ত্রণ-পত্র উপস্থিত হইত। হঠী বিদ্যা-  
লঙ্কার আজ্ঞাদ সহকারে এই সকল নিমন্ত্রণ পত্র গ্রহণ করিতেন,  
এবং আজ্ঞাদ সহকারে সভায় উপস্থিত হইয়া সমাগত পণ্ডিত  
মণ্ডলীর সহিত শাস্ত্রীয় আলোচন ও শাস্ত্রীয় বিচারে প্রযুক্ত  
হইতেন।

## পন্ন।

পন্ন চিত্তোবেব অধিপতি ও উদয়পুৰ নগৰেৰ স্থাপন-কৰ্ত্তা উদয় সিংহেৰ ধাত্ৰী । উদয় সিংহ অশ্ৰাণ্ডবয়স্ক ও ৰাজ্য বক্ষায় অসমৰ্থ ছিলেন । সূত্ৰবাং মন্ত্ৰিগণ তাঁহাৰ বয়ঃপ্রাপ্তি পৰ্য্যন্ত তদীয় পিতাৰ দানী-পুত্ৰ বনবীবেৰ হস্তে মিবাৰেৰ শাসন-দণ্ড সমৰ্পণ কৰেন । কিন্তু বনবীৰ আজীবন ৰাজ্য ভোগ কৰিতে কৃতসঙ্কল্প হন, এবং আপনাৰ ৰাজত্ব নিৰাপদ কৰিবাৰ জন্তু উদয় সিংহকে বধ কৰিতে স্থিৰ-প্ৰতিজ্ঞ হইয়া উঠেন । এই সময়ে উদয় সিংহেৰ বয়স ছয় বৎসৰ মাত্ৰ । একদা বাত্ৰিকালে এই ষড়্-বৰ্ষীয় বালক আহাৰ কৰিয়া নিদ্ৰিত আছে, এমন সময়ে এক জন ক্ষৌৰ-কাৰ তাহাৰ ধাত্ৰী পন্নাকে এই ভয়ানক সংবাদ জানায় । ধাত্ৰী তৎক্ষণাৎ একটা ফলেৰ চান্দাডিব মধ্যে নিদ্ৰিত উদয় সিংহকে ৰাখিয়া তাহাৰ উপৰিভাগ পত্নাদিতে আচ্ছাদন পূৰ্বক ক্ষৌৰকাৰেৰ হস্তে সমৰ্পণ কৰে । বিশ্বস্ত ক্ষৌৰকাৰ সেই চান্দাডি লইয়া কোন নিৰাপদ স্থানে যায় । এদিকে অন্তপানি ঘাতক আসিয়া ধাত্ৰীকে উদয় সিংহেৰ বিষয় জিজ্ঞাসা কৰিল । কিন্তু ধাত্ৰী বাণ্-নিশ্চিন্তি কৰিল না, কেবল অবনত নয়নে দণ্ডায়মান থাকিয়া স্বীয় নিদ্ৰিত শিশু পুত্ৰেৰ প্ৰতি অঙ্গুলি প্ৰসা-বণ কৰিল । ঘাতক উদয় সিংহ বোধে সেই ধাত্ৰী পুত্ৰেৰই প্ৰাণ সংহাৰ পূৰ্বক যথাস্থানে চলিয়া গেল । ধাত্ৰী নীৰবে এই শোচনীয় কাণ্ড দৰ্শন কৰিল, নীৰবে প্ৰাণাধিক প্ৰিয় পুত্ৰকে মৃত্যু মুখে পাতিত কৰিয়া হিন্দুকুল-সূৰ্য্য বাপ্পাৰাওৰ বংশ ৰক্ষা পূৰ্বক অসামান্য হিতৈষিতা ও অশ্ৰুতপূৰ্ব প্ৰভু-ভক্তিৰ পৰিচয় দিল, এবং নীৰবে ও অশ্ৰুপূৰ্ণ নয়নে পুত্ৰেৰ প্ৰেতকৃত্য সম্পন্ন কৰিয়া বিশ্বাসী ক্ষৌৰকাৰেৰ সহিত সন্ধি-লিত হইল ।

রাণা সঙ্কেব সস্তানেব জন্ম রাজপুত ধাত্রী পন্নার এই ত্যাগ স্বীকার জগতেব ইতিহাসে দুর্লভ । যে চিতোরের জন্য, হিন্দু কুলের ললার্ট-মণি মিবারাধিপতির বংশ বক্ষাব নিমিত্ত অবলী-  
 নায় অস্মানভাবে বাংসল্যের একমাত্র আধার. স্নেহের অদ্বিতীয়  
 অবলম্বন, প্রীতিব পবন পাত্র—শিশু সস্তানকে মৃত্যু-মুখে সমর্পণ  
 কবে, তাহাব স্বার্থ ত্যাগ কতদূব মহানু, কতদূব উচ্চভাবের  
 পবিচায়ক । যে স্বদেশেব গৌবব বক্ষার্থ হৃদয়-বঞ্জন কুমুম কলি-  
 কাকে রুস্তচ্যুত দেখিয়াও কর্তব্য-বিমুখ না হয়, তাহার হৃদয়  
 কতদূর তেজস্বিতা ও কতদূর স্বদেশহিতৈষিতার পবিপোষক !  
 প্রকৃত তেজস্বী ও প্রকৃত দেশহিতৈষী ব্যতীত অন্য কেহ এই  
 তেজস্বিনী নারীর হৃদয়গত মহানু ভাব বুঝিতে সমর্থ হইবেন  
 না । ভীকু প্রকৃতি, ধাত্রীকে রাক্ষসী বলিয়া ঘৃণা কবিতোপাবে,  
 কিন্তু তেজস্বিনী প্রকৃতি তাহাকে মূর্তিমতী হিতৈষিতা বলিয়া  
 চিবকাল যত্নেব সহিত হৃদয়ে রক্ষা কবিবে । ফলে ধাত্রীর  
 নিঃস্বার্থ হিতৈষণা তাহাব রাক্ষসী ভাবে আচ্ছন্ন করিয়া  
 রাখিয়াছে যাবৎ হিতৈষিতা ও তেজস্বিতার সমাদর থাকিবে,  
 পবিত্র ইতিহাস তাবৎ এই স্বার্থ ত্যাগ ও তেজস্বিনী পন্নার  
 কখনও অসম্মান করিবে না ।

## উদ্ভিদ-তত্ত্ব ।

উদ্ভিদ জাতিতে বিশ্বপতির অত্যাশ্চর্য্য কৌশল ও অসীম মহিমার চিহ্ন লক্ষিত হইয়া থাকে। উদ্ভিদবেত্তা পণ্ডিতগণের সূক্ষ্ম অনুসন্ধানেন উদ্ভিদের অনেক নিগূঢ় তত্ত্ব প্রকাশিত হইয়াছে। স্থিরচিত্তে এই সকল তত্ত্বের আলোচনা করিলে হৃদয়ে অনুপম প্রীতির সঞ্চার হয়।

জীব-সমূহের যেকোন এক প্রত্যেক আছে, উদ্ভিদ দেহেও সেইরূপ এক প্রত্যেকেব কার্যনির্বাহক পদার্থ বর্তমান রহিয়াছে। উদ্ভিদেব দেহ কতকগুলি অতি সূক্ষ্ম তন্তুতে নির্মিত হয়। এই সকল তন্তু কতকগুলি অতি সূক্ষ্ম কোষের সমষ্টি মাত্র। একন্য পণ্ডিতগণ ইহাকে কৌষিক তন্তু নামে নির্দেশ করিয়া থাকেন। এইরূপ লক্ষ লক্ষ কৌষিক তন্তু একত্রিত হইয়া উদ্ভিদের মজ্জা, পত্র, পুষ্প প্রভৃতি সংগঠিত কবে। উদ্ভিদেব বীজ উপযুক্ত ভূমিতে উৎপন্ন হইলে এবং উপযুক্ত তাপ ও জল পাইলে তাহাব অভ্যন্তরস্থ কৌষিক ত্ত্ব ক্রমশঃ স্ফীত হইয়া বীজটিকে দুই ভাগে বিদীর্ণ কবে। পবে ঐ বীজ হইতে দুটি ইন্দ্রিয় বহির্গত হয়। এই ইন্দ্রিয়দ্বয়ের প্রথমটি বৃক্ষের মূল এবং দ্বিতীয়টি বৃক্ষেব স্কন্ধ, শাখা প্রভৃতি রূপে পরিণত হইয়া থাকে। এস্থলে ইহাও বলা আবশ্যিক যে, অগ্রে প্রথম ইন্দ্রিয়টি বহির্গত হয়, উহা পার্থিব বস আকর্ষণ করিতে সমর্থ হইলে দ্বিতীয় ইন্দ্রিয়টি স্কন্ধ, শাখা প্রভৃতি রূপে পরিণত হইয়া উঠে।

অনেকের বিশ্বাস, উদ্ভিদের চেতনা নাই। কিন্তু পণ্ডিতগণের সূক্ষ্ম অনুসন্ধানেন এ বিশ্বাসেব অলীকতা প্রতিপন্ন হইয়াছে। জন্তুগণ যেমন আপনাদের অবস্থার উপযোগী খাদ্য প্রভৃতি প্রয়োজনীয় দ্রব্যাদি আহরণ করিয়া প্রাণ ধারণ করে, উদ্ভিদও

## উদ্ভিদ-তত্ত্ব ।

তেমনই আপনার অবস্থানুরূপ দ্রব্য গ্রহণ করিয়া থাকে । বিশ্বকর্তার অত্যাশ্চর্য্য কৌশল প্রভাবে রক্ষ সকল বুদ্ধিমান পুরুষের ন্যায় আপনার ইষ্টানিষ্ট বুঝিয়া অসাব ভাগ পরিত্যাগ পূর্ব্বক সার ভাগ গ্রহণ করিয়া জীবিত রহে । রস ও আলোক উদ্ভিদের জীবন রক্ষার প্রধান বিষয় । সুতরাং উদ্ভিদের এই দুই বিষয় উপযুক্তরূপে লাভ করিয়া জীবিত থাকিবার জন্য সবিশেষ যত্ন পাইয়া থাকে । কোন রক্ষের মূলদেশের এক পার্শ্বে সারহীন ও অপর পার্শ্বে উত্তম মৃত্তিকা থাকিলে সেই রক্ষের শিকড় সকল সারহীন পার্শ্ব পরিত্যাগ পূর্ব্বক সার মৃত্তিকার অভিমুখে গমন করে । কোন রক্ষের শাখা অধোমুখ করিয়া বাথিলে তাহার অগ্রভাগ পুনর্বার উর্দ্ধমুখ হয় । লতাব আকর্ষ সকল ছাষার দিকে যাইয়া থাকে । ইহা অনেকেই প্রত্যক্ষ করিয়াছেন যে, যে সকল লতা প্রাতঃকালে বৌদ্র পায়, তাহার আকর্ষ আঁকাড় ) পশ্চিমাভিমুখ এবং যে গুলি বৈকালে বৌদ্র পায় তাহার আকর্ষ পূর্বাভিমুখ হইয়া থাকে । গৃহমধ্যে ক্ষুদ্র রক্ষ বাথিলে উহার অগ্রভাগ বৌদ্র পাইবার জন্য গবাক্ষের দিকে ক্রমাগত অগ্রসর হয় ।

এতদ্ব্যতীত অন্যান্য প্রকারেও উদ্ভিদের বিশেষের গতিশক্তি ও চেতনা পবিব্যক্ত হইয়া থাকে । লঙ্কাবতী লতা ইহাব একটি প্রধান দৃষ্টান্ত-স্থল । স্পর্শ করিবামাত্র এই লতাব পত্র সকল সঙ্কুচিত হইয়া পড়ে । বন-চণ্ডালিকা ( বন-টাড়াল ) নামে এক প্রকার রক্ষ আছে । দিবাভাগে মেঘ না থাকিলে এই রক্ষের পত্র সকল আপনা হইতেই ঘূর্ণ্যমান ও সঞ্চালিত হইয়া থাকে । মনুষ্য যেমন অধিক পরিমাণে অহিকেন সেবন করিলে সংজ্ঞাশূন্য ও স্তম্ভ বিশেষে মৃত্যুমুখে পতিত হয়, লঙ্কাবতী লতাও সেইরূপ অহিকেন সংস্পর্শে অচেতন ও বিগুহ হইয়া

## প্রবন্ধ-কুম্ভ

পড়ে। এই লতার মূলে অহিফেন-মিশ্রিত জল দিলে অর্ধ ঘণ্টার মধ্যে উহা চেতনাশূন্য হয়, বহুক্ষণ পর্যন্ত রৌদ্ৰাদির উত্তাপ পাইলেও উহার পত্র বিকশিত হয় না। অহিফেনের জল দুই দিবস ক্রমাগত সেচন করিলে এই লতা মরিয়া যায়। ক্লোবোফবম্ নামে এক প্রকার ঔষধ আছে, উহার জ্বাণে মনুষ্য চেতনা শূন্য হয়, লজ্জাবতী লতাতেও এই ক্লোবোফরমের কার্যকারিতা দৃষ্ট হইয়া থাকে। এই লতার এক পার্শ্বে ঐ ঔষধেব বাষ্প লাগাইলে তাহা তৎক্ষণাৎ সুপ্ত হয়, অপর পার্শ্বে সতেজ ও জাগ্রৎ থাকে।

জীবগণ যেমন আপন আপন দেহ রক্ষার জন্য যত্নবান্ হয় উদ্ভিজ্জগৎও সেইরূপ আপনাদিগকে রক্ষা করিতে নিযত যত্ন পাইয়া থাকে। রক্ষ সকল পর্যাপ্ত পৰিমাণে আলোক লাভের নিমিত্ত কিরূপ ব্যগ্র হয়, তাহা অনেকেই প্রত্যক্ষ করিয়াছেন। যদি কখন কোন ক্ষুদ্র তরু অন্ধকারাত কোন ঝোপের অভ্যন্তরে জন্মে, তাহা হইলে তাহা আলোক লাভেব নিমিত্ত আপনাব স্বাভাবিক দৈর্ঘ্যকেও অতিক্রম করিয়া থাকে। আলোক পাইলে রক্ষের পত্র সকল হবিদ্বর্ণ হয়, আলোকেব অভাবে উহা একান্ত শীর্ণ হইয়া পড়ে। সচবাচর দেখা যায়, কালিকাসুন্দা প্রভৃতিব পত্র সমূহ দিবালোকে বিকশিত ও সাযংকালে মুদ্রিত হয়। যদি কখন সূর্যাস্তের পূর্বে মেঘে দিগন্তল ঘোরতর অন্ধকাবে আচ্ছন্ন হয়, তাহা হইলেও এই সকল রক্ষপত্র মুদ্রিত দেখা যায়। এতদ্বারা উদ্ভিজ্জের অঙ্গসঞ্চালন-শক্তি পরিস্ফুট হইতেছে।

উত্তর কারোলাইন দেশেব মক্ষিকা জাল অথবা মক্ষিকা-পাশ নামে রক্ষ বিশেষে এই অঙ্গসঞ্চালন শক্তির কার্যকারিতা প্রত্যক্ষীভূত হইয়া থাকে। এই রক্ষের পত্র-সমূহেব উভয় পার্শ্বে এক এক শ্রেণী কণ্টক বর্তমান আছে। পত্রের উর্ধ্ব



সৃষ্টি এক প্রকার মিষ্ট বস জন্মে। মক্ষিকাগণ এই বস লোভে পত্রের উপর বসিলেই পত্রটি মুদ্রিত হয়। যাবৎ নিবন্ধ কীট বিনষ্ট না হয়, তাবৎ উহা পুনঃ প্রস্ফুটিত হয় না।

এক প্রকার সামুদ্রিক শৈবাল আছে উহার সমস্ত দেহ আপনা হইতেই ঘূর্ণিত হইয়া থাকে। অপর কতকগুলি শৈবাল স্বেচ্ছাবিহাৰী। এ গুলি কোন জলপূর্ণ পাত্রে বাধিলে পাত্রেব এক প্রান্ত হইতে অন্য প্রান্তে গমন কবে। অণুবীক্ষণ যন্ত্রের সাহায্যে এই গতি সূক্ষ্মরূপে দৃষ্ট হয়। অনেক পুষ্পও এইরূপ গতি-শক্তি-বিশিষ্ট। বুম্কা পুষ্প ও ফনিমনসা জাতীয় পুষ্পেব গর্ভকেশব ঘূর্ণিত হইয়া থাকে। আমেরিকা দেশে এক প্রকার অগাছা জন্মে, তাহার পত্র স্পর্শ কবিলে তৎক্ষণাৎ তাহা মুদ্রিত হইয়া যায়। এতদ্ব্যতীত একপ অনেক রক্ষ আছে যে, তাহার পত্র বাত্রিকালে মুদ্রিত হয় এবং দিবসে বিকশিত হইয়া থাকে। অনেক পুষ্পও এইরূপ মুদ্রিত ও বিকশিত হয়। লোকে এই মুদ্রণকে রক্ষের নিদ্রা এবং বিকাশকে রক্ষের চেতনা বলিয়া নির্দেশ করে।

উদ্ভিদের যেকপ চেতনা ও অঙ্গ সঞ্চালন ক্ষমতা আছে, সেই রূপ উহাদের অঙ্গে এক অসাধারণ শক্তিও বর্তমান রহিয়াছে। উদ্ভিদের এই শক্তির বিষয় অনুধাবন কবিয়া দেখিলে অবাক ও হতবুদ্ধি হইতে হয়। পূর্বে উক্ত হইয়াছে, উদ্ভিদের বীজ হইতে যে দুর্গী ইন্দ্রিয় বহির্গত হয়, তাহার একটা মৃত্তিকাব অভ্যন্তবে যাইয়া মূলরূপে পরিণত হয়। এই মূল দ্বাৰা পাথিব রস আকর্ষণ কবিয়া উদ্ভিদ ক্রমশঃ পরিপুষ্ট ও পবিবর্দ্ধিত হইতে থাকে। কোন রূপ বাধা উপস্থিত হইলেও উদ্ভিদ আপনার পবিপুষ্টি ও পবিবর্দ্ধন জন্ত যথাশক্তি যত্ন কবিয়া থাকে। এজন্য তাহাৰা অভাবনীয় শক্তি বিকাশ কবিতোও কাতব হয় না।

সচরাচর দৃষ্ট হইয়া থাকে, অতি কোমল নবাকুর অতি কঠিন মৃত্তিকা ভেদ করিয়া উদ্ধাভিমুখ হয় । সন্ধ্যাপ্রসূত বংশাকুব একপ কোমল হয় যে, ক্ষীণশক্তি বালকও অনায়াসে তাহা ভাঙিতে পারে । কিন্তু এই সুকোমল অঙ্কুরের শিরোদেশে একটা হাঁড়ি বিপর্যস্ত কবিয়া রাখ, দেখিতে পাইবে, সেই বংশাকুব হাঁড়িটা মস্তকে ধাবণ কবিয়া উল্কে উখিত হইতেছে । যদি হাঁড়ি মৃত্তিকায় দৃঢ় রূপে আবদ্ধ থাকে, তাহা হইলেও কোমলপ্রাণ বংশাকুব তাহা ভেদ কবিয়া উদ্ধাভিমুখ হয় । হাঁড়ির প্রতিকূলতায় অঙ্কুরের পবিবর্দ্ধন কোনও ক্রমে ব্যাহত হয় না ।

সকলেই গিলে ও নাটাকল, তাল ও আশ্রের বীচ দেখিয়াছেন । এই বীচ যে কত দৃঢ় এবং কত কঠোর যে উহা ভেদ করা যায়, তাহাও সকলেই অবগত আছেন । কিন্তু সুকোমল নবাকুব এই কঠিন আবরণও অবলীলাস ভেদ কবিয়া উদ্ধাভিমুখ হয় । এই কপে অঙ্কুরোদ্গম সময়ে বীজস্থ কোমল কৌষিক ত্বক্ অসাধারণ শক্তিব কার্য্য করিয়া থাকে ।

রাত্রিকালে কোন কোন উদ্ভিজ্জ হইতে আলোক নির্গত হইয়া থাকে । অনেকেই উদ্ভিজ্জ বিশেষের এই আশ্চর্য্য ধর্ম্মের বিষয় উল্লেখ কবিয়াছেন । ডুমণ্ড নামে একজন ভ্রমণকাবী লিখিয়াছেন যে, অস্ত্রেলিয়া দ্বীপে স্থান নদীর তীরে এক প্রকার ছত্রক (বেদের ছাতা) তাঁহাব দৃষ্টি-গোচর হইয়াছিল । রজনীতে এই ছত্রক এরূপ উজ্জ্বল আলোক-মালাষ শোভিত হইত যে, তিনি সেই আলোকেব সাহায্যে অনায়াসে পুস্তক পাঠ করিতেন । দক্ষিণ আমেরিকার ব্রেজিল দেশে এক প্রকার ছত্রক আছে, রাত্রিকালে তাহা হইতে খড়োতের আলোকেব স্নায় ঈষৎ হবির্ঘর্ষন জ্যোতিঃ নির্গত হইয়া থাকে । ড্রেস্‌ডেন

নগবেব কয়লার খনিতে ভিলাইন সাহেব ছত্রক-বিশেষ হইতে এইরূপ রশ্মি নির্গত হইতে দেখিয়াছেন । কয়েক প্রকার গৌদা পুষ্পও সন্ধ্যার সময় উজ্জ্বল বোধ হইয়া থাকে । আমাদের দেশে এক প্রকার একপত্রিক রক্ষ আছে, তাহার মুক্তিকার নিম্নস্থ কাণ্ড জলে সিক্ত করিলেই আলোক-পূর্ণ হইয়া উঠে । যতক্ষণ জল বর্তমান থাকে, ততক্ষণ এই আলোকেব নির্কাশ হয় না । জল শুষ্ক হইলেই উহা পূর্ববৎ বশ্মি-বিহীন হইয়া পড়ে । কি কাবণে এই অদ্ভুত ব্যাপার সংসাধিত হয়, তাহাব নিরূপণার্থ বৈজ্ঞানিকের গবেষণা নানা প্রকার যত্ন প্রদর্শন করিতেছে ।

দেশভেদে উদ্ভিদ জাতির বিভিন্নতা লক্ষিত হইয়া থাকে । গ্রীষ্ম মণ্ডলে যে সকল উদ্ভিদ জন্মে, তাহা হিম-মণ্ডলে উৎপন্ন হয় না, এবং হিমমণ্ডলের উদ্ভিদও সমমণ্ডলের শোভা বিকাশ কবে না । গ্রীষ্ম মণ্ডল উদ্ভিদ সমূহেব প্রধান উৎপত্তি-ক্ষেত্র । এই মণ্ডলে ধাতু, ইক্ষু, আম্র, খর্জুর, দাকচিনি, প্রভৃতি বিবিধ উপাদেয় দ্রব্য উৎপন্ন হয় । এই ভূখণ্ডেব কোন কোন রক্ষ স্নমধুব ফল প্রদান করিয়া মানব-বসনার তৃপ্তি সাধন করিতেছে, কোন কোন রক্ষ সুশীতল ও সুপেয় বাবি প্রদান পূর্বক তৃষার্ত ব্যক্তিকে স্নিগ্ধ ও সুখিত করিতেছে, কোন কোন রক্ষ নেত্র-তৃপ্তিকর কুমুম-বাজিতে সমলকৃত হইয়া বন-ভূমির শোভা দ্বিগুণিত করিয়া তুলিতেছে, এবং কোন কোন রক্ষ নিবন্ন ব্যক্তিব জীবন বক্ষাব প্রধান সম্বল হইয়া অনুপম শক্তি বিকাশ করিতেছে । এক্ষণে মানবেব যত্ন ও পবিত্রম বলে এক মণ্ডলেব রক্ষ মণ্ডলাস্তবে উৎপন্ন হইতেছে বটে, কিন্তু সেই সেই মণ্ডল পরিশ্রমোৎপন্ন রক্ষ সমূহের স্বাভাবিক আবাস-ভূমি নহে । দেশ ভেদে উদ্ভিদ ভেদ হওয়াতে মনুষ্যের খাদ্য দ্রব্যাদিরও পার্থক্য লক্ষিত হয় । বাই নামক শস্য সুরের মণ্ডলবাসী মানবগণের

প্রধান খাদ্য দ্রব্য; তথায় ধাত্তের উৎপত্তি হয় না। গোধুম সুমেরু-  
মণ্ডলের পার্শ্ববর্তী স্থান সমূহের অধিবাসিগণের জীবন বক্ষার  
অবলম্বন। ইহার দক্ষিণে ধাত্তের উদ্ভব-ক্ষেত্র। এই ধাত্তের  
সহিত ইক্ষু, নারিকেল, খর্জুর প্রভৃতি অন্যান্য শস্যবৎ উৎপত্তি  
হইয়া থাকে। কবাসী দেশের দক্ষিণ ভাগ হইতে অমনাস্তরুস্ত  
পর্যন্ত সীমার মধ্যে গোধুম ব্যতিরিক্ত যব, ভুট্টা, ধাত্ত প্রভৃতিও  
মনুষ্যের জীবন ধারণের প্রধান সামগ্রী।

পূর্বে উক্ত হইয়াছে, আলোক উদ্ভিজ্জগণের দেহরক্ষার প্রধান  
অবলম্বন। কিন্তু স্থল বিশেষে ইহার ব্যতিচ্যব দৃষ্ট হইয়া থাকে।  
অনেক স্থল অন্ধকারময় খনির অভ্যন্তরে জন্মে। সমুদ্র ও নদী  
গর্ভে যে শৈবালের উৎপত্তি হয়, তাহা কাহাবও অবিদিত নাই।  
সমুদ্রগর্ভে যে শৈবাল উৎপন্ন হয়, তাহা দৈর্ঘ্য পৃথিবীর অনেক  
সমুদ্রত রক্ষকেও পবাজয় করিয়া থাকে। এইরূপ শৈবালে  
প্রশান্ত মহাসাগরের অনেক স্থান পরিব্যাপ্ত রহিয়াছে। কিন্তু  
জলের অভাবে উদ্ভিজ্জ সমূহ কখনও সজীব থাকে না। আলোক  
যে রূপ স্থল বিশেষে উদ্ভিদ জাতির জীবন বক্ষার গৌণ উপাদান,  
জল সেরূপ নহে। জলের অভাব উপস্থিত হইলে উদ্ভিদ জাতি  
কোনও কালে কোনও অবস্থায় জীবিত থাকে না। এই জন্যই  
জলশূন্য মরু-প্রান্তরে রক্ষলতাদির অত্যন্ত অভাব দৃষ্ট হয়।

— — — — —

## ইতর প্রাণিদিগের মনোরত্তি ।

মানবগণ ধর্ম প্ররত্তি ও বুদ্ধি রত্তির বলে ইতর প্রাণিগণ অপেক্ষা সর্বাংশে শ্রেষ্ঠ হইয়াছে । এই ধর্ম প্ররত্তি ও বুদ্ধি-রত্তির গুণে তাহারা বিজ্ঞানের গুচ তত্ত্ব নির্ণয় কবিতোছে, হিতা-হিত বিবেচনা কবিয়া কর্তব্য পথ নির্দিষ্ট করিয়া লইতোছে, এবং হিতৈষিতা ও ন্যায্যপবতা প্রদর্শন করিয়া ভুমণ্ডলে অক্ষয় পুণ্য সঞ্চয় কবিতোছে । মনুষ্য যে দয়া, ন্যায্যপবতা ও বুদ্ধির প্রভাবে ঐদৃশ গুণগ্রামের অধিকারী হইয়াছে, ইতর প্রাণিদিগের মধ্যেও তাহাব কিঞ্চিৎ আভাস লক্ষিত হইয়া থাকে । অনেক সময় পশুাদি প্রাণিগণও মনুষ্যেব ন্যায্য বুদ্ধিরত্তিব চালনা কবিয়া সকলকে চমৎকৃত করে । যে হিতৈষিতা, কোমলতা ও উদাবতা মানব জাতির প্রধান ভূষণ, পশুজাতিতেও সেই হিতৈষিতা, কোমলতা ও ন্যায্যপবতা বর্তমান থাকিষা সর্কশক্তিমান জগদী-শ্ববেব অনন্ত মহিমাৰ সাক্ষ্য প্রদান কবিতোছে ।

বানবদিগেব বুদ্ধি ও বিবেচনাৰ সম্বন্ধে অনেক কাহিনী জনসমাজে প্রচলিত আছে । এই বাক্শক্তিশূন্য জীবগণ বুদ্ধি-রত্তির বলে অনেক সময়ে সাধারণ মনুষ্যদিগকেও অধঃকৃত কবিয়া থাকে । দক্ষিণ আমেরিকাৰ একজন ভ্রমণকারী স্বয়ং দেখিষা লিখিষাছেন, একদা একদল বানর একটী ক্ষুদ্র সবিৎ পাব হইবার জন্য নদীকূলে উপস্থিত হয় । নদীৰ উভয় পাৰ্শ্বে দুটী প্রকাণ্ড বৃক্ষ বর্তমান ছিল । বানর-দল এই বৃক্ষদ্বয় অবলম্বন করিষা পাব হইবার এক অদ্ভুত উপায় উদ্ভাবন করে । ইহাদেব একটী প্রথমে তটদেশের বৃক্ষে আরোহণ পূৰ্বক তাহাব অগ্রবর্তী শাখা পদদ্বয়ে দৃঢ়রূপে ধাবণ করিষা আপনাৰ দেহ সম্প্রসারিত কবিল, পবে আৰ একটী বানর প্রথমটীৰ হস্তদ্বয় আপনাৰ পদ-

ছয়ে দৃঢ়রূপে ধারণ করিয়া পূর্বেই ন্যায় দেহ বিস্তারিত করিল ;  
 এইরূপে কতকগুলি বানর ক্রমান্বয়ে পবম্পর্কের হস্ত ও পদ  
 আবদ্ধ করিয়া নদীৰ অপব তটস্থ বৃক্ষের শাখা দৃঢ়রূপে ধারণ  
 করিল । অবশিষ্ট বানরগুলি স্বজাতিব দেহ-নির্মিত এই অপূর্ন  
 সেতুদ্বারা অপব পাবে উপস্থিত হইল । পবে যে বানরগুলি  
 আপনাদের দেহ প্রসারণ পূর্কক সেতু নির্মাণ করিয়াছিল,  
 তাহারা পর্যায়ক্রমে এক একটা কবিষা তটবর্তী সঙ্গিদিগের  
 সহিত সন্মিলিত হইতে লাগিল । বানবদিগের এই অদ্ভুত  
 উদ্ভাবনী শক্তি ও বুদ্ধির্তিব বার বার প্রশংসা কবিত্তে হয় ।  
 বেঞ্জার নামে একজন প্রাণিতত্ত্বজ্ঞ বানরদিগেব মানসিক বৃত্তির  
 প্রখবতার সম্বন্ধে কয়েকটা দৃষ্টান্ত প্রদর্শন কবিয়াছেন । তদ্বারা  
 স্পষ্ট প্রতিপন্ন হয় যে, ইতব প্রাণিগণও প্রগাঢ় বুদ্ধিমান ব্যক্তিব  
 ন্যায় কার্য্য কবিষা থাকে । বেঞ্জাব তাঁহার গৃহপালিত বানব-  
 দিগকে কাগজেব মোডকে কবিষা মিছবি খণ্ড দিতেন । একদা  
 তিনি মিছরির পবিবর্ত্তে পূর্ক্বেই ন্যায় কাগজেব মোডক করিষা  
 একটা সজীব বোলতা একটা বানরেব হস্তে সমর্পণ করেন ।  
 বানব মিছবি গনে কবিষা যেমন সেই মোডক খুলিষাছে, অগনি  
 বোলতা তাহার গাত্রে দংশন করে । এই ঘটনার পর বেঞ্জার  
 যতবাব খাদ্য সামগ্রী পূর্ক্বেই কাগজেব মোডকে আবদ্ধ কবিষা  
 সেই বানবকে দিষাছেন , বানব ততবাব উহা সাবধানে হস্ত  
 দ্বারা উত্তোলন কবিষাছে, সাবধানে কর্ণেব নিকট লইষা 'উহাব  
 শব্দ পবীক্ষা কবিষাছে, এবং সাবধানে মোডক খুলিষা খাদ্য  
 সামগ্রী বাহিব কবিষা লইষাছে । বুদ্ধির্তিব ন্যাব বানব  
 দিগেব অনুচিবীর্ষা ও কুতূহলপবতাও সবিশেষ বলবতী । একদা  
 একটা বানব একজনকে প্রাতঃকালে দস্তকাষ্ঠ দ্বারা দস্ত ধাবন  
 করিত্তে দেগিষা অপনি প্রত্যহ প্রাতঃকালে দস্ত ধাবন করিত্ত ।

ব্রেম নামে একজন প্রানিতত্ত্বজ্ঞ পণ্ডিত লিখিয়াছেন, এক সময়ে তাঁহার কতকগুলি প্রতিপালিত বানর ছিল। উহারা সর্প দেখিলে যার পর নাই ভীত হইত। এই প্রানিতত্ত্বজ্ঞ পণ্ডিতের গৃহে বায়ু-বদ্ধ কতকগুলি সর্পও ছিল। বানরগণ যদিও সর্প দর্শনে মত্তস্ত হইত, তথাপি কৌতুহল চরিতার্থ কবিবার জন্য সময়ে সময়ে ঐ বায়ুর দ্বার উন্মোচন করিয়া সর্প গুলিকে অভিনিবেশ সহকারে দর্শন করিত। সুপ্রসিদ্ধ প্রানি-বিদ্যা-বিশাবদ ডার-উইন সাহেব একদা লণ্ডন নগরের পশ্চালয়স্থিত কতকগুলি বানরের সম্মুখে একটি মৃত সর্প নিক্ষেপ কবেন, সর্পদর্শনে ভীত হইয়া বানরগণ প্রথমে ইতস্ততঃ পলায়িত হইল, কিন্তু পবে যখন জানিতে পারিল, নিক্ষিপ্ত সর্প সজীব নহে, তখন তাহারা একে একে সর্পের নিকটবর্তী হইল, এবং আগ্রহ সহকারে সর্পের সমস্ত দেহ নিবীক্ষণ পূর্বক আপনাদের কৌতুহল চরিতার্থ করিতে লাগিল। অনেক স্থলে বানরগণ মানব জাতির কার্য-কলাপের একপাশুন্দর অনুকরণ কবে যে, তাহা হঠাৎ দেখিলে লাতিশয় বিস্মিত ও চমৎকৃত হইতে হয়। জ্রাবো নামে গ্রীষ দেশেব এক জন ইতিহাসবেত্তা এবিষয়ে একটি উৎকৃষ্ট দৃষ্টান্ত দিয়াছেন। মাসিদনেব মহাবীর সেকন্দর সাহ যখন সৈন্যগণ সমভি-ব্যাহাবে ভাবতবর্ষে উপনীত হন, তখন একদা বহুসংখ্য বানর বন হইতে বহির্গত হইয়া সেই মাসিদনীয় সৈন্যেব সম্মুখভাগে দণ্ডায়মান হম। যুদ্ধ-সজ্জিত ও শত্রু-সম্মুখীন সৈন্যেব অবস্থানেব সহিত তাহাদের অবস্থানের অণুমাত্র বৈলক্ষণ্য লক্ষিত হয় নাই। ইহাতে মাসিদনীয় সৈন্যগণের এমন মতিভ্রম হয় যে, তাহারা প্রকৃত শত্রু সেনা ভাবিয়া এই দলবদ্ধ বানরদিগকে আক্রমণ কবিতে উদ্যোগ করে।

উপস্থিত বুদ্ধি ও কৃতজ্ঞতা প্রভৃতি মানসিক গুণে হস্তী এবং

কুকুরও লবিশেষ প্রসিদ্ধ। একদা একজন মুগয়ারী স্বীয় হস্তীতে আরোহণ পূর্বক অরণ্যমধ্যে প্রবেশ করেন। বনে প্রবেশ করিবার পবেই একটা সিংহ তাঁহার নেত্রপথে পতিত হয়। শিকারী অসাবধানতা প্রযুক্ত হঠাৎ হস্তীর পৃষ্ঠদেশ হইতে ভূপতিত হইয়া ভীম-দর্শন পশুরাজের ক্ষমতায়ত্ত হন। হস্তী প্রভুব এই আকস্মিক বিপদ দর্শনে কর্তব্য-বিমুখ হয় নাই। সে প্রত্যাৎপন্নমতি-প্রভাবে নমীপবর্তী একটা বৃক্ষের কাণ্ড অবনত করিয়া এমন দৃঢ়তর বলের সহিত সিংহের পৃষ্ঠদেশে চাপিয়া ধরে যে, সিংহ তাহাতেই শিকারীকে পবিত্যাগ পূর্বক লোমহর্ষণ ধ্বনি করিয়া গতানু হয়। মুগয়া সময়ে কুকুরগণও এইরূপ প্রত্যাৎপন্নমতি ও বুদ্ধিমত্তার পরিচয় দিয়া থাকে। একদা একজন শিকারী নদীর এক তটে থাকিয়া তটান্তবস্থিত দুটা হংসের প্রতি গুলি নিক্ষেপ করেন। ইহাতে দুটা হংসেরই পক্ষদেশে গুলি প্রবেশ কবে। শিকারী এই হংসদ্বয়কে আনিবাব জন্য স্বীয় কুকুবকে ইঙ্গিত কবেন। কুকুব প্রভুব আদেশ প্রতিপালনার্থ সন্তবন দ্বারা অপর তটে উপনীত হইয়া একবাবে দুটা হংসকেই একত্রে আনিবাব চেষ্টা কবে। কিন্তু তাহাতে কৃতকার্য হইতে না পারিয়া একটা বাধিয়া আন একটিকে গ্রহণ করিতে উদ্যত হয়। পাছে তাহার অনুপস্থিতিতে আহত হংস পলায়ন করে, এই আশঙ্কায় দুটাকে একবাবে বধ করিয়া ক্রমান্বয়ে দুইবাব নদী উত্তীর্ণ হইয়া এক একটিকে প্রভুব নিকট উপস্থাপিত করে।

টিপু সুলতানের রাজধানী শ্রীরঙ্গপত্তন আক্রমণ সময়ে একটা হস্তী যেরূপ কৌশলে একজন সৈনিক পুরুষকে আসন্ন মৃত্যুব হস্ত হইতে রক্ষা করে, তাহা অনুধাবন করিয়া দেখিলে হস্তি-জাতির পবিগাম-দর্শিতা ও বুদ্ধিমত্তার ধাব পর নাই প্রশংসা করিতে হয়। ব্রিটিশ সেনাগণ যখন টিপু সুলতানের বিরুদ্ধে



যুদ্ধযাত্রা করে, তখন কতকগুলি তোপ একটি বিশুদ্ধ নদীর বালু-  
কাময় গর্ভে দিয়া নগবাভিমুখে সমানীত হইতেছিল । এই তোপ-  
সমূহের একটির উপর একজন সৈনিক পুরুষ বসিয়াছিল !  
ঘটনাক্রমে উপবিষ্ট সৈনিক হঠাৎ এমন ভাবে অধঃপতিত হইল  
যে, কিয়ৎক্ষণ মধ্যেই তোপেব চক্র তাহার দেহেব উপব দিয়া  
যাইবার সম্ভাবনা ছিল । পশ্চাতে একটি হস্তী আসিতেছিল,  
সহসা এই ভয়ানক ব্যাপার তাহার নেত্রগোচর হইল । বিচক্ষণ  
হস্তী কালবিলম্ব না করিয়া শুণ্ড দ্বারা তোপেব চক্র উত্তোলিত  
করিল, এবং উহা অধঃপতিত সৈনিককে অতিক্রম করিলে পুন-  
র্বার ধীরে ধীরে মাটিতে নামাইয়া দিল । হস্তী কামানটী  
তুলিয়া না ধরিলে চক্রসম্পেষণে সৈনিক পুরুষেব মৃত্যু হইত ।

অশ্বজাতিরও মনোরুত্তি সাতিশয বলবতী । বোডিলিয়ে  
নামে একজন সেনাপতিব একটি অশ্ব ছিল । অশ্বটী স্ত্রী ছিল  
বটে, কিন্তু বার্কক্য প্রযুক্ত তাহার দন্ত সকল ক্ষয়িত হইয়া গিয়া-  
ছিল, এতন্নিবন্ধন সে খাস বা দানা চর্ষণ কবিতে পারিত না ।  
শ্বজাতীয়েব এই দুঃসময়ে পার্শ্বস্থিত অপর দুটী অশ্ব ঘাস ও দানা  
চর্ষণ করিয়া রুদ্ধ অশ্বের সম্মুখভাগে ফেলিয়া দিত । রুদ্ধ অশ্ব  
এই চর্কিত ঘাস ও চূর্ণ চনক ভোজন কবিয়া কিছুকাল জীবিত  
ছিল । পনি ঘোটকেব স্মৃতিশক্তির সম্বন্ধে অনেক দৃষ্টান্ত পাওয়া  
যায় । এস্থলে একটি দৃষ্টান্ত দেওয়া যাইতেছে । ইংলণ্ডের কোন  
সংবাদ-পত্র-বন্টনকারী একটি পনি ছিল । সে সংবাদপত্রের  
সমুদয় গ্রাহককেই উত্তমরূপে চিনিত । বন্টনকারীব পীড়া হইলে  
একটি বালককে ঐ পনির উপর আবোহিত কবিয়া সংবাদ পত্র  
বন্টন করিতে পাঠান হয় । এই সময়ে সুযোগ্য ঘোটক প্রত্যেক  
গ্রাহকের দ্বারদেশে খামিয়া সংবাদপত্র বিলি করিয়া দিয়াছিল ।  
ইহাতে আরোহীব কোনকপ ক্লেশ বা অসুবিধা হয় নাই ।

কয়েক বৎসর হইল, ফরাসী ও প্রুসীয়দিগের মধ্যে যে ঘোর-  
তব সংগ্রাম হইয়াছিল, সেই সংগ্রাম সময়ে সুশিক্ষিত তিৰ্য্যক-  
জাতি অসামান্য বুদ্ধি-চাতুরী প্রদর্শন করে। শত্রুসেনায় নগরী  
অবরুদ্ধ হইলে ফরাসিগণ সুশিক্ষিত কপোতের মুখে পত্র দিয়া  
ছাড়িয়া দিত, পত্রবাহক কপোত উড়্‌ডীয়মান হইয়া এই পত্র  
যথাস্থানে উপস্থাপিত করিত। একদা ফরাসিগণ এইরূপ একটি  
কপোত ছাড়িয়া দিয়াছিল, এমন সময়ে বিপক্ষগণ এই কপোত-  
বাহিত পত্র ধৃত করিবার জন্য একটি শ্যেন পক্ষীকে ছাড়িয়া  
দিল। শ্যেন আকাশ-পথে উড়্‌ডীন হইয়া পত্রবাহক কপোতকে  
সবলে আক্রমণ করিল। বুদ্ধিমান প্রতিপালক-হিতৈষী কপোত  
দেখিল, পত্র রক্ষার আর কোন উপায় নাই, সুতবাং সে কাল-  
বিলম্ব না করিয়া পত্রখানি গিলিয়া ফেলিল। কিন্তু ইহাতে  
কপোত পরিজ্ঞান পাইল না। শ্যেনেব আক্রমণে তাহার ক্ষমতা  
পর্য্যুদস্ত ও জীবন বিনষ্ট হইল। পৰিশেষে কপোতের গলদেশ  
ছিন্ন করিয়া পত্র বাহির করা হইল। একটি স্‌দাণমা ফরাসী-  
মহিলা এই হিতৈষী কপোতের হিতৈষিতাব বিষয় শুধুব  
গীতিকায় নিবন্ধ করিয়া তাহাকে চিবম্ববণীয় করিয়াছেন।

বানর জাতির উপস্থিত বুদ্ধিব সম্বন্ধে পূর্বে একটি দৃষ্টান্ত  
দেওয়া হইয়াছে। এইস্থলে আব একটি বানরের হিতৈষিতা,  
সুকৌশল ও বুদ্ধিব আর একটি দৃষ্টান্ত দেওয়া যাইতেছে। এই  
দৃষ্টান্ত ভিন্ন দেশ হইতে সংগৃহীত হয় নাই। কিছুদিন পূর্বে  
আমাদের দেশেই এই বিষয় সংঘটিত হইয়াছিল। সচরাচর  
দেখিতে পাওয়া যায়, অনেকে লোকের দ্বারে দ্বারে বানর নাচা-  
ইয়া জীবিকা নির্বাহ করে। এই সম্প্রদায়েব এক ব্যক্তিকে রাত্রি  
কালে কয়েকজন পাপায়া অর্ধলোভে নিহত করে, এবং তাহাব  
শব নিকটবর্তী গাঠে প্রোথিত করিয়া রাখে। নিহত ব্যক্তির

প্রতিপালিত বানর অস্তবালে থাকিয়া এই সমস্ত ঘটনা দর্শন করে। বাক্তি প্রভাত হইলে বানর আর্তনাদ করিতে করিতে নিকটবর্তী খানায় উপস্থিত হয়, এবং পুলিশের সকল লোককেই সমলে বস্ত্র ধবিয়া আকর্ষণ করিতে থাকে। শান্তিবক্ষকগণ বানরের এই অদৃষ্টচর কার্য দর্শনে কৌতূহলী হইয়া তাহার সমভি-  
ব্যাহারে যায়। বানর এইরূপে শান্তিবক্ষকদিগকে সঙ্গে লইয়া নির্দিষ্ট মাঠে উপনীত হয়, এবং যে স্থানে তাহাব প্রতিপালন-  
কর্তার শব প্রোথিত ছিল, সেইস্থানে যাইয়া পূর্বেব ন্যায় আর্ত-  
নাদ কবিত্তে কবিত্তে হস্ত দ্বারা মৃত্তিকা তুলিতে আবস্ত করে। ইহা দেখিয়া শান্তিবক্ষকগণ স্থির থাকিতে পারিল না। তাহাবা সেই স্থানের মৃত্তিকা খনন কবিত্তে আরম্ভ করিল এবং কিয়ৎক্ষণ মধ্যেই শব তাহাদের দৃষ্টিগোচর হইল। শান্তিবক্ষকগণ পবিশেষে এই বানরের সাহায্যেই হত্যাকাবিদিগকে ধৃত কবে।

একজন সম্ভ্রান্ত ইংলণ্ডীয় মহিলা একটা কুক্কুরী কৃতজ্ঞতাৰ সম্বন্ধে লিখিয়াছেন, “আমার ইয়ারিকো নামে একটা কুক্কুরী ছিল। তাহাব প্রায় দশ বাবটা শাবক হয়। আমি প্রত্যহ তাহাকে স্বহস্তে আহাবীয় সামগ্রী দিতাম। ইয়ারিকো আহাবে পবিতুহ্ন হইয়া শাবকগণেব সহিত পবম মুখে কালাতি-  
পাত কবিত্ত। একদা প্রাতঃকালে দেখিলাম, একটা শৃগাল ইয়ারিকোব সন্তানগুলিকে আক্রমণ কবিত্তে উদ্যত হইয়াছে, ইয়ারিকো পক্ষপুট বিস্তারপূর্বক শাবকগুলিকে পশ্চাতে রাখিয়া শৃগালেব সম্মুখভাগে দণ্ডায়মান বহিয়াছে। ইয়ারিকোব সন্নি-  
বেশ-ভঙ্গী ও তাৎকালিক অবস্থা দর্শনে স্পষ্টই প্রতীত হইয়াছিল যে, সে শৃগাল হস্তে আত্মসমর্পণ করিবে, তথাপি প্রাণাধিক সন্তান গুলিকে মৃত্যুমুখে পাতিত হইতে দেখিবে না। আমি এই ঘটনা দেখিয়া মাত্র কালবিলম্ব না করিয়া আমার কুক্কুরকে ইচ্ছিত

করিলাম ; কুকুর তৎক্ষণাৎ মহাবেগে ধাবিত হইয়া ইয়ারিকোকে নিরাপদ করিল। এই অবধি আমি দেখিলাম, ইয়ারিকোর সহিত কুকুরের অকৃত্রিম মৌহর্দ জন্মিয়াছে। ইহাৰা সৰ্বদা একসঙ্গে আহার ও একসঙ্গে অবস্থান করিত। ইয়ারিকো কুকুরের প্রতি একপ কৃতজ্ঞ ছিল যে, সে কখনই কুকুরকৃত এই মহদুপকার বিস্মৃত হয় নাই। ইয়ারিকোর শাবকগুলি অপেক্ষাকৃত অধিক-বয়স্ক হইলে সৰ্বদা তাহাদের রক্ষাকর্তা সেই কুকুরের সঙ্গে সঙ্গে থাকিত। এক দিনের জন্যও তাহারা কুকুরকে পরিত্যাগপূর্বক স্থানান্তরে গমন কবে নাই। তাহাদের মধ্যে যে প্রগাঢ় সন্তোষ, অকৃত্রিম প্রীতি ও অবিচলিত মমতা আছে, তাহা স্পষ্ট হৃদয়ঙ্গম হইত।” এক জন প্রাণিতত্ত্ববিৎ পণ্ডিত ইতর জীবদিগের পবোপকার ও স্নেহের সম্বন্ধে লিখিয়াছেন, “একদা এক সম্ভ্রান্ত ব্যক্তি আপনাব আবাস বাটীৰ প্রাঙ্গণে শকট পবিচালনা করিতেছিলেন ; হঠাৎ শকটের চক্র তাহার পালিত কুকুরের পাদদেশের উপর দিয়া চলিয়া গেল। কুকুর যাতনায় অস্থির হইয়া অঙ্গ সঞ্চালন করিতে লাগিল। কুকুরের এই কাতরতা দর্শনে নিকটবর্তী একটি কাক তথায় উপস্থিত হইয়া করুণকণ্ঠে চীৎকার করিতে প্ররম্ব হইল। এই অবধি কাক কুকুরের আহার জন্য প্রতিদিন মাংসখণ্ড আনিয়া দিত। ক্রমে কুকুরের চক্রনেমির আঘাত-জনিত ক্ষতস্থান সাতিশয় উৎকট হইয়া উঠিল, শাবীরিক বল ও তেজস্বিতা অন্তর্হিত হইতে লাগিল, এবং ক্রমে মৃত্যু-সময় নিকটবর্তী হইল। এই সময়ে কাক কুকুরের আহাৰাশেষণ ব্যতীত আর কোনও কার্য উপলক্ষে স্থানান্তরে যাইত না, সৰ্বদা বিষণ্ণচিত্তে ও কাতবভাবে কুকুরের নিকট বসিয়া থাকিত। একদা কাক আহার অশেষণে বহির্গত হইয়াছে, তাহার আসিতে সম্মত। অতীত হইল, ইত্যবসবে কুকুর-

রক্ষক সেই পীড়িত কুকুরটিকে গৃহে আবদ্ধ করিয়া দ্বার রোধ-  
পূর্বক চলিয়া গেল। কাক আসিয়া দেখিল, গৃহের দ্বার রুদ্ধ  
হইয়াছে, সুতরাং সে অনন্যগতি হইয়া সমস্ত বাত্রি চঞ্চুপুটদ্বারা  
দ্বাবের নিম্নস্থ ভূমি খনন করিতে লাগিল। পরহিতৈমী পরদুঃখ-  
কাতর কাকেব প্রগাঢ় পরিশ্রমে ক্রমে দ্বাবের নিম্নভাগে একটি  
গর্ত প্রস্তুত হইল। কাক এই গর্ত দিয়া গৃহমধ্যে প্রবেশ করিবার  
উপক্রম করিতেছে, এমন সময় কুকুর-বক্ষক তথায় সমাগত হইয়া  
এই অদৃষ্টচব ও অদ্ভুত ব্যাপার দর্শনে যার পর নাই বিস্মিত  
হইল।

উল্লিখিত উদাহরণ-পরম্পরা ইতর প্রাণিদিগের মনোরত্তির  
উৎকর্ষের সবিশেষ পরিচয় প্রদান করিতেছে। মানবগণ যে  
গুণের প্রভাবে শ্রেষ্ঠত্ব লাভ করিয়াছেন, যে গুণের প্রভাবে দেব-  
বাহুণীর পবিত্র স্মৃৎখব রসাস্বাদে সমর্থ হইতেছেন, যে গুণ তাহা-  
দেব হৃদয় অতুলনীয় ও অনবদ্য করিয়া তুলিতেছে, সামান্য  
প্রাণিজাতিতেও সে গুণ বিরল নহে। হায়! অনেকে সামান্য  
স্মৃৎখের আশায় ঈদৃশ প্রাণীদিগকেও যাতনা দিতে কুণ্ঠিত হয়  
না, এবং অনেকে সামান্য জীবগণের মধ্যেও দয়া, ন্যায্যপবতা ও  
হিতৈষিতার ভুরি ভুরি দৃষ্টান্ত পাইয়াও আপনাদের উদ্ধাম মনো-  
রত্তি-সমূহকে ঠৈশাচিক ব্যাপার সাধনে নিয়োজিত করিতে  
সঙ্কোচ অবলম্বন করে না। দয়াময় জগদীশ্বর তাহাদিগকে যে  
সমস্ত অতুৎকৃষ্ট গুণগ্রামের অধিকারী করিয়াছেন, তাহারা অব-  
লীলায় ও অসঙ্কোচে তৎসমুদয় পাদদলিত করিয়া ইতর প্রাণিগণ  
হইতেও ইতর ভাবাপন্ন হইয়া পড়ে। ঈশ্বরের অসীম সৃষ্টির  
মধ্যে শিক্ষাশূন্য, বাকশক্তিশূন্য সামান্য জীবগণ এই সকল  
মানবগণ অপেক্ষা সর্বাংশে শ্রেষ্ঠ, সন্দেহ নাই।

শ্রী ২০  
Aec 22020  
১২/১/১৬

## শিক্ষা ।

শিক্ষা, বুদ্ধি পরিমার্জিত ও হৃদয় সংস্কৃত করিবার একটা প্রধান উপায় । বুদ্ধি পরিমার্জিত না হইলে কল্পনা ও প্রতিভা উচ্চতম গ্রামে আরোহণ করিয়া দেব-বাঞ্ছনীয় পবিত্র সূত্র ভোগেব অধিকারী হওয়া যায় না, এবং হৃদয় সংস্কৃত না হইলে সর্বপ্রকার সাধুতা, সর্বপ্রকার উৎকর্ষ ও সর্বপ্রকার অনবদ্যতার মনোহর আভরণে সমলঙ্কৃত হইতে পারা যায় না । শিক্ষা প্রতিভা-শক্তিকে সুপ্রণালীক্রমে উন্মোচিত কবে, এবং মানবী প্রকৃতিকে দেব ভাবাধিত করিয়া তুলে ।

শিক্ষাপ্রভাবে যাহাব হৃদয় সংস্কৃত হয় নাই, বুদ্ধি মার্জিত হয় নাই, এবং বিবেক কর্তব্য-পথ প্রদর্শনে অগ্রসর হয় নাই, সে পবিত্র মানব নামেব যোগ্য মহে । জলধির অসীম বিস্তারে যেমন একই নীলিমা বিকাশ পায়, তাহার হৃদয় সেইরূপ অজ্ঞানের নিরবচ্ছিন্ন ঘোব অন্ধকাবে আচ্ছন্ন থাকে । সে কেবল ইন্দ্রিয় পবিত্ৰ হইলেই আপনাকে চরিতার্থ জ্ঞান করে । প্রকৃতির কার্য কাৰণেব সূক্ষ্ম অনুসন্ধান, আপনার কর্তব্য নির্ধারণেব সূক্ষ্ম বিচাবে তাহার মন নিয়োজিত হয় না । সে মহাসাগবেব তবঙ্গমালা দর্শনে ভীত হয়, হিমালয়েব শৃঙ্গে মেঘলমুহের কালিমা দেখিয়া নমন মুদ্রিত করে, এবং গভীর বজ্রনাদ ও দিগদাহকারী দাবানলে সঙ্কুচিত হইয়া থাকে । এইসকল ভয়ঙ্কর দৃশ্য যে অসীম জড় জগতের অনন্তশক্তি বিকাশ কবিতোছে, তাহা তাহার মস্তিষ্কে নীত হয় না, মানবগণ প্রতিভা ও কল্পনার প্রভাবে এই অনন্ত শক্তিকে কদাচিৎ কবিয়া পৃথিবীতে যে অত্যদ্ভুত কার্যকলাপের অনুষ্ঠান কবিতোছে, তাহা ভাবিয়া সে আনন্দ অনুভব করে না । কে তাহার সম্মুখে এই সকল ভীমকান্ত দৃশ্য প্রসারিত রাখিয়া-

ছেন, কাহার অসীম শক্তির প্রভাবে এই জড় জগৎ ব্যবস্থাপিত হইয়া আপনার শক্তি প্রকাশ কবিতেছে, তাহা সে একবারও অনুধাবন করে না। সে কুর্সের ন্যায় আপনাতেই আপনি লুক্কায়িত থাকিয়া জীবিত কাল পর্য্যবসিত করে। সে বৃক্ষের অনায়াগ-লব্ধ কল ভোজন করিয়া পরিতৃপ্ত হয়, সুপরিষ্কৃত নির্ঝর-বারি পান করিয়া তৃষ্ণা শাস্তি করে, এবং অবলীলায় ও অসঙ্কোচে নানা প্রকার কুণ্ডপিত কার্য সম্পন্ন করিয়া অপার আনন্দ অনুভব করিয়া থাকে। কিছুতেই তাহার চবিত্র সংগঠিত হয় না, জীবিত-প্রয়োজন সংসাধিত হয় না, এবং বুদ্ধি বৃত্তি পরিমার্জিত হইয়া সৎপথ অবলম্বন কবে না। সে অজ্ঞানাবস্থায় ভুমিষ্ঠ হয়, এবং অজ্ঞানাবস্থাতেই কালাতিপাত করিয়া ইহলোক হইতে অবসৃত হইয়া থাকে।

কিন্তু সুশিক্ষা যাহাকে সর্ব-শ্রেষ্ঠ গুণগ্রামে অলঙ্কৃত করিয়াছে, তিনি পৌর্ণমাসী বজনীব জ্যোৎস্না-বিধৌত কুমুদস্থলের ন্যায় পবিত্র ও কলঙ্কশূন্য। তিনি নবলোকে থাকিয়াও দেবলোকের পবিত্র মুখ সন্তোগ কবিয়া থাকেন। পবিত্র চরিত্রের বলে, গভীর দূবদর্শিতার সাহায্যে এবং সুস্থির বিবেক-বুদ্ধির প্রসাদে তিনি আপনার কর্তব্য যথারীতি সম্পাদন কবিয়া বিনশ্বর জগতে অবিনশ্বর কীর্তিস্তম্ভ স্থাপন কবেন। কিছুতেই তাঁহার সাধনা প্রতিহত হয় না, এবং কিছুতেই তাঁহার কর্তব্য-বুদ্ধি অবনত হইয়া পড়ে না। তিনি কখনও ভুলোক হইতে সৌর জগতে উপস্থিত হইয়া গগন-বিহারী গ্রহগণের কার্য নন্দর্শন পূর্বক পুলকিত হন, কখন পার্থিব জগতে অবতরণ পূর্বক প্রকৃতির গুঢ় তত্ত্ব নির্ণয় করিয়া সকলকে বিস্ময়ে অভিভূত করেন, কখন অজ্ঞান ও কুসংস্কারাচ্ছন্ন সমাজকে জ্ঞানালোকে আলোকিত ও পবিত্রতার স্বর্গীয় সৌরভে আমোদিত কবিয়া

তুলেন, এবং কখন মূর্তিমতী দয়া ও ন্যায়পরতা হইয়া রোগাতুরকে পথ্য, শোক-সন্তপ্তকে সাধনা ও উচ্ছ্বলকে সতু-পদেশ দিয়া সম্প্রীত করিয়া থাকেন। তাঁহার হৃদয়-সাগর অটলতা ও নির্ভীকতায় আতট পূর্ণ থাকে, তাঁহার কর্তব্য-বুদ্ধি স্তবে স্তবে সুসময়ে স্তবে স্তবে অটল গিরিবরের ন্যায় সদা উন্নত রহে, এবং তাঁহার ন্যায়পরতা ও দূরদর্শিতা সমস্ত বিঘ্ন বিপত্তির দুশ্চেষ্টা আবরণ উন্মুক্ত করিতে সদা যত্নপর হইয়া থাকে। তিনি এইরূপে পবিত্রতার মনোহর আভরণে ভূষিত হইয়া সাধাবণের অচিন্ত্য, অগম্য ও অনাস্বাদিত-পূর্ব আনন্দ-প্রবাহে অভিষিক্ত হইতে থাকেন।

পূর্বে উক্ত হইয়াছে, সুশিক্ষাবলে বুদ্ধিবৃত্তি পরিমার্জিত ও হৃদয় সংস্কৃত হইয়া থাকে। বাহ্যিক হৃদয় সংস্কৃত হয় নাই, চরিত্র সংগঠিত হয় নাই এবং পবিত্রতা বাহ্যিক হৃদয়ে প্রতিকলিত হয় নাই, সে কখনও সুশিক্ষিত বলিয়া গণনীয় নহে। যখন দেখিব, এক জন সাহিত্যে অসামান্য ক্ষমতার পরিচয় দিতেছে, গণিতে অনন্য-সাধারণ পারদর্শিতা প্রদর্শন করিয়া সকলকে চমকিত করিতেছে, দর্শনেব জটিল অর্থ উদ্ভেদ করিয়া আপনি মহাপ্রজ্ঞ ও মহাজ্ঞানী বলিয়া সাধাবণেব শ্রদ্ধাঙ্গুস হইতেছে, কিন্তু পরক্ষণেই যদি সে মূর্তিমতী পাপ-প্রবৃত্তি হইয়া অত্যাচার ও অবিচারে সমাজকে ভারাক্রান্ত করিয়া তুলে, তাহা হইলে আমরা তাহাকে অশিক্ষিত বলিয়াই কাতর নয়নে চাহিয়া দেখিব। যে মস্তিষ্কেব শক্তিতে মহীয়ান হইয়াও হৃদয়ের শক্তিকে উপেক্ষা করে, সে সুশিক্ষিত নহে, সুশিক্ষিত নামের কলঙ্ক মাত্র, এবং ঈদৃশী শিক্ষাও সুশিক্ষা নহে, কুশিক্ষাব অপবিত্র ছায়ামাত্র।

হৃদয়ের শক্তি মার্জিত ও উন্নত করা যেমন সুশিক্ষার প্রয়োজন, সেইরূপ স্বাবলম্বন-বলে অন্য সাহায্য-নিরপেক্ষ হইয়া



স্থানিয়মে সংসার যাত্রা নির্বাহ করাও সুশিক্ষাব একটা প্রধান উদ্দেশ্য । যে শিক্ষায় স্বাবলম্বন-শক্তির উন্মেষ হয় না, তাহা প্রকৃত “শিক্ষা” পদের বাচ্য নহে । স্বাবলম্বন মনুষ্যকে সর্বদা উন্নত, অবিচলিত ও অনমনীয় বাখে । আত্মাবলম্বন না থাকিলে কখনই কেহ কোন দুষ্কর কার্য সাধন কবিয়া উন্নতি লাভে সমর্থ হয় না, এবং স্বাধীনতান সুখময় ক্রোড়ে লালিত হইয়া অসব-স্পৃহণীয় পবিত্র সুখ আশ্বাদ কবিত্তে পাবে না । আত্মাবলম্বন ও আত্মাদর থাকিলে লোকে যে অবস্থাতেই পতিত হউক না কেন, সেই অবস্থায় থাকিয়াই অসকুচিত চিত্তে আপনাব উৎকর্ষ সাধন কবিত্তে পাবে ।

হৃদয়েব শক্তিব পবিমার্জন এবং আত্মাবলম্বন ও আত্মাদবের উন্নতি সাধনেব সহিতই সুশিক্ষাব প্রয়োজন পর্য্যবসিত হয় না । এই সকলের সহিত পবমাত্মনিষ্ঠা ও চিত্ত সংযমের সংযোগ থাকা আবশ্যিক । পবমাত্মনিষ্ঠ ও সংযতচিত্ত না হইলে শিক্ষা প্রগাঢ় ও কর্তব্য বুদ্ধিব উদ্দীপক হয় না । “মনুষ্য অপূর্ণ, অসমর্থ ও অসংখ্য অভাব-বিশিষ্ট” । পবমাত্মনিষ্ঠায় এই অপূর্ণতায় পূর্ণতা, অসামর্থ্যে সামর্থ্য এবং অভাবে বিষয়-প্রাপ্তি কিয়দংশে সম্পন্ন হইয়া থাকে । যে হৃদয় ঐশ্ববিক-তত্ত্বে সমাকৃষ্ট নহে, সে হৃদয় বিস্ত্রক ও সে হৃদয় চিনশোভা-হীন, বিনি সিদ্ধিদাতা ঈশ্ববকে বিস্মৃত হইয়া যদৃচ্ছাক্রমে সংসাবে বিচরণ কবেন. তিনি প্রকৃত-শিক্ষা-বিবহিত ও প্রকৃত সাধনা-শূন্য । প্রশান্ত বজনীব সুনীল আকাশ প্রকৃতিব কমনীয় কাঙ্ক্ষি শত গুণে উজ্জ্বল করিতেছে, “দিব্য লাবণ্য-শোভিত” পূর্ণ-চন্দ্র সুনিক্ক কিবণে চারি দিক্ হাস্যময় কবিয়া তুলিতেছে, তবঙ্গিনী জ্যোৎস্না-বঞ্জিত হইয়া কলম্ববে সাগবেব অভিমুখে প্রধাবিত হইতেছে, এই সকল সুন্দর দৃশ্য সকলেই দেখিয়া থাকে, কিন্তু প্রশান্ত আকাশ দেখিলে

বাঁহার হৃদয় পবিত্র ভাবে সম্প্রসারিত হয়, কমলীয় মূর্তি শশধবের  
হাস্য দেখিয়া বাঁহার হৃদয় হাসিতে থাকে, স্রোতস্বতীৰ বিমল  
বাবি-রাশিব সহিত যিনি স্বীয় অশ্রু-প্রবাহ মিশাইয়া তদাতচিন্তে  
সেই সৰ্বশক্তিমান, অনাদি, অনন্ত পরম দেবতার জ্ঞান ও শক্তি  
ধ্যান করেন, তিনিই প্রকৃত শিক্ষিত ও তিনিই প্রকৃত সাধু।  
তিনি মানব হইয়াও দেবভাবে পবিপূর্ণ থাকেন, এবং মর্ত্যবাসী  
হইয়াও অমরবাসীর সুখস্বাদে পবিতৃপ্ত বহেন। তাঁহার সুমধুর  
দেব-প্রকৃতি সৰ্বদা অভুলনীয় ও স্বর্গীয় সৌন্দর্য্যে চিবপবিপূর্ণ।

## দূর শ্রবণ-যন্ত্র (টেলিফোন)।

টেলিফোন অথবা দূর শ্রবণ-যন্ত্র উনবিংশ শতাব্দীর একটা  
প্রধান বৈজ্ঞানিক আবিষ্কৃতি। ভাঙিত বার্তাবহ যেমন চক্ষুর  
নিমিষে বহুদূরবর্তী স্থান হইতে সংবাদ বহন করিয়া আনে, এই  
যন্ত্রও তেমনি বহুদূরবর্তী স্থান হইতে শব্দ বহন করিয়া লোকের  
শ্রুতি-বিববে প্রবেশিত করিয়া থাকে। সুতরাং কেহ দূরতব  
স্থানে থাকিলেও এই যন্ত্রের সাহায্যে তাহার সহিত কথোপকথন  
করা সুসাধ্য হইয়া উঠে।

আমেরিকাবাসী বেল সাহেব এই অদ্ভুত দূর শ্রবণ-যন্ত্রের  
সৃষ্টিকর্তা\*। যন্ত্রটি অতি সামান্য ও স্বল্পব্যয় সাধ্য। স্বল্পব্যয়-

\* বিপাত বৈজ্ঞানিক যন্ত্র নিষ্কাশন-কারক এডিসনও দূর শ্রবণ যন্ত্র নিষ্কাশন করিয়াছেন।  
কিন্তু আনান্দেব দেশে যে দূর শ্রবণ-যন্ত্র ব্যবহৃত হয়, তাগ পেন সাহেবের নির্মিত। এখানে  
ইহাও উল্লেখ করা কর্তব্য, এই এডিসন ভূমিদালোক দ্বারা নগর প্রভৃতি আলোকিত করিবার  
উপায় উদ্ভাবন করিয়াছেন। ইহাও উদ্ভাবনী শক্তি প্রভাবে অনেকগুলি বৈজ্ঞানিক যন্ত্র নির্মিত  
হইয়াছে। অন্ততম যন্ত্রের নাম স্বন সংস্কক (ফোনোগ্রাফ)। এই যন্ত্রের সম্বন্ধে কেহ কোন  
ধবে কথা কহিলে, যে সময়েই হইক, যত্র হইতে সেই স্বরে সেই কথা বর্জিত করিতে পাৰা  
যাহেন।

সাধ্য বলিয়া ইহা সাধারণের বিলক্ষণ ব্যবহারোপযোগী হইয়াছে। যন্ত্রটি এইরূপ, একটি চোঙের গত কাঠের ক্রেমের কিছু নিম্নে এক খানি রুতাকান লৌহপাত ঐ ক্রেমে সংলগ্ন থাকে, এই লৌহ পাতের কিছু নিম্নে এক খানি চুম্বক ও তাহাতে কতকগুলি জড়ান তার সন্নিবেশিত রহে। এতদ্ব্যতীত উক্ত যন্ত্রে আর কোন দ্রব্যের সমাবেশ নাই। সুতরাং রুতাকার লৌহপাত, চুম্বক ও তার দূব শ্রবণ-যন্ত্রের প্রধান উপাদান।

সিংহল দ্বীপবাসিগণ এক সময়ে কিয়দূবে থাকিয়া পবম্পক কথোপকথন কবিবার জন্য সূক্ষ্ম চর্ম্মাচ্ছাদিত এক একটি বাঁশের চোঙ আপনাদের নিকট বাধিত। এই উভয় চোঙের চামড়া একগাছি সূতা দ্বারা সংযুক্ত থাকিত। কথোপকথনের প্রয়োজন উপস্থিত হইলে একব্যক্তি একটি চোঙে মুখ দিয়া বাক্য উচ্চারণ করিত, অপব ব্যক্তি দূরে থাকিয়া অন্য চোঙটি কর্ণে দিলে পূর্কোক্ত ব্যক্তির উচ্চারিত বাক্য স্পষ্ট শুনিতে পাইত। কিঞ্চিৎ অনুধাবন করিয়া দেখিলে এই শ্রবণ-যন্ত্র প্রণালীর তত্ত্ব স্পষ্টরূপে হৃদয়ঙ্গম হইবে। শব্দ সকল নিববচ্ছিন্ন কম্পন মাত্র। তর্জনী দ্বারা সস্তাডিত হইলেই তন্ত্রীর তার সমূহ হইতে যত্ন মধুর ধ্বনি নির্গত হইয়া থাকে। মুখ হইতে যে শব্দ নির্গত হয়, তাহাও বায়ুর সংঘাত-জনিত এক প্রকার কম্পন। মানব-কণ্ঠস্থ সূক্ষ্ম ও সচ্ছিন্ন চর্ম্মের অভ্যন্তর প্রদেশ দিয়া শ্বাস-নালীস্থ বায়ু সবেগে নির্গত হইলে উক্ত চর্ম্ম কম্পিত হইতে থাকে। এই কম্পন বায়ু প্রবাহে সঞ্চালিত হইয়া কর্ণ-পটহে আঘাত করিলে কর্ণপটহও কম্পিত হয়। কর্ণ-পটহের কম্পন শিবা দ্বারা মস্তিস্কে নীত হইলে বাক্য শ্রুত হইয়া থাকে। এক্ষণে যে চোঙের বিষয় উল্লিখিত হইয়াছে, তাহাতেও এই নৈসর্গিক প্রক্রিয়ার কার্য-কাবিতা দৃষ্ট হইয়া থাকে। একটি চোঙে মুখ দিয়া শব্দ

উচ্চারণ করিলেই সেই চোঙের অভ্যন্তরস্থ বায়ু কম্পিত হইয়া উঠে । চর্ম্মাবরণের এই কম্পনে তৎসংযুক্ত সূত্র একবার সটান ও একবার শিথিল হইতে থাকে, সূত্রের এইরূপ সঞ্চালনে অপব চোঙের মুখ-স্থিত চর্ম্মও কম্পিত হয় । সূত্রবাৎ মূল কণ্ঠ-স্বরের কম্পন প্রথম চোঙের চর্ম্মাবরণ ও সূত্র দ্বারা চালিত হইয়া দ্বিতীয় চোঙের চর্ম্মাবরণে প্রবেশ পূর্ব্বক তাহাকে কম্পিত করে , এই শেষোক্ত কম্পন বায়ু-প্রবাহ বলে অপবের কর্ণ-পটহে চালিত হওয়াতে শব্দ-শ্রুত হইয়া থাকে ।

এই বংশ-নির্ম্মিত চোঙের কার্য্য-প্রণালীর সহিত দূব-শ্রবণ যন্ত্রের কার্য্য-প্রণালীর কিমদংশে সাদৃশ্য লক্ষিত হয় । উভয় যন্ত্রেই কণ্ঠস্বরের কম্পন এক পাতলা পাত হইতে অপব পাতে সঞ্চালিত হয় । কেবল একটীতে চর্ম্মময় পাত অপবটীতে লৌহ-ময় পাত ব্যবহৃত হইয়া থাকে । কিন্তু কেবল এই অংশে দূব শ্রবণ-যন্ত্রের সহিত সিংহল-বাসিদের ব্যবহৃত যন্ত্রের বৈসাদৃশ্য লক্ষিত হয় না , অপব বিষয়েও উভয়ের মধ্যে গুরুতর বিভিন্নতা আছে । সূত্র বংশময় চোঙের শব্দ-সঞ্চালক , তড়িৎ দূব শ্রবণ-যন্ত্রের শব্দ-বাহক , অর্থাৎ বংশ নির্ম্মিত চোঙে শব্দ প্রবেশিত কবিলে সেই শব্দ চোঙ-সংযুক্ত সূত্রের আকৃঞ্চন ও সম্প্রসারণে অপব চোঙে প্রবিষ্ট হয়, দূব শ্রবণ-যন্ত্রে শব্দ প্রবেশিত কবিলে সেই শব্দ যন্ত্র-সংযুক্ত তাব দিয়া তাড়িত প্রবাহের বলে সঞ্চালিত হইয়া অপর যন্ত্রে প্রবিষ্ট হইয়া থাকে । যে কম্পনে শব্দের উৎপত্তি হয়, তাহা অধিক সূত্র টানিতে পাবে না, সূত্রবাৎ তাহাতে অধিক দূবের কথাও শ্রুতি-বিবরে প্রবিষ্ট হয় না । কিন্তু দূব শ্রবণ-যন্ত্র ঐদৃশী প্রণালীর নহে । তাড়িত বেগের প্রভাবে এতদ্বারা বহু দূববর্তী দেশস্থ লোকের কথাও অবলীলায় শুনিতে পারা যায় ।

কি প্রকারে দূর শ্রবণ-যন্ত্রে তাড়িতের উৎপত্তি হয় এবং কি প্রকারে তাহা আপনাব অসাধারণ ক্ষমতা বিকাশ করিয়া নেত্র পথাতীত স্থান হইতে শব্দ-বহন করিয়া আনে, তাহা বলিবার পূর্বে চুম্বকের সম্বন্ধে কিছু বলা আবশ্যিক হইতেছে। চুম্বক, লৌহাকর্ষক ধাতব-দণ্ড বিশেষ। পরীক্ষা দ্বারা নির্দিষ্ট হইয়াছে যে, একটা তাব স্কুপের মত জুড়াইয়া তাহাব অভ্যন্তরে তাড়িতশ্রোতঃ প্রবাহিত করিলে সেই তার নির্মিত স্কুপটি চৌম্বক ধর্ম প্রাপ্ত হয়, অর্থাৎ উহা চুম্বকের ন্যায় লৌহাকর্ষণ প্রভৃতি সকল কার্যই করিয়া থাকে। আঁপের নামে একজন বৈজ্ঞানিক পণ্ডিত স্থিবি করিয়াছেন, এক খণ্ড চুম্বকের চাবি-দিকেও তাড়িত-শ্রোতঃ স্তম্ভাকারে বর্তমান থাকে; বৈজ্ঞানিক পরীক্ষা বলে ইহাও নির্ণীত হইয়াছে যে, একখণ্ড চুম্বকে তার জুড়াইয়া আর একখণ্ড চুম্বক সহসা তাহাব নিকটে আনিলে অথবা তাহাব নিকট হইতে দূরে লইয়া গেলে ঐ তারে তাড়িত সঞ্চালিত হইয়া থাকে।

এক্ষণে দূর শ্রবণ-যন্ত্রে কি প্রকারে তাড়িত প্রবাহের উদ্ভব হয়, তাহা উল্লিখিত বৈজ্ঞানিক সত্য দ্বারা হৃদযন্ত্রম হইবে। পূর্বে উক্ত হইয়াছে, দূর শ্রবণ-যন্ত্রে এক খানি লৌহপাত ও তাহাব অনতিনিম্নে এক গাছি তাব-জড়ান চুম্বক থাকে। লৌহপাত খানি চুম্বকের নিকটবর্তী বলিয়া উহা সর্দাংশে চৌম্বক ধর্মাক্রান্ত। একপ স্থলে এক জনে এই লৌহপাতের উপর কথা কহিলে, তাহাব কণ্ঠস্থবে বায়ু কম্পিত হইবে, এবং সেই সঙ্গে সঙ্গে লৌহপাতও কম্পিত হইয়া উঠিবে। অর্থাৎ লৌহপাত একবার চুম্বকের নিকটে যাইবে, আবার তাহা হইতে সরিয়া আসিবে। কিন্তু পূর্বে উক্ত হইয়াছে, লৌহপাত চৌম্বক গুণাক্রান্ত; সুতবাং এক খানি চুম্বকে যে যে কার্য নিষ্পন্ন হয়,

উক্ত লৌহপাতেও সেই সেই কার্য সংসাধিত হইবে। একবার বলা হইয়াছে, এক খণ্ড চুম্বক মহলা আর এক খণ্ড তার-জড়িত চুম্বকের নিকটে আসিলে বা তাহা হইতে সবিষা গেলে ঐ তারে তড়িৎ-শ্রোতঃ প্রবাহিত হয়। এই তড়িৎ-শ্রোতঃ এক দিকে প্রবাহিত হয় না, চুম্বক নিকটে আসিলে উক্ত শ্রোতঃ যে দিকে যায়, দূবে গেলে তাহার বিপবীত দিকে যাইয়া থাকে। সুতরাং শব্দ উচ্চাষিত হইলে লৌহপাত যেমন কম্পিত হইবে, চুম্বক-জড়িত তারের তাড়িত শ্রোতঃও একবার এক দিকে আর বার তাহার বিপবীত দিকে প্রবাহিত হইতে থাকিবে। এই উভয় বিধ তাড়িত প্রবাহ তার দ্বারা অপর একটা দূব শ্রবণ-যন্ত্রের লৌহপাতে সংক্রান্ত হইয়া তাহাকেও কম্পিত কবে। এই শেষোক্ত লৌহপাতের কম্পন বায়ু দ্বারা অপরের কর্ণ-পট্টে চালিত হইলে বক্তাব কথা গুলি শুনা গিয়া থাকে। বক্তা যত দূরবর্তী দেশেই বাস করুন না কেন, দূব শ্রবণ-যন্ত্রে কথা কহিলে শ্রোতা আন একটা যন্ত্র কর্ণে লাগাইয়া তাহার সমস্ত কথাই শুনিতে পাইবেন। বলা বাহুল্য, এই উভয় যন্ত্র পরস্পর তার দ্বারা সংযোজিত থাকা আবশ্যিক।

দূর শ্রবণ-যন্ত্রের কার্য-প্রণালীর সম্বন্ধে যাহা উল্লিখিত হইল, তাহার সাবাংশ এই, এক জনে এই যন্ত্রে মুখ দিয়া কথা কহিল, তাহাতে এক খানি লৌহপাত কাঁপিয়া উঠিল, এই কম্পনে চুম্বক-জড়িত তাবে তাড়িত প্রবাহ সংক্রামিত হইল, এবং এই তড়িৎ শ্রোতঃ উক্ত তাব দিয়া সংচালিত হইয়া অপর স্থানস্থ শ্রোতা যে যন্ত্রটা কর্ণে সংলগ্ন রাখিয়াছে, তাহার এক খানি লৌহপাত কাঁপাইল। একবিধ কম্পনে একরূপ শব্দেবই উৎপত্তি হইল। সুতরাং শ্রোতা বক্তাব কথা গুলি সুস্পষ্ট শুনিতে পাইল।

বিজ্ঞানের গরীয়নী শক্তি-প্রভাবে যে, এইরূপ কত শত অদ্ভুত

ঘাণ্ডার সজ্জাটিত হইতেছে, তাহার ইবত্তা করা যায় না। মানবী প্রতিভা বলে প্রকৃতির অভাবনীয় শক্তি এইরূপে কার্যকাৰিণী হইয়া প্রাণি-জগতের সমূহ মঙ্গল সাধন করিতেছে।

## মানক।

বাবা নানক অথবা নানক সাহ শিখ-সম্প্রদায়েব প্রতিষ্ঠাতা ও আদি গুরু। নানকের জীবন-চরিত অনেক ভাষায় অনেক পুস্তকে প্রকাশিত হইয়াছে। এই জীবনরত্নের সহিত অনেক-গুলি অলৌকিক বা অসামান্য ঘটনার সংমিশ্রণ দৃষ্ট হয়। ষাঁহাবা পবিত্রমান জগতের সমক্ষে আপনাদের প্রভাব প্রকাশ কবেন, ঐশী শক্তি ষাঁহাদিগকে উৎকৃষ্ট গুণে ভূষিত কবিয়া কোন অসামান্য কর্ম সম্পাদনে নিয়োজিত কবে, মানব-কল্পনা প্রায় তাঁহাদের কার্য-পৰম্পরাকে ঘটনা-বৈচিত্র্য ও অতি-শযোক্তিতে আচ্ছন্ন কবিয়া তুলে। নানক ধর্ম-জগতে সেকপ ক্ষমতা ও দক্ষতার পবিচয় দিয়াছেন, তাহাতে তাঁহাব সম্বন্ধে যে নানা প্রকাব কিম্বদন্তী প্রচাৰিত হইবে, তাহা বিশ্বয-জনক নহে। শিখগণ আপনাদের ধর্মগুরুব মহিমা পবিবর্দ্ধিত ও ঈশ্বর প্রতিপন্ন কবিবার জন্য যে সমস্ত অলৌকিক ঘটনার উল্লেখ কবিয়া থাকেন, তাহাতে কখনও বিশ্বাস জন্মিতে পাবে না। নানকের জন্ম-গ্রহণের সমকালে অদুবে মহতী জনতাব আনন্দোৎসব, শৈশবে সর্পকর্ষক ছায়া প্রদান, যৌবনে বিশুদ্ধ জলাশয়ে জলোচ্ছানের আবির্ভাব প্রভৃতি অনেক ঘটনায় অমানুষ ও সর্ষশক্তিময় দেবত্ব মিশ্রিত আছে। একপ ঘটনায় সাধাবণেব বিশ্বাস জন্মিবাব সম্ভাবনা নাই, স্মৃতবাং এস্থলে তৎসমুদয়ের উল্লেখেবও আবশ্যিকতা নাই।

১৪৬৯ খ্রীষ্টাব্দে লাহোরের দশ মাইল দক্ষিণবর্তী কানাকুচা গ্রামে নানকের জন্ম হয়। কোন কোন মতে ইবাবতী ও চক্ষু-ভাগাব মধ্যবর্তী তলবন্দী গ্রামে নানক জন্ম গ্রহণ করেন। কিন্তু অন্যান্য মতের সহিত ইহার একতা লক্ষিত হয় না। তলবন্দী গ্রামে নানকের পিত্রালয় ছিল। নানক কানাকুচা গ্রামে তাঁহার মাতামহের আলয়ে ভূমিষ্ঠ হন। নানকের পিতার নাম কালুবেদী। কালুবেদী স্বত্রিয় বংশোৎপন্ন বলিয়া প্রসিদ্ধ। “বেদী” উপাধির সম্বন্ধে একটি কিশ্বদন্তী প্রচলিত আছে, প্রসঙ্গ-সঙ্গতি ক্রমে এস্থলে তাহা যথাবৎ লিখিত হইল।

বামচন্দ্রের পুত্র কুশ ও লব যথাক্রমে কুশাবতী ও লবকোট নামে দুটি নগর স্থাপন করেন। লবকোট বর্তমান সময় লাহোর নামে পরিচিত। কুশাবতী কিরোজপুরের দ্বাদশ মাইল অন্তর্বে অবস্থিত ছিল। কুশ ও লবের বংশধরগণ এই কুশাবতী ও লাহোবে নির্ঝিবাদে অনেক কাল অবস্থান করেন। কালক্রমে কুলপুত্র কুশাবতীতে এবং কুলবাও লবকোটের শাসন-দণ্ড গ্রহণ করিলেন। ঐ সময় উভয়ের মধ্যে বিষম শত্রুতা জন্মিল। কুশাবতীর অধিপতি কুলপুত্র বহুসংখ্য নৈন্য সংগ্রহ করিয়া লাহোর অধিকার করিলেন। কুলবাও এইরূপে পরাভূত ও বাক্য হইতে নির্ঝানিত হইয়া দক্ষিণপথে অধিপতি অমৃতের শরণাগত হইলেন। মহাবাজ অমৃত শরণাগতের যথোচিত আদর সহকাৰে অভ্যর্থনা করিলেন, সৌজন্য ও সহৃদয়তার সহিত তাঁহাকে স্বীয় দুহিতা সমর্পণ করিলেন, এবং অন্তিম সময়ে বিপুল ঐশ্বৰ্য্যের উত্তরাধিকারী করিয়া পবলোকগত হইলেন। অমৃতের তনয়্যাব গর্ভে সদীবাও নামে কুলবাওর একটি পুত্রসন্তান জন্মিল। পিতার লোকান্তর গমনের পর সদীরাও দক্ষিণপথে অধিপতি হইয়া আর্য্যাবর্ত পর্য্যন্ত স্বীয় অধিকার বিস্তার করিলেন।



একদা প্রধান অমাত্য সদীরাওকে কহিলেন, “আপনি অসংখ্য জনপদের অধিবাসী হইয়াছেন বটে, কিন্তু আপনার পৈত্রিক রাজ্য হস্তগত হয় নাই। আপনার পৈত্রিক রাজ্য পঞ্জাব। আপনার পিতা কুলপুত্র কর্তৃক ঐ স্থান হইতে নিষ্কাশিত হইয়াছিলেন।” সদীরাও প্রধান অমাত্যের নিকট এই বিবরণ শুনিয়া সৈন্ত সামন্ত সমভিব্যাহারে লাহোরে যাত্রা কবিলেন, এবং কুলপুত্রকে যুদ্ধে পরাস্ত কবিয়া পৈত্রিক সিংহাসনেব অধিকারী হইলেন।

কুলপুত্র বাজ্যভ্রষ্ট ও ত্রীভ্রষ্ট হইয়া পবিত্রাজকবেশে নামা-স্থানে ভ্রমণ করিয়া পবিশেষে পুণ্য-ভূমি বাবাণসীতে উপস্থিত হইলেন। এই স্থানে তিনি বেদাধ্যয়নে প্ররত হন। একদা বেদ পড়িতে পড়িতে কুলবাও দেখিতে পাইলেন, বেদে এই কথাটি লিখিত আছে, “দৌরাত্ম্য করা মহাপাপ, মনুষ্য দৌরাত্ম্য করিলে কখনই দয়ার আশা কবিতে পারে না।” এই উপদেশ বাক্য কুলপুত্রের হৃদয়ে আঘাত করিল। তিনি দৌরাত্ম্য কবিয়া ভ্রাতাকে বাজ্য হইতে নিষ্কাশিত করিয়াছিলেন বলিয়া সাত্তিশয় ত্রিয়মাণ হইলেন। কুলবাও আর বাবাণসীতে থাকিতে পারিলেন না। দুঃখিত হৃদয়ে স্বকৃত পাপের ক্ষমা প্রার্থনা কবিতে সদীরাওব নিকটে উপস্থিত হইবার সঙ্কল্প কবিলেন।

কুলপুত্র লাহোরে উপস্থিত হইয়া সদীবাওর সমক্ষে বেদপাঠে প্ররত হইলেন, এবং পাঠ সমাপ্ত কবিয়া স্বীয় ছক্কুতেব ক্ষমা প্রার্থনা করিলেন। সদীরাও পিতৃব্যের মুখে বেদ শুনিয়া সাত্তিশয় হৃষ্টচিত্তে তাঁহার সমস্ত অপবাধ বিস্মৃত হইয়া নিজের সিংহাসন তাঁহাকে সমর্পণ কবিলেন। এইকপে কুলপুত্র পুনর্বার লাহোরেব সিংহাসনে আসীন হইলেন, এবং বেদ পাঠ করিয়া-ছিলেন বলিয়া “বেদী” উপাধি লাভ কবিলেন। এই অবধি কুলপুত্রের বংশধবগণেরও উপাধি “বেদী” হইল। নানকের

পিতা কালু এই বংশের সন্তান বলিয়া 'বেদী' উপাধি দ্বারা অলঙ্কৃত হন ।

নানক অল্পবয়সে অল্পসময়ের মধ্যে গণিত ও পাবিত্র বিদ্যা আয়ত্ত করেন । তিনি স্বভাবতঃ শুদ্ধাচারী ও চিন্তাশীল ছিলেন । কিছু দিনের মধ্যেই সাংসারিক কার্য ও সাংসারিক ভোগ-সুখে তাঁহার সান্তিগয় বিতৃষ্ণা জন্মিল । কালুবেদী পুত্রকে সংসাব-ধর্মে আনয়ন করিতে বিশেষ চেষ্টা পাইলেন, নিজ হইতে চল্লিশটি টাকা দিয়া লবণের ব্যবসায় আরম্ভ কবিত্তে বিশেষ অনুবোধ করিলেন, কিন্তু তাঁহার সে চেষ্টা ফলবতী বা সে অনুবোধ প্রতিপালিত হইল না । নানক পিতৃদত্ত মুদ্রায় খাদ্য সামগ্রী ক্রয় করিয়া ক্ষুৎপিপাসার্ভ সন্ন্যাসিদিগকে ভোজন করাইয়া অপাব আনন্দলাভ করিলেন ।

নানক যৌবনাবস্থাতেই হিন্দু ও মুসলমান ধর্ম-সম্প্রদায়েব সমস্ত ধর্মানুশাসন এবং বেদ ও কোরাণের সমস্ত তত্ত্ব হৃদয়ঙ্গম কবিলেন এবং স্মৃতীক্ল প্রতিভা ও প্রগাঢ় শাস্ত্র-জ্ঞান-বলে উদার ও পরিশুদ্ধ মত প্রচার করিতে প্ররৃত্ত হইলেন । তিনি সমস্ত অন্ধ বিশ্বাস ও সমস্ত কুসংস্কারময় লৌকিক ক্রিয়া-কাণ্ডের উপর নিতান্ত বিবক্ত হইয়া উঠিলেন । বাহাতে হৃদয়েব শান্তিলাভ হয়, বাহাতে পবিত্র ও উদার ঐশ্বরিক তত্ত্ব প্রচারিত হয়, তাহাই জীবনেব দাব, ধর্ম বলিয়া তাঁহার নিকট বিবেচিত হইল । প্লেতো ও বেকন যেরূপ সমস্ত দর্শন-শাস্ত্র আন্দোলন কবিয়াও প্রকৃত জ্ঞানেব ভিত্তিতে নানাবিধ জঞ্জাল দেখিয়া হতাশ হইয়া পড়িয়া-ছিলেন, নানকও সেইরূপ সমস্ত ধর্মশাস্ত্রে ও ধর্মপদ্ধতিতে নানাবিধ কুসংস্কারেব প্রাদুর্ভাব দেখিয়া ক্ষুব্ধ হইয়া পড়িলেন । তিনি সন্ন্যাসিবশে ভারতবর্ষের নানাস্থানে ভ্রমণ কবিলেন, অনেক সাধু ও ষোগিদিগেব সহিত আলাপ করিলেন, আরবের

উপকূল অতিবাহিত করিয়া ফকীরদিগের কার্যকলাপ দর্শন করিলেন, কিন্তু কোথাও পবিত্র সত্যের আভাস দেখিতে পাইলেন না। সকল স্থানেই কুলংকারের ভয়ঙ্করী মূর্তি, সকল স্থানেই কর্মকাণ্ডেব শোচনীয় বিকাব দেখিয়া ক্ষুব্ধচিত্তে স্বদেশে প্রত্যাবৃত্ত হইলেন। তিনি এক্ষণে জাতিগত, সম্প্রদায়গত ও অনুশাসনগত সমস্ত বৈষম্য দূর্বীভূত করিয়া উদার সমদর্শিতা প্রণালী প্রবর্তিত কবিত্তে সচেষ্ঠ হইলেন। স্বদেশে আগিয়া তিনি সন্ন্যাস ধর্ম ও সন্ন্যানিবেশ পবিত্যাগ করিলেন। গুরুদাসপুর জেলায় ইরাবতীর তটে “কীর্তিপুর” নামে একটি ধর্মশালা প্রতিষ্ঠিত হইল। নানক স্বীয় উদার মত প্রচার কবিয়া অনেক শিষ্য সংগ্রহ করিয়াছিলেন। কীর্তিপুর ধর্মশালায় তিনি সপরিবারে এই শিষ্য সম্প্রদায়ে পবিরূত হইয়া জীবনের শেষ ভাগ অতিবাহিত কবেন। ১৫৩৯ খ্রীষ্টাব্দে সপ্ততিবর্ষ বয়ঃক্রমকালে এই স্থানেই বাবা নানকের পবিত্র জীবন-শ্রোত অচিন্ত্য, অগম্য, স্বর্গীয় অমৃত প্রবাহে মিশিয়া যায়। নানক লোদীবংশেব অভ্যুদয় সময় প্রাদুর্ভূত হন, এবং মোগলবংশেব অভ্যুদয়েব পর মানবলীলা সম্বরণ কবেন। ধর্মনিষ্ঠা ও ধর্ম চিন্তায় তাঁহাব জীবিতকালের ষাটবৎসব পাঁচ মাস ও সাত দিন অতিবাহিত হইয়াছিল।

নানকের মৃত্যু পর তাঁহাব দেহ লইয়া তদীয় হিন্দু ও মুসলমান শিষ্যদিগেব মধ্যে ঘোবতর বাদানুবাদ উপস্থিত হয়। হিন্দুগণ দাহ করিতে ইচ্ছা কবে, এবং মুসলমানগণ সমাধি দিতে প্রস্তুত হয়। এই উভয় দলই বলপূর্বক শব লইবার আশয়ে আস্তুরণপট তুলিয়া দেখে যে, শব নাই। গোলযোগেব সময় শিষ্যগণের কেহ অবশ্যই উহা স্থানান্তরিত করিয়াছিল। যাহা হউক, অনন্তর উভয় দল, যে আস্তুরণে শব আচ্ছাদিত ছিল,

তাহা বিধা বিভক্ত করিয়া একখণ্ড অস্ত্যোষ্টি-ক্রিয়ার বিধি অনুসারে দাহ, অপর খণ্ড রীতিমত উপাসনার পর সমাধিস্থ করিল। এই দাহ-স্থলেব উপর মঠ ও সমাধি-ভূমির উপর স্তম্ভ নির্মিত হইল। এক্ষণে এই উভয় স্মৃতি-মন্দিরের কিছুমাত্র চিহ্ন নাই। বেগবতী ইরাবতীব অনন্ত-প্রবাহ ইহাকে সর্ব নংহাবক কালের কুক্ষিণায়ী করিয়াছে।

নানক যে পবিত্র ও উদার ধর্ম-পদ্ধতি প্রচার করেন, তাহাব আলোক প্রথমে পঞ্জাবের দৃঢ়কায়, বলিষ্ঠ ও সবল স্বভাব জাঠগণের মধ্যে প্রসারিত হয়। ক্রমে মুসলমানগণও এই ধর্মাবলম্বী হইয়া উঠে। নানক সুলক্ষণী নামে একটি কুমারীবা পাণিগ্রহণ করেন। সুলক্ষণীর গর্ভে শ্রীচন্দ্র ও লক্ষ্মীদাস নামে নানকের দুই পুত্র জন্মে। জ্যেষ্ঠ পুত্র শ্রীচন্দ্র উদাসীন সম্প্রদায়ের প্রবর্তক।

নানকের লিখিত আদিগ্রন্থে তদীয় মত সকল পরিব্যক্ত হইয়াছে। যাহাতে দেশ হইতে বাহ্য ক্রিয়াকলাপের অনুষ্ঠান ও জাত্যভিমানের উন্মূলন হয়, এবং যাহাতে দেশীয় লোকেবা পরম্পর জাত্যভাবে মিলিত হইয়া সুপরিশুদ্ধ ধর্ম ও সাধুস্বত্তি অবলম্বন করে, নানক তাহাব জন্ম সবিশেষ চেষ্টা কবেন। তাঁহার মতে মানাজাতিতে ও নানা সম্প্রদায়ে বিভক্ত হইয়া থাকা উচিত নহে, দেবালয়ে গিয়া যাগযজ্ঞ করা ও তদুপলক্ষে ব্রাহ্মণ ভোজন কবানও কর্তব্য নহে। ইন্দ্রিয় দমন ও চিত্ত-সংঘমই সর্বাপেক্ষা শ্রেয়স্কর।

আত্মশুদ্ধি নানকের মূলমন্ত্র। বিশুদ্ধ হৃদয়ে একমাত্র অদ্বিতীয় ঈশ্বরের উপাসনা করিলেই প্রকৃত ধর্মাচরণ করা হয়। তিনি কহিতেন, ঈশ্বর এক ভিন্ন বহু নহেন, এবং প্রকৃত বিশ্বাস এক ভিন্ন নানা নহে। তবে যে ভিন্ন ভিন্ন জাতির মধ্যে নানা প্রকার ধর্ম দেখিতে পাওয়া যায়, সে কেবল মনুষ্যের কল্পিত

মানক। ধর্ম, দয়া, বীরত্ব ও সংগৃহীত জ্ঞান বস্তুতঃ কিছুই নহে; যে জ্ঞান-বলে ঈশ্বরের তত্ত্ব অবগত হওয়া যায়, তাহাই লাভ করিতে চেষ্টা পাওয়া কর্তব্য। তাঁহার মতে ঈশ্বর এক, প্রভুর প্রভু ও সর্বশক্তিমান। সংকার্য ও সদাচারে সেই এক, প্রভুব প্রভু, ও সর্বশক্তিমান ঈশ্বরের আশীর্বাদ-ভাজন হওয়া যায়।

নানকের মতে সংসার-বিরাগ ও সন্ন্যাস-ধর্ম অনাবশ্যক। সাধু যোগী ও পবিত্রানিষ্ঠ গৃহী উভয়ই সর্বশক্তিমান ঈশ্বরের চক্ষে তুল্য। তিনি কহিতেন, বাঁহাব হৃদয় সং, তিনিই প্রকৃত হিন্দু এবং বাঁহার জীবন পবিত্র, তিনিই প্রকৃত মুসলমান। নানক যেরূপ পবিত্র ও উদার মত প্রকাশ করিয়াছেন, তাঁহার প্রবর্তিত উপাসনা-পদ্ধতি যেরূপ সকল সময়ে সকল স্থলেই অপরিবর্তনীয় হইয়া রহিয়াছে, তজ্জন্ম তিনি কখনও স্পর্ধা বা অহঙ্কার প্রকাশ করেন নাই। তিনি আপনাকে সর্বশক্তিমান ঈশ্বরের একজন দাস ও বিনয়ী আদেশ-বাহক বলিয়া নির্দেশ করিতেন। নিজের লিখিত ধর্মশাসন জ্ঞান ও পাণ্ডিত্যে পরিপূর্ণ হইলেও তিনি কখনও তাহার উল্লেখ করিয়া আত্মগরিমার বিস্তারে উন্মুখ হন নাই, এবং নিজের ধর্ম-প্রচাবে অসাধারণ ভাবে বিকাশ থাকিলেও কখনও তাহা অমানুষী ঘটনায় কলঙ্কিত কবেন নাই। তিনি কহিতেন, “ঈশ্বরের কথা ব্যতীত অন্য কোন অস্ত্রে যুদ্ধ করিও না। আপনাদের মতের পবিত্রতা ব্যতীত সাধু ধর্ম প্রচাবকগণের অন্য কোনও অবলম্বন নাই।”

গুরু মানক এইরূপে কালান্তর্বাগত ভ্রান্তির উচ্ছেদ করিয়া সাধারণকে উদার ও পবিত্র ধর্মে দীক্ষিত করেন। এইরূপে শিষ্যগণ তাঁহার নিষ্কলঙ্ক ধর্মপদ্ধতির উপর স্থাপিত হইয়া ধীবে ধীরে একটি নিষ্কলঙ্ক ধর্ম-পবায়ণ সম্প্রদায় হইয়া উঠে। “শিষ্য” শব্দের অপভ্রংশে “শিখ” নামের উৎপত্তি হয়। নানকের শিষ্য-

গণ অতঃপর সাধারণের নিকট এই “শিখ” নামেই পরিচিত হইয়া উঠে । কেহ কেহ নির্দেশ করেন, শিখা হইতে “শিখ” নামের উদ্ভব হইয়াছে । যে সকল পঞ্জাব-বাসীর মস্তকে শিখা আছে, তাহারাই “শিখ” ।

## হুর্গাবতী ।



ভারতবর্ষের মধ্যভাগে এলাহাবাদ হইতে প্রায় একশত কোশ দক্ষিণ পশ্চিমে গড়মগুল নামে একটি মহাপবাক্রান্ত রাজ্য ছিল । হিন্দুদিগেব বাজত্বকালে সোহাগপুৰ, ছত্রিশগড়, সন্তলপুৰ প্রভৃতি জনপদ লইয়া এই রাজ্য সংগঠিত হয় । সোহাগপুৰ বুন্দেলখণ্ডের অন্তর্গত । এই স্থানের অধিকাংশ অবন্যনীতে পবিত্র । প্রকৃতির অনুকূলতা বশতঃ ইহা ধন-সম্পত্তিতে পরিপূর্ণছিল । প্রথিত আছে, ভৌসলাবংশীয় নৃপতিগণ বলপূর্বক সোহাগপুৰেব বাজত্ব গ্রহণ কবিতেন । ছত্রিশগড় গোণ্ডবন প্রদেশেব অন্তঃপাতী । পূর্বে ইহা বড়পুৰ নামে প্রসিদ্ধ ছিল । সচরাচর ছত্রিশগড় জহব খণ্ড নামে অভিহিত হইয়া থাকে । এই ভূভাগেব কিয়দংশ অরণ্য ও পর্বত-মালায় সমাকীর্ণ ।

গড়মগুল রাজ্য মনোহর প্রাকৃতিক সৌন্দর্যে বিভূষিত । ইহার কোথাও লোকাকীর্ণ পল্লী, সুবন্দ্য জলাশয়, কমনীয় উপবন নেত্র-ভূষণকব গ্রামীনতার অপূর্ব শোভা বিকাশ কবিতেছে, কোথাও প্রসন্নসলিনা তবঙ্গিনী বৃক্ষ-সমাকীর্ণ বনভূমিব প্রান্ত-দেশে রক্ত-মালার স্ত্রাব পরিশোভিত হইতেছে ; কোথাও নবীন লতা-সমূহে সুদৃশ্য পুষ্প ও পল্লবে সজ্জিত হইয়া বাসন্তী লক্ষ্মীব মহিমা পবিবর্দ্ধিত কবিতেছে, কোথাও ভীমদর্শন পর্বত স্বাভাবিক গাঙ্গীর্যে পরিপূর্ণ হইয়া বিরাট পুরুষের ন্যায় দণ্ডায়মান

রহিয়াছে, এবং কোথাও প্রস্তবণ-সমূহ পরিকৃত সলিল প্রদান করিয়া অরণ্যেচর জীবগণের ভূষণ নিবারণ করিতেছে ! গড়মণ্ডলের রাজধানী সুপ্রসিদ্ধ গড় নগর সর্মদা নদীর দক্ষিণ-তীরে জব্বলপুরের প্রায় পাঁচ মাইল অন্তর্বে অবস্থিত ছিল। ইহা শৈলমালায় পবিবেষ্টিত থাকাতে শত্রুপক্ষের দুর্ভাগ্য বলিয়া প্রসিদ্ধ ছিল। যখন বাজগণ দিল্লীর সিংহাসন করায়ত্ত করিয়া চাবিদিকে আপনাদেব ক্ষমতা প্রদান করিতেছিলেন, ক্রমে ভারতবর্ষের অনেক রাজ্য তাঁহাদের অর্ধচন্দ্র-চিহ্নিত পতাকায় শোভিত হইতেছিল, কিন্তু কখনও গড়মণ্ডলে তাঁহাদের প্রতাপ প্রবিষ্ট হয় নাই। যখন ভূপতিগণের সৈন্তসাগরের প্রবল তরঙ্গ ভীষণ প্রাকৃতিক প্রাচীর অতিক্রম করিয়া গড়রাজ্য বিধ্বস্ত করিতে অসমর্থ হইয়াছিল। ষোড়শ শতাব্দীর মধ্যভাগে এই রাজ্যের দৈর্ঘ্য তিন শত মাইল ও বিস্তার একশত মাইল ছিল।

মোগলবংশীয় আকবর সাহ যখন দিল্লীর শাসন-দণ্ড গ্রহণ করেন, তখন চন্দন নামে মহাবা-রাজের কন্যা পাতিবিহীনা দুর্গাবতী গড় রাজ্যের অধিপত্নী ছিলেন। কথিত আছে, তৎকালে দুর্গাবতীর স্মায় রূপ-লাবণ্যবতী মহিলা ভারতবর্ষে কেহ ছিল না। দুর্গাবতীর কেবল নৌন্দর্য্য অসাধারণ ছিল না, তাঁহার প্রকৃতিও, অসাধারণ ছিল। দুর্গাবতী অবলা-হৃদয়ের অধিকাংশী হইয়াও তেজস্বিনী ছিলেন, এবং বাল্যকাল হইতে পব-বশে থাকিয়াও রাজ্য-শাসনের সমুদয় কৌশল শিক্ষা করিয়াছিলেন। তাঁহার সাধনা সর্মদা অপ্রতিহত থাকিত, এবং তাঁহার বিবেক-বুদ্ধি সর্মদা রাজ্যের মঙ্গল সম্পাদনে যত্ন প্রদর্শন করিত। লোকে রণভূমিতে তাঁহার ভয়ঙ্করী মূর্তি দেখিয়া ঘেরূপ ভীত হইত, আভ্যন্তরীণ প্রকৃতিতেও কোমলতা ও মৃদুতা দেখিয়া সেইরূপ প্রীতি অনুভব করিত। দুর্গাবতী তেজস্বিতা ও কোম-

লতা উভয়েরই অবলম্বন ছিলেন, উভয়ই তাঁহার হৃদয়কে সমুন্নত ও সমলঙ্কৃত করিয়াছিল।

আকবর সাহ বয়ঃপ্রাপ্ত হইলে বহরাম নামে তাঁহার প্রধান কার্যসচিবের হস্ত হইতে সাম্রাজ্যের শাসন-ভার গ্রহণপূর্বক অবাধ্য আমীর ও ভূস্বামিদিগকে শাসন করিবার জন্ত নানা-স্থানে সেনাপতি নিযুক্ত করেন। এই সেনাপতিদিগের মধ্যে আসফ খাঁ নামে একজন উদ্ধত-স্বভাব সৈনিক-প্রধান নর্শদা নদীর তটবর্তী প্রদেশ শাসনার্থ প্রেবিত হন। আসফ খাঁ গড়-মণ্ডলের সমৃদ্ধিব বিষয় অবগত ছিলেন, সুতরাং এই রাজ্য হস্তগত করিবার জন্ত তিনি সাতিশয আশ্রয়িত হইয়া উঠিলেন। আকবর সাহ স্বাধিকার সম্প্রসারিত করিতে পরাঙ্মুখ ছিলেন না; তিনি সেনাপতিকে গড় রাজ্য অধিকার-ভুক্ত করিতে উৎসাহিত করিতে লাগিলেন। সম্রাটের আদেশ ও উৎসাহে সাহসী হইয়া ১৫৬৪ খ্রীষ্টাব্দে আসফ ছয় সহস্র অশ্বাবোহী ও দ্বাদশ সহস্র পদাতি সমভিব্যাহারে গড়মণ্ডল আক্রমণার্থ যাত্রা করিলেন।

অবিলম্বে এই অভিধান-বার্তা গড়বাজ্যে ঘোষিত হইল। রাজ্যের বালক, বৃদ্ধ, বনিতা সকলেই এই আকস্মিক আক্রমণ সংবাদে ষার পর নাই ভীত হইয়া উঠিল। কিন্তু তেজস্বিনী দুর্গাবতী হৃদয়ে কিছুমাত্র ভীতির সঞ্চার বা কর্তব্য-বিমুখতার আভান লক্ষিত হইল না; তিনি অকুতোভরে, প্রগাঢ় সাহস সহকারে যুদ্ধের আয়োজন করিতে লাগিলেন। অচিরে সমর-সংক্রান্ত সভা সংগঠিত হইল, সৈন্যগণ যুদ্ধাভরণে সমলঙ্কৃত ও রণমুখে উন্নত হইয়া সমবেত হইতে লাগিল, বণপণ্ডিত সেনাপতিগণ একে একে আনিয়া অধিনায়কতা গ্রহণ করিতে লাগিলেন, অল্পসময়ের মধ্যেই গড়বাজ্যে বিশাল সৈন্য-সাগরের



আবির্ভাব হইল । দুর্গাবতীর বীৰবল্লভ নামে অষ্টাদশবর্ষ-বয়স্ক  
 একটি পুত্র-সন্তান ছিল, এই যুধকও অমিতবিক্রমে আসিয়া যুদ্ধ-  
 যাত্রীর দলে সন্মিলিত হইলেন । দুর্গাবতী এই নৈমা-সমষ্টির  
 শৃঙ্খলা বিধান করিয়াই নিশ্চিত থাকেন নাই । তিনি স্বয়ং যুদ্ধ-  
 বেশে সজ্জিত হইয়া শিবোদেশে রাজ-মুকুট, এক হস্তে শাণিত  
 শূল ও অপব হস্তে ধনুর্কাণ ধাবণপূর্বক গজপৃষ্ঠে আবোহণ কবি-  
 লেন । কামিনীর কোমল হৃদয় এক্ষণে স্বদেশের স্বাধীনতা,  
 স্ববংশের সম্মানরক্ষার্থ অটলতা ও অনগনীয়তার আশ্রয় হইল ।  
 দুর্গাবতী হস্তিপৃষ্ঠে আবোহণ করিয়া গম্ভীবোন্নতস্ববে স্বীয় নৈম-  
 দিগকে সম্বোধনপূর্বক কহিতে লাগিলেন,—“তোমাদের প্রতি  
 অদ্য একটি মহৎ কর্তব্য-ভার সমর্পিত হইতেছে, আমি আশা  
 কবি, তোমরা কখনও এই কর্তব্য সম্পাদনে উদাসীন হইবে  
 না । জীবন চিবস্থায়ি নহে, পার্থিব সুখ চিবস্থায়ি নহে,  
 এবং ভোগলালসাও চিবস্থায়িনী নহে । অতঃপাশ্চাত্য যে জীবন স্রোতঃ  
 খবতব বেগে প্রধাবিত হইতেছে, হযত কল্যই তাহা অনন্ত  
 সাগরে বিলীন হইবে, অতঃপাশ্চাত্য যে পার্থিব সুখ দেহের প্রতি-  
 গ্রহি অমৃতবনে অভিমিত্ত কবিত্তেছে, হযত কল্যই তাহা দুঃখেব  
 ভয়াবহ আক্রমণে বিলুপ্ত হইয়া যাইবে, এবং অদ্য সে ভোগ-লালসা  
 উদ্দাম মানবী প্রকৃতিকে দ্বিগুণ উৎসাহাধিত কবিয়া তুলিত্তেছে,  
 হযত কল্যই তাহা নিস্তেজ ও নিস্পভ হইয়া হৃদয়েব প্রতিস্তনে  
 নিদারুণ ভুযানলের সঞ্চাব করিবে । ঈদৃশ ক্ষণ-ভঙ্গু, ক্ষণস্থিতি-  
 শীল বিষয়েব সমতায আকৃষ্ট হইয়া অনন্ত সুখে জলাঞ্জলি দেওয়া  
 বিধেয় নহে । স্বদেশের স্বাধীনতা বক্ষা কবিত্তে প্রাণ পর্য্যন্ত  
 পণ কব, প্রাণপর্য্যন্ত পণ কবিয়া বিদেশী, বিধর্মী শত্রুকে স্বদেশ  
 হইতে দূবীভূত কবিত্তে সমুদ্যত হও । তোমাদের কবস্থিত  
 শাণিত অসি শত্রুবে দেহ দ্বিখণ্ড করুক, তোমাদের অধিষ্ঠিত

তেজস্বী তুরঙ্গম শত্রুর অনন্তপ্রবাহ শোণিত-স্রোতে সন্তরণ করুক, তোমাদেব পরাক্রম ও তোমাদেব রণপাবদর্শিতা বিজয়-পতাকায' জন্মভূমি শোণিত করুক । এই মহৎ কার্য সাধন করিতে যাইয়া মৃত্যুকে ভয় করিও না, সমরেব সংহার-মূর্তি দেখিয়া ভীত বা কর্তব্য-বিমুখ হইও না । সাহস, উদ্যম ও পবাক্রমেব সহিত সমব-ক্ষেত্রে অবতীর্ণ হও, পবলোকে অনন্ত সুখের অধিকারী হইবে ।” বীৰ-জায়ার এই তেজস্বিবাক্যে উৎসাহাশ্বিত হইয়া, গডমণ্ডলেব সৈন্যগণ “হব হর” ধ্বনিতে চতুর্দিক কম্পিত করিয়া যুদ্ধার্থ যাত্রা কবিল, তেজস্বিনী দুর্গাবতী এই উৎসাহাশ্বিত সৈন্যদলেব পবিচালন-ভাব গ্রহণ পূর্বক শত্রুসেনা বিধ্বস্ত করিতে যাইতে লাগিলেন ।

দুর্গাবতী যখন অষ্ট সহস্র অশ্ব, সার্কৈক সহস্র হস্তী ও সৈন্যদল সমভিব্যাহারে শত্রুগণেব সম্মুখীন হইলেন, তখন তাঁহার তদানীন্তন ভয়ঙ্করী মূর্তি দর্শনে যবন-সৈন্য সন্ত্রস্ত হইল এবং তাহাদের হৃদয়ে এক অভূতপূর্ব ভীতি সঞ্চারিত হইয়া স্বকার্যসাধনে বাধা দিতে লাগিল । দুর্গাবতী প্রবল পবাক্রমেব সহিত দুই-বার আসফ খাঁর সৈন্যদল আক্রমণ করিলেন, দুইবারই তাঁহার জয়লাভ হইল । যবন-সৈন্য বাণীর সেনাগণের অমিত বিক্রমে ক্ষণকাল মধ্যেই বিধ্বস্ত-প্রায় হইয়া পড়িল, তাহাদের ছয়শত অশ্বারোহীব দেহবদু সমবাক্ষণে বিলুপ্তিত হইতে লাগিল, শেষে শত্রুগণ বণস্থল পবিত্যাগপূর্বক পলায়ন-পব হইল । দুর্গাবতী দ্বিতীয়বার শত্রুসেনার পশ্চাদ্ধাবিত হইলেন । এইকপে সমস্ত দিন অতিবাহিত হইল । পবিশেষে সূর্য অস্তাচলশায়ী হইল দেখিয়া তিনি স্বীয় সৈন্যদিগকে বিশ্রাম কবিতে অনুমতি দিলেন ।

কিন্তু এই বিশ্রাম-সুখই তেজস্বিনী দুর্গাবতীর পক্ষে মহা

অমঙ্গলের নিদান হইয়া উঠিল । গড়মণ্ডল-বাসী সৈন্যগণ সেই সময়ে, সমস্ত রাত্রি বিশ্রাম করিবার জন্য লালায়িত হওয়াতে দুর্গাবতী সাতিশয ত্রিসমান হইলেন । কিয়ৎক্ষণ বিশ্রামের পর সেই রাত্রিতেই মুসলমান সেনা-নিবাস আক্রমণ করিবার তাঁহাব ইচ্ছা ছিল । তাঁহাব এই অভিপ্রায় কার্যে পরিণত হইলে আসফ খাঁর সৈন্যগণ নিঃসন্দেহ নিশ্চল হইত । কিন্তু বীর্যবতী বীর-জায়ার এই ইচ্ছা ফলবতী হইল না, সৈন্যগণেব সকলেই ঈদৃশ প্রস্তাবে অসম্মতি প্রদর্শন করিল, এবং সকলেই তাঁহাকে বিনয় সহকারে নিশীথে যবন-সৈন্য আক্রমণেব জন্য প্রস্তুত হইতে নিষেধ কবিত্তে লাগিল । দুর্গাবতী এই প্রার্থনায় সন্মত হইলেন । এদিকে আসফ খাঁ নিশ্চেষ্ট ছিলেন না, দুইবার যুদ্ধে পরাজিত হওয়াতে তিনি সাতিশয ব্যথিত হইয়াছিলেন, এক্ষণে গড়মণ্ডলের সৈন্যগণের প্রত্যাবর্তনের সংবাদে তিনি সাতিশয হর্ষোৎফুল্ল হইয়া কামান ও সৈন্যদল লইয়া তাহাদিগকে আক্রমণ করিতে যাত্রা করিলেন । প্রভাত না হইতে হইতেই তিনি নির্দিষ্ট স্থানে উপনীত হইলেন । গড়মণ্ডলবাসী সৈনিকগণ শান্তি-প্রদায়িনী নিদ্রাব ক্রোড়ে শান্তি-সুখ অনুভব কবিত্তেছিল, আসফ খাঁ সেই সুযোগে তাহাদিগকে আক্রমণ কবিলেন । অবিলম্বে দুর্গাবতীব সৈন্যগণ জাগবিত হইয়া অস্ত্র শস্ত্র গ্রহণ করিল, দুর্গাবতী এই আকস্মিক আক্রমণেও কিছুমাত্র ভীত বা কর্তব্য-বিমূঢ় হইলেন না । তিনি আপনাব সৈন্যদিগকে একত্রিত কবিয়া একটি সঙ্কীর্ণ গিরিসঙ্কট আশ্রয়পূর্বক শত্রুপক্ষের আক্রমণ প্রতিবোধ করিতে দণ্ডায়মান হইলেন । কিন্তু অবিচ্ছিন্ন গোলাবর্ষণে সে স্থানে অধিকক্ষণ থাকিতে পাবিলেন না, সঙ্কীর্ণ পথ পবিত্যাগপূর্বক একটি সুপ্রশস্ত যুদ্ধক্ষেত্রে অবতীর্ণ হইয়া শত্রুপক্ষের আক্রমণ নিরস্ত করিতে যত্ন করিতে লাগিলেন ।

এই প্রশস্ত সময়স্থলে উপস্থিত হইয়া কুমার বীরবল্লভ অসা-  
 ধারণ বিক্রম প্রকাশ কবিত্তে লাগিলেন । অষ্টাদশ বর্ষ-বয়স্ক  
 তরুণ বীর পুরুষের এই লোকাভীত পরাক্রম দর্শনে যবন-সৈন্য  
 স্তম্ভিত-প্রায় হইল । কিন্তু শেষে বহুসংখ্য যবনের আক্রমণে  
 বীরবল্লভ আহত হইয়া অশ্ব হইতে পতনোন্মুখ হইলেন । দুর্গা-  
 বতী প্রাণাধিক পুঞ্জের কাতবতা দর্শনে যুদ্ধ হইতে বিবত হই-  
 লেন না, প্রত্যুত পুঞ্জকে স্থানান্তরিত করিতে আদেশ দিয়া  
 পূর্বাপেক্ষা অধিক বিক্রমে বণ-কৌশল প্রদর্শন কবিত্তে লাগিলেন ।  
 এই সময়ে দুর্গাবতীর অধিকাংশ সৈন্য বীর-শয়্যায় শয়ন কবিয়া-  
 ছিল, অধিকাংশ সৈন্যের দেহবাশিতে সমবস্থল ভীষণতর হইয়া  
 উঠিয়াছিল, চারিদিকে যবন সৈন্য উদ্বেল সমুদ্রের ন্যায় বিশ্ব-  
 ত্রাস গর্জনে ক্রমে তাঁহার সম্মুখীন হইতেছিল, দুর্গাবতী কেবল  
 তিন শত মাত্র পদাতি লইয়া যুদ্ধ কবিত্তেছিলেন । এমন  
 সময়ে শত্রুনিষ্ক্রিষ্ট একটি স্মৃতিঙ্ক শায়ক হঠাৎ তাঁহার এক চক্ষে  
 বিদ্ধ হইল । দুর্গাবতী এই বাণ বলপূর্বক নেত্র হইতে নিঃসারিত  
 কবিত্তে চেষ্টা পাইলেন, কিন্তু তাঁহার সে চেষ্টা ফলবতী হইল না ।  
 শব নিঃসারিত না হইয়া চক্ষু-কোটবেই বিদ্ধ হইয়া রহিল । ইহাব  
 পর আর একটি তীর প্রবলবেগে তাঁহার গ্রীবাদেশে আসিয়া  
 পতিত হইল ; দুর্গাবতী এইরূপে পুনঃ পুনঃ শরাহত হইয়া  
 কাতব হইলেন, চারিদিক তাঁহার নিকট অন্ধকাবাচ্ছন্ন বোধ  
 হইতে লাগিল, তখন তিনি জয়াশায় জলাঞ্জলি দিলেন । যে  
 অভিপ্রায়ে তিনি সমরারূপে অবতীর্ণ হইয়াছিলেন, যে অভি-  
 প্রায় লক্ষ্য কবিয়া অমিত বিক্রমে যবন সৈন্য আক্রমণ কবিয়া-  
 ছিলেন, যে অভিপ্রায় অনুসারে সমর ক্ষেত্রে প্রাণপ্রিয় পুঞ্জ-সন্তানের  
 শোচনীয় দশাও অকাতবভাবে চাহিয়া দেখিয়াছিলেন, সে অভি-  
 প্রায়সিদ্ধির আর কোনও সম্ভাবনা রহিল না । কিন্তু দুর্গাবতী

ঈদৃশী অবস্থাতেও ভীকর ন্যায় সমর-ভূমি পবিত্যাগ করিয়া পলায়ন করিলেন না, ভীকর ন্যায় বীবধর্ম বিস্মৃত হইয়া শত্রুর পদানত হইলেন না। বীবাঙ্গণা বীব-ধর্ম বক্ষার্থে সমর ক্ষেত্রেই দেহপাত করিতে কৃতনিশ্চয় হইলেন। যখন আহত স্থান হইতে শোণিত-ধারা অনর্গলভাবে প্রবাহিত হইয়া তাঁহাব দেহ প্রাবিত করিল, শরীর স্তম্ভিত হইয়া আসিল, শাবীবিক তেজ ক্ষীণতব হইয়া পড়িল, তখন তিনি অজ্ঞান বদনে ও ধীবভাবে সমীপবর্তী একজন কর্মচারীর হস্ত হইতে বলপূর্বক স্মৃতীক্ল কববাল গ্রহণ করিলেন, এবং অজ্ঞানবদনে ও ধীবভাবে উহা স্বীয় দেহে প্রবেশিত করিয়া কধিবে বঞ্জিত করিয়া ফেলিলেন। মুহূর্ত্ত মধ্যে তাঁহাব লাবণ্যলীলা-ভূমি কমনীয় দেহ শব-সমাকীর্ণ যুদ্ধ-ক্ষেত্রে বিলুপ্ত হইতে লাগিল। ছয়জন সৈনিক পুরুষ দুর্গাবতীর সম্মুখভাগে দণ্ডায়মান ছিল, তাহাবা এই অসম সাহসিকতাব কার্য দর্শনে জীবনাণা পবিত্যাগপূর্বক তীব্রবেগে শত্রু-দল মধ্যে প্রবেশ করিল এবং বহুসংখ্য যবন-সৈন্য মৃত্যুমুখে পাতিত করিয়া স্বদেশেব স্বাধীনতাব জন্য অনন্ত নিদ্রায় অভিভূত হইল।

যে স্থানে দুর্গাবতী প্রাণ পবিত্যাগ কবেন, পর্যটকগণ অদ্যাপি পথ অতিবাহন সময়ে সেই স্থল নির্দেশ করিয়া থাকেন। ইহা একটা সঙ্কীর্ণ গিবি-সঙ্কট। ইহাব নিকটে দুটা অতি প্রকাণ্ড রক্তাকার প্রস্তব রহিয়াছে। সাধাবণের বিশ্বাস, দুর্গাবতীর বণ-দুন্দুভিধ্ব এক্ষণে প্রস্তবে পরিণত হইয়াছে। রাত্রি শেষে সমীপবর্তী অবণ্য-প্রদেশ হইতে এই দুন্দুভি-ধ্বনি শ্রুতি প্রবিষ্ট হইয়া থাকে। যাহাহউক, এই গিবিসঙ্কট একটা প্রধান ঐতিহাসিক ঘটনাব সহিত সংশ্লিষ্ট হওয়াতে দর্শনীয় স্থানের মধ্যে পরিগণিত হইয়াছে। এই গম্ভীর স্থানের গম্ভীর দৃশ্য অবলোকন

কবিলে মনে এক অনির্কচনীয় ভাবের সঞ্চারণ হইয়া থাকে । যখন সেনাগণ গড় নগর বিলুপ্ত করিয়া অনেক অর্থ পাইয়াছিল । আসফ খাঁ বিশ্বাসঘাতক হইয়া অনেক সম্পত্তি আত্মসাৎ কবেন, কথিত আছে তিনি দুর্গাবতীর ধনাগারে এক শতটি স্বর্ণ মুদ্রা-পরিপূর্ণ কলস প্রাপ্ত হইয়াছিলেন । অদ্যাপি স্মৃতগণ দুর্গাবতীর অক্ষয় কীর্তি-কাহিনী গীতিকায় নিবদ্ধ কবিয়া সুমধুর বীণা সংযোগে নানা স্থানে গান করিয়া বেড়াইয়াছে । কালের আক্রমণে গড় রাজ্য এক্ষণে পূর্বগৌরবভ্রষ্ট হইয়াছে বটে, কিন্তু তেজস্বিনী দুর্গাবতীর গৌরব কখনও বিলুপ্ত হইবাব নহে । যত দিন স্বাধীনতাব সম্মান বর্তমান রহিবে, যত দিন অতুলনীয় বীৰত্ব অদীনপবাক্রম বীবেশ্ব-সমাজের এক মাত্র সম্পত্তি বলিয়া পরিগণিত হইবে, যতদিন “ জননী জন্মভূমি চ স্বর্গাদপি গবীযসী ” এই পবিত্র ও মধুর বাক্য স্বদেশ-বৎসল ব্যক্তির কোমল হৃদয় অচিন্ত্যপূর্ব অমৃত-প্রবাহে অভিষিক্ত করিবে, এবং যত দিন আত্মাদর ও আত্ম-সম্মান পাপ ও কুপ্ররুতিব মোহিনী মায়ায় বিমুক্ত না হইয়া গগনস্পর্শী গিরিবরের ন্যায় সমুন্নত থাকিবে, ততদিন দুর্গাবতীর অনন্ত কীর্তি-কাহিনী স্বদেশ হিতৈষী কবির রসময়ী কবিতায় এবং অপক্ষপাত ঐতিহাসিকেব সাবল্যময়ী বর্ণনায় বিঘোষিত হইবে, ততদিন দুর্গাবতীর অনন্ত কীর্তি-স্তম্ভ মেদিনীমণ্ডলে জ্বলন্তমান রহিবে । হিমালয়েব অমৃত শৃঙ্গপাতেও ইহা বিচূর্ণ হইবে না, এবং ভারত-মহাসাগরের সমগ্র বারিতেও ইহা বিলুপ্ত হইবে না ।

---

## বড়বাগ্নি ।

বিজ্ঞানের গবীষনী শক্তির প্রভাবে প্রতিদিন যে কত শত নিগূঢ় তত্ত্বের আবিষ্কার হইতেছে, তাহাব ইয়ত্তা করা যায় না । পূর্বে যাহা কেবল কল্পনা-সম্ভূত বলিয়া বোধ ছিল, এক্ষণে তাহা বিজ্ঞানের প্রসাদে প্রত্যক্ষীভূত প্রাকৃতিক পদার্থ বলিয়া পবিগণিত হইতেছে, এস্থলে যে অগ্নির বিষয় বিবৃত হইতেছে, তাহাতেও এইরূপ কল্পনা ও বিজ্ঞানের চাতুর্য লক্ষিত হইবে ।

বাৰি-বাগ্নির মধ্যে যে অগ্নি উদ্দীপ্ত হয়, ইহা আমাদের দেশের অনেকেই অবগত আছেন । এই অগ্নি বড়বাগ্নি অথবা বডবানল নামে প্রসিদ্ধ । মহাভাবতে এই নামের উৎপত্তি সম্বন্ধে একটি উপন্যাস বর্ণিত আছে । মহাবাজ কুতবীর্য্যেব বংশীয় বাজগণ প্রযোজন বশতঃ অতি সমৃদ্ধিশালী ভৃগু-বংশীয়েব নিকট অর্ধ প্রার্থনা করাতে ভার্গবেরা সেই প্রার্থনা অগ্রাহ্য কবেন । এতন্নিবন্ধন ক্ষত্রিয় বাজাবা অমর্ষ-প্রদীপ্ত হইয়া ভার্গব দিগকে বিনষ্ট করেন । ভৃগু-বংশীয মহিলাগণ এই আকস্মিক বিপদে ভীত হইয়া হিমালয় পর্বতে যাইয়া লুকাষিত হন । ইহা-দেব অন্যতমা মহিলার ঔর্য্য নামে একটি পুত্র-সন্তান ভূমিষ্ঠ হয় । ঔর্য্য ঋষি ক্ষত্রিয়দিগেব অত্যাচাব ও স্ববংশীয়েব সংহাব-বার্ত্তা শ্রবণ পূর্বক ক্রোধে অধীর হইয়া সর্বলোক ধ্বংস কবিবার জন্য কঠোর তপস্যায় প্রবৃত্ত হন, কিন্তু পিতৃলোক এই সংহার-কার্য্যের অনুষ্ঠান কবিতে নিষেধ করাতে ঔর্য্য তাঁহাদেব আদেশক্রমে স্বীয় ক্রোধজ বহ্নি সমুদ্রে নিক্ষেপ কবেন । ইহাতে হঠাৎ একটি বৃহদাকার অশ্বের মস্তক উৎপন্ন হয়, এবং সেই অশ্ব-মুখ হইতে ঔর্য্য-প্রস্ফিণ্ড বহ্নি নির্গত হইয়া সমুদ্রের জল শোষণ

কবিত্তে আরম্ভ করে । বড়বার ( ঘোটকীর ) মুখ হইতে নিঃসৃত হওয়াতে এই বহি বড়বাগি অথবা বড়বানল নামে প্রসিদ্ধ হইয়াছে । এই আখ্যায়িকার সহিত বৈজ্ঞানিক তত্ত্বেব কোনও সংশ্ৰব নাই । ইহা পূৰ্ব্বতন ভারতীয় ঋষির কল্পনা হইতে উদ্ভূত হইয়াছে ।

বৈজ্ঞানিকদিগেব মধ্যে এই বড়বাগির সম্বন্ধে অনেক মত-ভেদ দৃষ্ট হয । মেঘাব নামে একজন প্রসিদ্ধ জ্যোতির্বেত্তা এতৎ-প্রসঙ্গে লিখিয়াছেন, প্রথর আতপ-তপ্ত হীরক প্রভৃতি স্বচ্ছ পদার্থ যে কারণে অন্ধকারময় গৃহে অগ্নিকণা বিকীরণ কবে, সেই কাবণে সাগরেব বাবি-রাশি হইতেও পাবকশিখা উদ্গাত হইয়া থাকে । দিবাভাগে সমুদ্রেব জল অবিবত সূর্য্য-কিবণ আকর্ষণ কবে, বাত্রিকালে এই আকৃষ্ট কিবণ পাবক শিখারূপে প্রতিভাত হইয়া উঠে । অন্যান্য বৈজ্ঞানিকেব মতে সমুদ্রেব জল ফস্ফবসু নামে বাসায়নিক বস্তু-বিশেষের ধর্ম-বিশিষ্ট, এজন্য বায়ুসংযোগে তাহা হইতে আলোক-শিখা নির্গত হয় । অন্য এক সম্প্রদায় নির্দেশ কবেন, বিভিন্ন তড়িদ্বিশিষ্ট মেঘখণ্ড-দ্বয়েব সংঘাতে যেরূপ তড়িল্পতাব উৎপত্তি হয, সাগবেব উর্শ্মিমালার সংঘর্ষণেও সেইরূপ তড়িতপ্রবাহ নিঃসৃত হইয়া থাকে, এই তড়িৎ-প্রবাহ বড়বানল নামে প্রসিদ্ধ । এই তড়িৎ সমুদ্রেব সলিলবাশিতে নিযত অবস্থিতি কবে, না অন্য কোন স্থান হইতে সমাগত হয়, পূৰ্ব্বোক্ত বৈজ্ঞানিকগণ তাহাব কোন মীমাংসা কবেন নাই । কিন্তু এই সকল বৈজ্ঞানিকেব মতেব প্রতি এক্ষণে কাহাবও কিছু-মাত্র শ্রদ্ধা দেখা যায় না । এগুলি জাস্তিপূর্ণ বলিয়া প্রতিপন্ন হইয়াছে ।

আধুনিক বৈজ্ঞানিকদিগেব গবেষণা কেবল সৈন্ধব সলিলেই নিবদ্ধ থাকে নাই । এই বিজ্ঞানবিদগণ সামুদ্রিক কীট বিশেষ



পরীক্ষা করিয়া বড়বামশের প্রকৃত কারণ নির্ণয় করিয়াছেন। বিখ্যাত চিকিৎসক ডাক্তার মেক্‌কালক্ বারবার পরীক্ষা করিয়া স্পষ্টরূপে প্রমাণ করিয়াছেন যে, সমুদ্র-সলিলে যে সকল প্রাণী বাস করে, তাহাদেব গলিত শব হইতে বড়বাগির উৎপত্তি হইয়া থাকে। সমুদ্রের জল সাধারণতঃ নীলবর্ণ, কঁদম, শৈবাল ও কীটগু প্রভৃতিব সংযোগে সময়ে সময়ে উহা শুভ্র ও হরিদ্বর্ণ হইয়া থাকে। শুভ্র ও হরিদ্বর্ণ জল-বাশিতে বড়বাগির আধিক্য দৃষ্ট হয়। অধিকন্তু সাগর-বারি যতই দুগ্ধবৎ শ্বেতবর্ণ হয়, বড়বাগি ততই চাষিদ্ভিকে প্রসারিত হইয়া উঠে।

কিন্তু কেবল সামুদ্রিক মৃত জীবের দেহ হইতে এই আলোকের উদ্ভব হয় না, সময়ে সময়ে সজীব প্রাণীর শরীর হইতেও ইহার উৎপত্তি হইয়া থাকে। ডাক্তার বুকানন ইহার একটা উৎকৃষ্ট উদাহরণ প্রদর্শন করিয়াছেন। তিনি লিখিয়াছেন, “আমরা একদা অর্ণবধান আরোহণে ভাবত মহাসাগরের উত্তরাংশে যাইতে যাইতে দেখিলাম, বাবি-রাশি অপূর্ণ শ্বেতবর্ণ হইয়াছে। আকাশ পবিচ্ছন্ন ও উজ্জ্বল নীলাভ, কেবল অদূরে কিয়দংশ ক্রমবর্ণ দৃষ্ট হইতেছিল। সামংকাল হইতে বাত্রি আট ঘটিকা পর্য্যন্ত সাগর-সলিলেব শুভ্রতা ক্রমেই বর্ধিত হইতে লাগিল, আটটা হইতে দুই প্রহর পর্য্যন্ত উহা এরূপ সুপবিচ্ছৃত শ্বেতবর্ণ হইয়া উঠিল যে, সাগর-তলেব সহিত ছায়াপথের তুলনা করা অসম্ভব বোধ হইল না। অধিকন্তু ছায়াপথে যেমন সমুদ্রল তারকা দৃষ্ট হয়, সমুদ্রের দুগ্ধবর্ণ বারি-রাশিতেও সেইরূপ অনলকণা দৃষ্টি-পথবর্তী হইল। বাত্রি দুই প্রহরের পর হইতে এই আলোক-শিখা ক্রমে হ্রাস হইতে লাগিল, পরে উষাকালে ইহা একবারে অন্তর্হিত হইয়া গেল। এই কিরণ-জালে অর্ণব-

পোতের উপরিভাগ এরূপ আলোকিত হইয়া উঠিয়াছিল যে, পোতস্থ দ্রব্যাদি সুস্পষ্ট নয়নগোচর হইয়াছিল ।”

বুকানন এই বিস্ময়কর ব্যাপাবের কারণ নির্ণয়ার্থ সেই সমুদ্রের কয়েক পাত্র জল উত্তোলন করিয়া পরীক্ষা করেন । তাহাতে জল-মধ্যে যবোদরের এক ষোড়শাংশ-পরিমিত কতক-গুলি দীপ্তিশীল কীটগু দৃষ্ট হয় । সাধারণ কীটগু সকল জলে যে ভাবে সম্ভবণ করে, এগুলিও সেই ভাবে বেড়াইতে ছিল । বুকানন কয়েকটি কীটগু অঙ্গুলির অগ্রভাগে স্থাপন করিয়া দেখেন, তাহা হইতে আলোক-শিখা নির্গত হইতেছে । উহা প্রদীপের নিকট ধ্বাতে ঐ আলোক অন্তর্হিত হইয়া গেল । সাড়ে তিন সেব জলে প্রায় চাবি শত কীটগু দৃষ্ট হইয়াছিল, অথচ উহাতে জলের স্বাভাবিক বর্ণের কোনও ব্যত্যয় নাই । বেনেট নামে একজন-সমুদ্র-যাত্রীর লিখিত বিবরণ মধ্যেও এই রূপ সৈন্ধব আলোকের বিষয় পবিদৃষ্ট হয় । ইনি লিখিয়াছেন, “আমি একদা হরণ অন্তবীপের নিকটে বাত্রিকালে পোতারোহণে বিচরণ করিতে ছিলাম, বায়ু নিস্তক ও চারিদিক অন্ধকারে সমাচ্ছন্ন ছিল । হঠাৎ দেখিলাম, সাগর-গর্ভ হইতে আলোক-শিখা সমূহ অন্ধকার ভেদ করিয়া উথিত হইতেছে । নির্ঝাত সাগরের জল-বাণি নিশ্চল থাকাতে এই আলোক প্রথমে ক্ষীণ-প্রভ ছিল, কিন্তু পোতের গতি নিবন্ধন জল তরঙ্গায়িত হওয়াতে এই বহি-শিখা একপ দীপ্তিশালিনী হইল যে, সমস্ত অর্ণবযান আলোকমালায় সমুজ্জ্বল হইয়া উঠিল । যানের এক পার্শ্বে এক খানি জাল আকর্ষণ কবাতে বোধ হইল যেন ধূমকেতুব ন্যায় পুচ্ছবিশিষ্ট একটি অগ্নি-পিণ্ড সবেগে গমন করিতেছে । মৎস্ত-সমূহের উল্লঙ্ঘনে বোধ হইল, তরঙ্গায়িত সাগর-বারিতে সমুজ্জ্বল বহিবৈখা অঙ্কিত হইতেছে ।

বেনেট সাহেব পরীক্ষা করিয়া দেখিয়াছেন, এক প্রকার চাঁদা মৎস্য হইতে এই আলোক-শিখা নির্গত হইয়াছিল, এই মৎস্যের আকার গোল, বর্ণ তবলপীত এবং পবিধি প্রায় আট ইঞ্চি। ইহার দেহেব পূর্কোক্ত ভাগেব এক পাশ্বে এক খণ্ড অধিমাংস আছে, এবং কণ্টক-বিশিষ্ট পক্ষ এই অধিমাংসেব সহিত সংযোজিত রহিয়াছে। উত্তেজিত হইলেই মৎস্য-সমূহ সর্কণ্টক পক্ষ-বিশিষ্ট অধিমাংস ঘন ঘন কম্পিত করে, এই কম্পনে উহা হইতে আলোক নির্গত হয়। মৎস্য যতই প্রশান্ত ভাব অবলম্বন করে, আলোক-শিখা ততই মন্দীভূত হইতে থাকে। অধিকন্তু এই মৎস্যেব শবীবে নির্যাসবৎ এক প্রকার পদার্থ আছে, উহা জলের সহিত মিশ্রিত হইলেও আলোকের উৎপত্তি হয়। বেনেট এই জাতীয় কয়েকটি মৎস্য পরিক্ষাব জলে ধৌত করিয়া দেখিয়াছেন যে, ঐ জলেব আলোক-বিকীৰণ শক্তি জন্মিয়াছে। বেনেটের পরীক্ষা-বলে এই চাঁদা মৎস্য ব্যতীত আৰও কয়েক প্রকার আলোক-প্রদ ক্ষুদ্র মৎস্য সাধাবণেব পবিজ্ঞাত হইয়াছে। এই সকল মৎস্যেব দেহের সাধাবণ বর্ণ ইল্মাতেব বর্ণের ন্যায়; কেবল শক ও পক্ষ পাংশুবর্ণ, দেহের নিম্নভাগে একশ্রেণী অনতি-গভীর বন্ধু আছে। এই মৎস্য জলপূর্ণ পাত্রে ছাড়িয়া দিলে মহোল্লাসে সন্তবণ করিতে লাগিল, উহাব দেহ-স্থিত বন্ধু-সমূহ হইতে নক্ষত্র-জ্যোতির ন্যায় কখন স্তিমিত, কখন দীপ্তিশীল আলোক নিঃসৃত হইল। ইহাব পব ধবিবার জন্য হস্ত প্রসারণ কবাতে যখন উহা সমুত্তেজিত হইয়া সবেগে সন্তবণ করিতে লাগিল, তখন কেবল পূর্কোক্ত বন্ধু সমূহ হইতে আলোক বিকীর্ণ হইল না, প্রত্যুত দেহেব সমস্ত অংশ হইতেই উজ্জ্বল বহ্নি-শিখা নির্গত হইয়া জল আলোকিত করিয়া তুলিল, মৎস্য গত্ৰাসু হইলে বহ্নি-শিখা একবারে অন্তর্হিত হইয়া গেল।

এইরূপে ইদানীন্তন বৈজ্ঞানিকদিগের গবেষণা-বলে স্থির হইয়াছে যে, জীবিত ও মৃত মৎস্যের দেহ হইতে এবং মৎস্যের দেহ-নিঃসৃত নির্ধাসবৎ পদার্থ বিশেষ জলে মিশ্রিত হওয়াতে বড়বাগ্গিব উৎপত্তি হইয়া থাকে । এই অগ্নি সকল সময়ে সমান রূপ পরিদৃষ্ট হয় না । কখন ইহা তড়িৎতার ন্যায় চঞ্চল, কখন বা অনতিপবিস্কূট নিকম্প দীপ-শিখার ন্যায় হীনপ্রভ দেখা যায় । সময়ে সময়ে এই অগ্নি সাগরের বিশাল দেহে পরিব্যাপ্ত হইয়া চারিদিক আলোকিত করে ; সময়ে সময়ে বা ইতস্ততঃ বিক্ষিপ্ত স্কুলিঙ্গ-পটলের ন্যায় উখিত হইয়া, কখন স্তিমিত, কখন উজ্জ্বল, কখন বা নির্ধাপিত হইতে থাকে । এই অগ্নি সাধা-বণ অগ্নিব তুল্যবর্ণ নহে । ইহা দৈর্ঘ্য নীলাভ ও তরল পীতবর্ণ । গন্ধকোৎপন্ন বহ্নিশিখার সহিত ইহার সাদৃশ্য লক্ষিত হয় । সমুদ্রচারিগণ বহুদূর হইতে এই অগ্নি দেখিতে পায় । প্রবল বায়ুপ্রবাহে জলধিতল সমুদ্রত তরঙ্গমালায় আচ্ছন্ন হইলে ইহা অগ্নিময় গিরিশৃঙ্গের ন্যায় প্রতীয়মান হইয়া থাকে ।



## স্ত্রীসেনা।

স্বাধীন রাজ্য-সমূহে সৈন্যগণ ষে রূপ নানা দলে বিভক্ত থাকে, শ্যাম দেশের সেনা সকলও সেইরূপ নানা সম্প্রদায়ে বিভক্ত আছে। তন্মধ্যে একতম সম্প্রদায় কেবল স্ত্রীজাতিতে সংগঠিত হইয়া থাকে। এই স্ত্রী সৈনিক দলের সংখ্যা চারিশতের অধিক নহে। অন্যান্য সেনাগণ অপেক্ষা স্ত্রীসেনাগণ রাজ্য মধ্যে সমধিক আদৃত হন, ইঁহারা সর্বাপেক্ষা অধিক বেতন গ্রহণ করেন এবং সর্বাপেক্ষা উৎকৃষ্ট অস্ত্র শস্ত্রে সজ্জিত হইয়া থাকেন। সৎকুলোদ্ভব রূপযৌবনসম্পন্ন ত্রয়োদশবর্ষীয় কামিনীগণ এই সৈনিক দলে প্রবেশ করেন। পঞ্চবিংশতি বর্ষকাল ইঁহাদিগকে সৈনিক কার্যে নিয়োজিত থাকিতে হয়। রাজ-দেহ, বাজ-উদ্যান ও বাজ-অট্টালিকা প্রভৃতি বক্ষা করাই ইঁহাদের প্রধান কর্তব্য কর্ম।

এই স্ত্রীসেনাগণেব সকলেই অবিবাহিতা থাকিতে প্রতিশ্রুত হন। কেবল বাজাব সম্মতি হইলেই ইঁহারা এই প্রতিশ্রুতি লঙ্ঘন করিতে পারেন। এই দলস্থ পদাতিক সেনা সাতিশয় সাহস-সম্পন্ন এবং যুদ্ধ বিদ্যায় অতীব পাবদর্শিনী। ইঁহারা সুবর্ণ-খচিত গুরুবর্ণ বনাত-নির্মিত এক প্রকার অঙ্গাচ্ছাদন পরিধান করিয়া তদুপরি সুবর্ণ মণ্ডিত লৌহময় বর্ম ধারণ করেন। উক্ত বনাত-নির্মিত অঙ্গাচ্ছাদন আজানুলব্ধিত থাকে। এক প্রকার ধাতু নির্মিত শিবস্ত্রাণ এই সৈনিকদিগের প্রধান শিবোভূষণ, বল্লম ইঁহাদের প্রধান অস্ত্র; এতদ্ব্যতীত বন্দুক ও অগ্নি প্রভৃতিব প্রয়োগেও ইঁহারা নবিশেষ নৈপুণ্য প্রদর্শন করিয়া থাকেন।

প্রস্তাবিত স্ত্রীসেনাগণ চারি দলে বিভক্ত । প্রতি দলের এক এক জন কর্তী থাকেন । সর্বোপরি এক জন প্রধান অধিনায়িকা আছেন । চারি দলের নৈনিকদিগকেই তাঁহাব শাসনাধীনে থাকিতে হয় । এই প্রধান অধিনায়িকার পদ শূন্য হইলে দেশাধিপতি উপযুক্তপরি তিন দিন দলস্থ সমস্ত সেনার অঙ্গচালন ও বণ-পাণ্ডিত্যের পরীক্ষা করিয়া ঝাঁহাকে সর্বশ্রেষ্ঠা জ্ঞান করেন, তাঁহাকেই ঐ পদে নিয়োজিত করিয়া থাকেন । কতিপয় বৎসর হইল, এই স্ত্রীসৈনিক-দলের এক জনে মুগয়া-নামে রাজাকে ব্যাহ্রহস্ত হইতে বক্ষা করিয়া ছিলেন বলিয়া সর্ব প্রধান অধিনায়িকার পদ প্রাপ্ত হইয়াছিলেন ।

নৈনিক-প্রধানার পবিচর্যাব নিমিত্ত দশটি সুসজ্জিত হস্তী নিযুক্ত থাকে । শ্যাম দেশাধিপতির পুত্র ও কন্যাগণ যেরূপ সম্মান প্রাপ্ত হন, যেরূপ অঙ্গা ও প্রীতির অধিকারী হইয়া সুখে কালাতিপাত করেন, সর্ব প্রধান অধিনায়িকাও বাজ্য মধ্যে সেইরূপ সম্মান প্রাপ্ত হন, এবং সেইরূপ আদর ও প্রীতির অধিকারিণী হইয়া পবন সুখে কর্তব্য কর্ম সম্পাদন করেন । এ অংশে রাজপরিবারের সহিত তাঁহাব কিছু মাত্র বৈলক্ষণ্য লক্ষিত হয় না । অপরাপর নৈনিকগণের প্রত্যেকের শুশ্রূষাব জন্য পাঁচ জন কাফি-ললনা নিয়োজিত আছে ।

প্রস্তাবিত সেনাগণ প্রতি সপ্তাহে দুই দিন এক প্রশস্ত সমব-ক্ষেত্রে সমবেত হইয়া অস্ত্র বিদ্যা শিক্ষা করেন । বাজা এই শিক্ষাকার্য্যের তত্ত্বাবধারণার্থ প্রতিমাসে একবার সেই শিক্ষা-ক্ষেত্রে উপস্থিত হইয়া সকলের অস্ত্র-চালনা-কৌশল পরিদর্শন করিয়া থাকেন, ঝাঁহাবা অস্ত্র প্রয়োগে সমধিক নৈপুণ্য ও সাময়িক কার্য্যে সমধিক পাণ্ডিত্য প্রদর্শন করিতে পাবেন, তাঁহাদিগকে পারিতোষিক স্বরূপ স্বর্ণময় বলয় কঙ্কণাদি প্রদত্ত

হইয়া থাকে । ইহাদের মধ্যে আজকলহ উপস্থিত হইলে ইহারা প্রধানাব অনুমতি লইয়া সমর-ক্ষেত্রে আগমন পূর্বক পরস্পর যুদ্ধে প্ররুত হন, এই যুদ্ধে এক এক জনের প্রাণ বিনষ্টও হইয়া থাকে । কিন্তু এই রমণীগণ একপ শুদ্ধাচারিণী, কর্তব্য-নিষ্ঠা ও রণনৈপুণ্যের সহিত একপ চরিত্র-শুণ ইহাদিগকে সগলঙ্কত কবিয়া বাখিয়াছে যে, ইহাবা প্রায়ই কলহকারিণী অথবা কোন গুরুতর অপরাধে অপরাধিনী বলিয়া অভিযুক্ত হন না । ঘটনা-ক্রমে কেহ কোন সামান্য অপরাধ করিলে তাঁহাকে তিন মাসের জন্য পদচ্যুত রাখাই সাধাবণ দণ্ডের মধ্যে পবিগণিত । ইহা অপেক্ষা আর কখনও কোন গুরুতর দণ্ড বিধানের আবশ্যকতা উপস্থিত হয় না ।

এইরূপে শ্যামদেশের বীর্যবতী ও রণপাবদর্শিনী রমণীগণ কর্তব্য-নিষ্ঠা, সদাচার ও সাময়িক কার্য-নৈপুণ্যে বাজ্য মধ্যে সম্মান, আদর ও প্রীতির পাত্রী হইয়া মহতী দেবতা স্বরূপ রাজার শবীৰ রক্ষা পূর্বক অক্ষয় পুণ্যও কীর্ত্তি সঞ্চয় কবেন । সাময়িক ঘটনাবলী ইহাদের গুণোৎকীৰ্ত্তনে কাতন হয় না, এবং সহস্রর ঐতিহাসিকেব তেজস্বিনী লেখনীও ইহাদেব নিষ্কলঙ্ক যশোরশিকে সনুজ্জ্বল কবিতে ওদাসীন্য অবলম্বন করে না ।



## অদ্ভুত সামুদ্রিক জীব ।

সমুদ্র মধ্যে যে কত প্রকার আশ্চর্য্য জীবের বাস আছে, তাহা বৈজ্ঞানিক পাণ্ডিতগণ অদ্যাপি সূক্ষ্মরূপে নির্ণয় কবিতে পারেন নাই । বিশাল লাগবের গর্ভে অসংখ্য জীব-সমষ্টি অবস্থিতি করিতেছে । সমুদ্রযাত্রিগণ এক এক সময়ে এই প্রাণিগণের শ্রেণীবিশেষ সন্দর্শন করিয়া জাতিশয় বিস্ময় প্রকাশ কবিয়াছেন, এবং এক এক সময়ে অদ্ভুতপূর্ব ভবে বিমুক্ত-প্রায় হইয়াছেন । ইহারা লোকের হৃদয় আকর্ষণ করিবাব জন্য এই সকল জীবের বর্ণনা কল্পনায় অতিরঞ্জিত কবিয়া সাধারণ্যে প্রকাশ করিতে ক্রটি করেন নাই । এই সকল অতিশয়োক্তিতে কাহারও বিশ্বাস বা আস্থা জন্মিতে পাবে না । যাহাহউক সমুদ্রগর্ভে যে অনেক অদ্ভুত প্রাণিব আবাস স্থল, তদ্বিষয়ে কাহারও মতদ্বৈধ নাই । এস্থলে কয়েকটি অদ্ভুত সামুদ্রিক জীবের বিষয় বর্ণনা করা যাইতেছে ।

কাপ্তেন উইডেল নামে একজন বিখ্যাত ভূগোলবিৎ এসম্বন্ধে যে বিবরণ লিপিবদ্ধ করিয়াছেন, তাহাতে একটি অদ্ভুত সমুদ্র-জীবের বিষয় দৃষ্ট হয় । এই বিবরণের স্থল বিশেষ বদিও কল্পনা ও আন্তিজালে আচ্ছন্ন হইয়াছে, তথাপি তাহাতে এরূপ বিস্ময়কর মত্য বর্তমান রহিয়াছে যে, তৎপাঠে চমৎকৃত হইতে হয় । উইডেল লিখিয়াছেন, “একজন নাবিক হলন্দীপে নৌবাহন কার্যে নিযুক্ত ছিল । একদা একটি প্রাণী তাহাব দৃষ্টিগোচর হয়, এই প্রাণীব স্বব যন্ত্রধ্বনিব ন্যায় প্রতীত হইয়াছিল । নাবিক বাত্রি দশটার সময় প্রথমে মানবের কণ্ঠ-ধ্বনির ন্যায় শব্দ শুনিতে পাইল । সে সময় ও যে স্থানেব বিষয় এস্থলে বর্ণিত হইতেছে, সে সময়ে ও সে স্থানে দিবালোক প্রায় তিরোহিত হয় না ।



চাবিদিক পরিষ্কার ছিল । ধ্বনি শ্রুতি-বিবরে প্রবিষ্ট হওয়া মাত্র নাবিক শয্যা হইতে গাত্রোথান কবিয়া চাবিদিক নিরীক্ষণ কবিল ; কিন্তু কিছুই দৃষ্টিগোচর না হওয়াতে আপনার শয্যাস প্রত্যাবর্তন করিল, পুনর্বার সেই শব্দ গনুণিত হইল , নাবিক পুনর্বার গাত্রোথান কবিল, কিন্তু এবাবেও কিছুই তাহাব নয়ন গোচর হইল না । নাবিক সাগরের সিকতাময় প্রদেশে অবতরণ কবিয়া পাদ চাবণা কবিত্তে লাগিল, এবাব সেই স্বব অধিকতর স্পষ্টরূপে যন্ত্রধ্বনির শ্রাব তাহাব শ্রুতিপথবন্তী হইল । ইহা শুনিয়া সে ইতস্ততঃ অনুসন্ধান পূর্বক দেখিল, সাগর হইতে কিছু দূবে প্রস্তব ঋণ্ডেব উপর কোন পদার্থ বহিয়াছে । ইহা দেখিয়া প্রথমে সে কিছু ভীত হইল, দৃশ্যমান জীবের মুখ ও পৃষ্ঠদেশ মনুষ্যের মুখ ও পৃষ্ঠেব শ্রাব ; পৃষ্ঠে হবিঘর্ন কেশরাশি বিলম্বিত ছিল । পুচ্ছেব আকার সীল মৎস্যের পুচ্ছ সদৃশ । এই অদৃষ্টের জীব ক্রমাগত যন্ত্রধ্বনিব শ্রাব শব্দ কবিত্তেছিল । নাবিক দর্শনমাত্র স্থিবভাবে দুই মিনিট কাল তৎপ্রতি দৃষ্টিপাত কবিয়া বহিল । দুই মিনিট পবে ইহা বিশাল সাগরের বাবি বাশির গর্ভে বিলীন হইয়া গেল । এই অদৃষ্টপূর্ব প্রাণী দেখিমা- মাত্র নাবিক তাহার উদ্ধতম কর্মচাবীকে জানাইল, এবং পরি- দৃষ্ট ঘটনাব যথার্থ্য প্রতিপাদনার্থ সৈকত ভূগিতে পবিত্র ক্রুশ অঙ্কিত কবিয়া বাবশাব তাহা চুষন পূর্বক শপথ কবিত্তে লাগিল । এই নাবিক আমার সমক্ষে একপ দৃঢ়তার সহিত শপথ কবিয়া ,এই ঘটনাব বর্ণনা কবিয়াছিল যে, আমি ভাবিয়া- ছিলাম সে যথার্থই বর্ণিত প্রাণী দেখিয়াছে , এই বিষয় ধীব- ভাবে স্বীয় কল্পনায় বঞ্জিত কবিয়া প্রকাশ করিত্তেছে ।”

উল্লিখিত বর্ণনায় স্পষ্ট প্রতিপন্ন হইবে, সীল মৎস্যের কোন এক বিশেষ জাতি নাবিকেব নেত্রগোচর হইয়াছিল । ইদৃশ

অদ্ভুত প্রাণীর বিবরণ আরও অনেক স্থলে প্রাপ্ত হওয়া যায় । হডসন্ নামে একজন বিখ্যাত নাবিক এসম্বন্ধে লিখিয়াছেন, “আমাদের দলের এক ব্যক্তি অর্ণবপোত হইতে একটি প্রাণী দৃষ্টি কবে ; ইহা আমাদের পোতের অতি নিকটে আসিয়াছিল, এই সামুদ্রিক জীবের দেহের আয়তন আমাদের দেহের আয়তনের তুল্য । ইহার পৃষ্ঠদেশ ও বক্ষঃস্থল ত্রীলোকেব পৃষ্ঠ ও বক্ষোদেশের স্থায় । দেহের চর্ম সাতিশয শুভ্র । সুদীর্ঘ কেশরাশি পৃষ্ঠদেশে বিলম্বিত বহিয়াছে । ইহার পুচ্ছদেশ দৃষ্টিগোচর হইয়াছিল ।” ডাক্তার রবার্ট হামিলটনের তিমি ও সীল মৎস্যের ইতিবৃত্ত হইতে গোস্ সাহেব একটি অদ্ভুত সামুদ্রিক জীবের সম্বন্ধে এই বিবরণ উদ্ধৃত করিয়াছেন, “সেটলাণ্ড দ্বীপ শ্রেণীতে ইবেল নামে একটি দ্বীপ আছে । এই দ্বীপে মৎস্য-ব্যবসায়িগণ একটি সমুদ্রচর জীব ধৃত করিয়াছিল । ইহার দৈর্ঘ্য তিন ফিট । দেহের পূর্ব ভাগ মানব শরীরের ন্যায় ; বক্ষোদেশ নারী জাতির বক্ষঃস্থলের ন্যায় উন্নত । মুখ, ললাট ও গ্রীবা ক্ষুদ্র, এই সকল প্রত্যঙ্গের সহিত বানব জাতির দেহাংশের সাদৃশ্য আছে । বাহুদ্বয় ক্ষুদ্র, ইহা বক্ষঃস্থলে জড়ান ছিল । অঙ্গুলিগুলি সূক্ষ্ম ও পরস্পর পৃথক ভাবে অবস্থিত । দেহের চর্ম অতিশয় কোমল ও ধূসর বর্ণ । শব্দ-বেব অপবাণর ভাগ মৎস্যাবয়ব । ধবিবাব সময় ইহা আত্ম-বক্ষার জন্য কোনরূপ চেষ্টা করে নাই, কিম্বা কাহাকেও দংশন করিতে সমুদ্যত হয় নাই । কেবল ক্ষীণ ও আর্জ্জ্বনে আপনার মর্ম বেদনা জানাইয়াছিল । ছয়জন নাবিক এই অদ্ভুত জীবকে ধরিয়া আপনাদের নৌকাষ লইয়া যায় । কিন্তু ধীববদিগেব অনাবধানতা বা কুসংস্কারজনিত ভীতিনিবন্ধন বন্ধন-রজ্জু শিথিল হইয়া যাওয়াতে ইহা লম্বভাবে জলরাশির গর্ভে প্রবেশ করে ।” এই সকল অদ্ভুত সামুদ্রিক প্রাণীর বিবরণ এপর্যন্ত বৈজ্ঞানিক

গবেষণায় সুমার্জিত বা সুপরিষ্কৃত হয় নাই। কল্পনামগ্নুত ভাবিয়া কেহ এককল বিষয়ের প্রতি অনাস্থা প্রকাশ করিয়াছেন, বিজ্ঞানের অনায়ত্ত ভাবিয়া কেহবা এ বিষয়ে নিবস্ত রহিয়াছেন।

উল্লিখিত জীবদেহেব বিবরণ ব্যতীত কাটল মৎস্য ও সৈন্ধব সর্পেব বিবরণও সাতিশয় বিস্ময়জনক। ১৮৭৩ অব্দে দুইজন ধীবব আমেরিকাব অন্তর্ভুক্তী মিউ কাউণ্ড্‌লাণ্ডে একটা কাটল মৎস্য দেখিতে পায়। ইহা অত্যন্ত বৃহদবয়ব বলিয়া অনুমিত হইয়াছিল। ধীবরগণ যখন এই মৎস্যটিকে আক্রমণ করে, তখন ইহা ক্রোধভাবে একটা ডানা দ্বাৰা আক্রমণকাবিদেব অধিষ্ঠিত নৌকার উপবিভাগে আঘাত কবিয়াছিল, একজন ধীবব বিশিষ্ট সত্ৰবতাসহকারে কুঠাব দ্বাৰা এই ডানাব কিয়-দংশ ছেদন করিয়া লয়। এই ছিন্ন অংশেরও প্রায় ছয়ফিট ঘটনাক্রমে বিনষ্ট হইয়া যায়। ইহাব অবশিষ্ট ডানার দৈর্ঘ্য ১৯ ফীট হইয়াছিল। নাবিকেবা এই কাটল মৎস্যের দেহের দৈর্ঘ্য ৬০ ফীট ও ব্যাস ৫ ফীট অনুমান করিয়াছিল। খ্রীষ্টীয় অষ্টাদশ শতাব্দীতে নবজমে দেশীয় একজন পণ্ডিত স্বপ্রণীত প্রাণিবৃত্তান্তে একটা সুরহৎ সৈন্ধব সর্পেব বিবরণ লিপিবদ্ধ কবেন। ইহাব পরে এই সর্পের সম্বন্ধে অনেক আন্দোলন হইয়া আসি-য়াছে। ১৮১৭ অব্দেব আগষ্ট মাসে এইরূপ একটা সর্পাকাব সুরহৎ জীব মাসাচিউসেট্‌সের অন্তঃপাতী আন অন্তবীপেব নিকট পবিদৃষ্ট হয়। প্রসিদ্ধ নামা এগার জন ব্যক্তি মার্জিষ্টেটদিগেব সমীপে যথাবীতি শপথ কবিয়া এ বিষয়ে সাক্ষ্য প্রদান কবেন। এই মার্জিষ্টেটদিগের একজন উল্লিখিত প্রাণী দর্শন করেন, স্মৃতবাং তাঁহাকেও যথানিয়মে সাক্ষ্য দিতে হয়। প্রস্তাবিত জীবের অবয়ব সর্পাকার, দেহ গভীর পাটলবর্ণ, মস্তক ও গ্রীবায শ্বেতবর্ণ রেখা আছে। ইহার দৈর্ঘ্য ৫০ হইতে ১০০ ফীট পর্যন্ত

অনুমিত হইয়াছিল । মস্তকেব আকার সর্পের মস্তকের ন্যায়, কিন্তু ইহা ঘোটকের মস্তকের ন্যায় বৃহৎ । মস্তকে কেশব আছে কি না, সে সম্বন্ধে কেহ কিছু নির্দেশ করেন নাই । কাণ্ডন মাকুহে নামে একজন ব্রিটিষ পোতাধ্যক্ষ ১৮৪৮ খ্রীষ্টাব্দে সাগরের বারিবাণিতে আর একটি সুরহৎ সর্পাকার প্রাণী দর্শন করেন । মাকুহে তাঁহার উর্দ্ধতন কর্মচারী গেজ সাহেবকে এই সম্বন্ধে এক-খানি পত্র লিখিয়াছিলেন—“৬ই আগষ্ট অপবাহু পাঁচটার সময় আকাশ মণ্ডল অন্ধকাবায় ও মেঘাচ্ছন্ন ছিল, অর্ণবযান মহা-সাগরের তরঙ্গাবলিব মধ্য দিয়া উত্তর পূর্বাভিমুখে যাইতেছিল, আমি কয়েকজন সহযোগী কর্মচারীর সতিত যানের উপনিভাগে পাদচারণা করিতে ছিলাম, এমন সময়ে এক জন কর্মচারীর নিকট শুনিতে পাইলাম, কোম একটি অভূতপূর্ব পদার্থ দ্রুত-গতিতে যানের অভিমুখে অগ্রসব হইতেছে । এই পদার্থ ক্রমে আগাদের নয়ন-গোচর হইল, ইহা একটি সুরহৎ সর্প । সাগরতল হইতে ইহার পৃষ্ঠদেশ ও মস্তক প্রায় ৪ ফীট উর্দ্ধে উখিত হইয়াছিল, এই জীবের অন্ততঃ ৬০ ফীট পরিমিত দেহ সাগরতলে দৃষ্টিগোচর হইতেছিল । ইহার দেহ গভীর পাটল-বর্ণ, কেবল হরিভাভ-শ্বেতবেখা গলদেশে বিবাজমান ছিল । ইহার মস্তকেব নিম্নভাগেব ব্যাস ১৫ হইতে ১৬ ইঞ্চি পরিমিত হইবে । ইহার পার্শ্বদেশে কোনরূপ ডানা ছিল না । কেবল পশ্চাত্তাগে ঘোটকের কেশর অথবা সমুদ্র-শৈবালের ন্যায় এক-প্রকার পদার্থ দেখা যাইতেছিল । এই সামুদ্রিক জীব অর্ণবযানস্থ অনেকের প্রত্যক্ষীভূত হইয়াছিল ।”

কাণ্ডন মাকুহেব বর্ণিত জীবের প্রতিকল্প ১৮৪৮ অব্দের ২৮এ অক্টোবরের সচিত্র লণ্ডনসংবাদ নামক বিলাতের প্রসিদ্ধ পত্রে প্রকাশিত হয় ।

## মীরাবাই ।

মীরাবাই ঈশ্বরভক্তি ও ঈশ্বর-প্রেমে নিমগ্ন হইয়া যেকল্প কঠোর ব্রত প্রতিপালন করিয়াছেন, সর্বপ্রকার ভোগসুখে তাম্বুল্য দেখাইয়া মূর্ত্তিমতী সাবস্বতী শক্তির ন্যায় যেকল্প তদ্-গতচিত্তে স্বীয় স্ববর্ণীয় দেবতার গুণ গান করিয়াছেন, অবলা-প্রকৃতিতে যেকল্প তপস্বি-ধর্ম প্রায় দৃষ্টিগোচর হয় না । নিম্ন-লিখিত বিবরণ পাঠে সেই ঈশ্বর-নিষ্ঠা ও ভক্তিপবায়নতা অনুমিত হইবে ।

মীরাবাই মেবতা নামক রাজপুত্রনার একটা ক্ষুদ্র বাজ্যের জনৈক বাঠোর বংশীয় বাজার কন্যা । মির্জাবের বাণা কুস্তের সহিত তাঁহার বিবাহ হয় । কুস্ত ১৪১৯ খ্রীষ্টাব্দে মির্জাবের সিংহাসনে অধিবোধন করেন । মীরা অনুপযুক্ত ব্যক্তির সহিত পবি-গয়-সূত্রে আবদ্ধ হন নাই । সাহস, পবাক্রম ও শাসন-দক্ষতায় কুস্ত মির্জাবের ইতিহাসে সবিশেষ প্রসিদ্ধ । যে গৌরবসূর্য্য দৃষতী নদীর তীরে অনন্ত প্রসারিত শোণিত সাগরে নিমগ্ন-প্রায় হইয়াছিল, ছবস্ত পাঠান-বাহুব পবাক্রমে বাহার প্রচণ্ড কিরণ অঙ্ককাবে পবিগতি পাইয়াছিল, বাণা কুস্তের ক্ষমতা-বলে তাহা ধীরে ধীরে সমস্ত মির্জাব আলোকিত করিয়া তুলে । কুস্ত প্রায় অর্ধ শতাব্দী কাল মির্জাবের সিংহাসনে অধিষ্ঠিত থাকিয়া অনেক সৎকার্য্যের অনুষ্ঠান করেন । তিনি অসামান্য পরাক্রমে ও অসামান্য সদাশমতায় তৎসমকালীন অনেক বাজাকে অধঃক্রম করিয়াছেন । খিলিজি-বংশের অত্যয়ে কয়েকটা মুসলমান রাজ্য দিল্লীর অধীনতা-শৃঙ্খল উচ্ছেদ করিয়া স্ব প্রধান হইয়া উঠে । ইহাদের মধ্যে মালব ও গুজরাটের অধিপতি সমবেত

হইয়া রাণাকুস্তের বিরুদ্ধে অভ্যুত্থিত হন। ১৪৪০ খ্রীষ্টাব্দে মালবের বিস্তীর্ণ প্রান্তরে উভয়পক্ষে ঘোরতর সংগ্রাম হয়। কুম্ভ একলক্ষ সৈন্য ও চতুর্দশ শত হস্তী লইয়া সমরক্ষেত্রে অবতীর্ণ হন, এবং প্রভূত পরাক্রম প্রদর্শন পূর্বক বিপক্ষদিগকে সম্পূর্ণরূপে পরাজিত করিয়া স্বীয় বাজধানী চিতোরে প্রত্যাগমন করেন। এই যুদ্ধে মালবের অধিপতি কুম্ভেব বন্দী হন, কুম্ভ পরাজিত শত্রুর প্রতি অসৌজন্য প্রদর্শন করেন নাই। তিনি বীরধর্ম ও বীর-পদ্ধতি অনুসারে সমরে প্রযুক্ত হইয়াছিলেন, বিজয়লক্ষ্মীর প্রসাদ লাভের আশায় অতুল পরাক্রমের সহিত যুদ্ধ করিয়াছিলেন, পরিণেষে বিজয়ী হইয়া সেই বীরধর্মের অবমাননা করেন নাই, এবং সেই বীরপদ্ধতিরও গৌরব-হাবী হন নাই। কুম্ভ মালবের অধিপতিকে অনেক অর্থ দিয়া বন্দি হইতে বিমুক্ত করেন। এই কার্যে কুম্ভেব একদিকে যেকপ বীরত্ব প্রকাশ পাইতেছে, অন্যদিকে সেইরূপ সৌজন্য ও সদাশয়তা পরিস্ফুট হইতেছে।

কুম্ভ মিভাবে অনেকগুলি জয়স্তুম্ভ ও অনেকগুলি গিরিভূর্গ নির্মাণ করেন। মিবার বন্ধার্থ যে চৌবাশীর্গী ভূর্গ নির্মিত হয়, তাহার মধ্যে চৌত্রিশটি বাণী কুম্ভের সংগঠিত। কুম্ভমিব (প্রচলিত নাম কমলমিষব) রাণাকুস্তের অসাধারণ কীর্তিস্তুম্ভ। এই ভূর্গ শত্রুগণের অভেদ্য বলিয়া চিবকাল রাজস্থানের ইতিহাসে প্রসিদ্ধ আছে। বাণাকুস্তের গুণ-গৌরব কেবল এই সমস্ত কার্যেই পর্যাবসিত হয় নাই, সুকবি ও সুবিদ্বান্ বলিয়াও তাঁহার খ্যাতি ও প্রতিপত্তি চতুর্দিকে প্রসারিত হয়। কুম্ভ বন্দী-কবি-কুল শিরোমণি জয়দেবের প্রণীত গীতগোবিন্দের এক খানি টীকা প্রস্তুত করেন। কিন্তু এই টীকা এক্ষণে সচরাচর প্রাপ্ত হওয়া যায় না। মীরা বাই কিরূপ সৌভাগ্য-

লক্ষীর কোড়ে সমর্পিত হইয়াছিলেন, তাহা, পরিস্ফুট করিবার নিমিত্ত এই সুযোদ্ধা, সুরাজ্ঞা ও সুবিদ্বানের সম্বন্ধে এত কথা লিখিত হইল । মীরাবাই পতিব এই সৌভাগ্য সুখের কতদূর অংশ-ভাগিনী হইয়াছিলেন, এক্ষণে তাহাই বিবৃত হইতেছে ।

ভক্তি হৃদয়ের সঞ্জীবনী শক্তি । যদি ক্ষণকালের জন্যও ভক্তির কার্য্য স্থগিত হয়, তাহা হইলে হৃদয় বিগুঢ় ও বৃন্তচ্যুত কুসুমের আশ্রয় সান্তিশয় শোভাহীন হইয়া পড়ে । ভক্তি নিষত উর্দ্ধগামিনী । গতি ও উত্থান বিষয়ে ইহা কল্পনাকেও অধঃকৃত করিয়া থাকে । তাঁহার হৃদয় সর্বদা ভক্তিরসে পরিপ্লুত থাকে, তিনি মানব হইয়াও দেবলোকেব পবিত্রতম সুখ সম্ভোগ কবেন, এবং মর্ত্য হইয়াও অমবভোগ্য পবিত্র সুধাব বসাস্বাদ কবিয়া থাকেন । পৃথিবীতে যাহা কিছু সুন্দর, যাহা কিছু মনোমদ, যাহা কিছু প্রীতিপ্রদ, তৎসমুদয়ই এক সূত্রে গ্রথিত হইয়া নিষত তাঁহার সেবা কবিয়া থাকে । ভক্তি কখনও কোন প্রকার পার্থিব পক্ষে কলুষিত হয় না । ইহা পবিত্র-সলিলা স্রোতস্বতীৰ ন্যায় নিষতই স্বচ্ছ, আবিলতাবর্জিত ও জীবন-তোষিনী । যথার্থ ভক্তিমান ব্যক্তি কখনও নীচতা বা হীনতার কর্দমে নিমগ্ন থাকেন না । তাঁহার হৃদয় সর্বদা নির্মল ও কমনীয় থাকে । তিনি ভ্রমব-চূষিত প্রভাত-কমলেব মনোহর মাধুবী দেখিয়া যেমন পবিতৃপ্ত ও সুখী হন, অনন্ত জড জগতেব অনন্ত শক্তিব বিকাশ দেখিয়াও তেমনই সুখী ও পরিতৃপ্ত হইয়া থাকেন । তরঙ্গাঘিত সাগরের ভীষণ মূর্ত্তি, চঞ্চল তড়িঙ্গতাৰ অপূর্ন বিকাশ, সমুন্নত ভূধব-মালাব গম্ভীর দৃশ্য, দিগ্‌দাহকারী দাবানল, প্রলয়ঝঙ্কারু প্রভৃতিতে তাঁহার হৃদয় সেই অনন্ত শক্তিব অনন্ত স্রোতের সহিত মিশিয়া যায় । তিনি সংসারী হইয়াও যোগী, মানব হইয়াও দেবলোক-বাসী এবং সংসার-

সমুদ্রেব নগণ্য জল-বুদ্‌ বুদ্‌ হইয়াও মহীয়সী শক্তির অদ্বিতীয় অবলম্বন । এ নশ্বব জগতে—এ জীবলোকের ক্ষণপ্রভাবৎ ক্ষণিক বিকাশে কাহারও সহিত তাহার তুলমা সম্ভবে না ।

যথার্থ ভক্তি এইরূপ পবিত্র ও অনবদ্য, যথার্থ ভক্তিমানের হৃদয় এইরূপ উচ্চতম গ্রামে সমারুঢ় । ভক্তি অনেকবিষয়ের দিকে প্রধাবিত হইয়া থাকে, ইহার মধ্যে দেবতার দিকে যে ভক্তি প্রধাবিত হয়, মীরাবাই তাহারই জন্য সকলের নিকট শ্রদ্ধা ও শ্রীতি পাইতেছেন । দেবভক্তি অপূর্ণকে পরিপূর্ণ ও অসুন্দরকে সৌন্দর্য্যের বেধাপাতে সুশোভিত কবে । মনুষ্য এই জড় জগতে ক্ষুদ্রতম জীব । প্রতি মুহূর্ত্তেই ইহার অস্থায়ী শবীবের স্থিবাংশের ধ্বংস হইতেছে । উর্ম্মিমালা যেমন গৌববে কিয়ৎক্ষণ বক্ষঃ স্ফীত করিয়া জলগর্ভে বিলয় পায়, বিদ্যুৎলতা যেমন মুহূর্ত্তমাত্র প্রভা বিকাশ করিয়া নবজলধব-সমূহে অন্তর্হিত হয়, নশ্বব মানবও তেমনই এই নশ্বব জগতে কিয়ৎক্ষণ লীলা করিয়া কালের অনন্ত স্রোতে বিলীন হইতেছে । অপূর্ণ ও অস্থায়ী জীব ইহা বিবেচনা করিয়া ভক্তিব সাহায্যে সহজেই সেই পরিপূর্ণ সচ্চিদানন্দ পবাৎপবে সংযতচিত্ত হইয়া থাকে । পবিত্রশ্যমান সংসারের অস্থায়িত্ব ও নিজের অস্তিত্বের অস্থায়িত্ব ভাবিয়া মনুষ্য আপন হইতেই অনন্তশক্তিমান দেবতার শবণ লয়, এবং এই দেব-ভক্তিব বলে সৌন্দর্য্যের উচ্চতম মন্দিরে আরোহণ করিয়া পবিত্র আনন্দের বনাস্বাদ করিতে থাকে । কেহ শিখার না, কেহ বলিয়া দেয় না, তথাপি এই ভক্তি উর্দ্ধে উড্ডীন হইয়া মনুষ্যকে ববণীষ দেবতার স্বরূপ-চিন্তায় নিযোজিত কবে । এই জন্য সাধনা বলবতী হয় এবং এই জন্যই তপস্যা মহীয়সী হইয়া থাকে । তরঙ্গিণী যেমন সাগরের দিকে অবিবাম-গতি প্রবাহিত হয়, ভক্তিব প্রবল বেগে সাধনা ও তপস্যাও



সেইরূপ সর্বশক্তিমান্ ঈশ্বরের দিকে প্রধাবিত হইয়া থাকে । কেহই এই অসীম ভক্তির গতিরোধ কবিত্তে সমর্থ হয় না । যিনি শক্তিতে অসীম, দয়ার অসীম, পরিমাণে অসীম ; অসীম ভক্তিস্রোত যখন তাঁহাকে পাইবাব জন্য তাড়িত বেগকেও উপহাস করিয়া ধাবমান হয়, তখন সঙ্কীর্ণ-শক্তি, সঙ্কীর্ণ-বুদ্ধি ও সঙ্কীর্ণ সীমাবদ্ধ সামান্য মানব কিছুতেই সে স্রোত আপনার ক্ষমতায়ত্ত কবিত্তে পাবে না । এরূপ স্থলে মানবী শক্তি আপনা হইতেই সঙ্কুচিত হইয়া আইনে, এবং কুর্মেব ন্যায আপনাতেই আপনি লুক্কায়িত হইয়া থাকে ।

মীরাবাই এই দেব-ভক্তিব স্থলে অটল হইয়া সমুদয় পার্শ্বিক সুখ পবিত্যাগ কবিয়াছিলেন । বিধাতা যদিও তাঁহাকে সর্বপ্রকার গুণসম্পন্ন ও সর্বপ্রকার সম্পত্তির আধিপত্য দিয়াছিলেন, তথাপি মীরাব ভাগ্যে ভোগ-সুখ ঘটিয়া উঠে নাই । মীরা সাতিশয় বিষ্ণু-ভক্তি-পরায়ণা ছিলেন । তিনি স্বামি-গৃহে বাইয়া পবন-বৈষ্ণবী হইয়া উঠিলেন, এবং আত্ম-সংযত ও ভক্তিপরায়ণ হইয়া বগছোড় নামক আবাধ্য কৃষ্ণ মূর্তিব আবাধনায় প্রবৃত্ত হইলেন । কিন্তু এদিকে তাঁহার স্বামীর অন্যান্য পবিবাববর্গ প্রগাঢ় শক্তি-উপাসক ছিলেন । এজন্য স্বামি-গৃহে গমনেব অব্যবহিত পবেই মীরাব সহিত তাঁহার স্বশ্রীর ধর্ম বিষয়ে উৎকট বিবাদ আবস্ত হইল । মীরার স্বশ্রী মীরাকে বিষ্ণু উপাসনায় বিরত ও 'শক্তি উপাসনায় প্রবৃত্ত কবিত্তে অনেক চেষ্টা পাইলেন । কিন্তু তাঁহার চেষ্টা কিছুতেই ফলবতী হইল না । মীরা যে ভক্তিব স্রোতে দেহ ভানাইনা-ছিলেন, রাজমাতা সে স্রোত নিরুদ্ধ করিত্তে সমর্থ হইলেন না । এজন্য রাজমাতা মীরাকে গৃহ হইতে নিষ্কাশিত কবিলেন । মীরা গৃহ হইতে বহিষ্কৃত হইলেম বটে, কিন্তু ভক্তি হইতে স্থলিত

হইলেন না । তিনি যে ব্রতে দীক্ষিত হইয়াছিলেন, প্রগাঢ় ভক্তি-যোগ সহকারে তাহা প্রতিপালন করিতে লাগিলেন । বোধ হয়, রাণা কুম্ভ মীর্ষাব আবাসের নিমিত্ত স্বতন্ত্র স্থান ও ভরণপোষণের জন্য কিছু অর্থ নির্দ্ধারিত করিয়া দিয়াছিলেন । যাহাহউক, মীরা স্বামি-গৃহ হইতে বিচ্ছিন্ন হইয়া বনছোড়েব আরাধনায় রত হইলেন । অনেক নিরাশ্রয় বৈবাগী তাঁহাব আশ্রয়ে বাস করিতে লাগিল । মীরা এইরূপে নিবাশ্রয়ের আশ্রয়-ভূমি হইয়া দয়া-ধর্ম-পরায়ণা তপস্বিনী'ব ন্যায় কালাতি-পাত করিতে লাগিলেন ।

কিছু দিন পবে মীরা বাই মথুবা ও দ্বারকা তীর্থে গমন কবেন । কথিত আছে, মীরা যৎকালে দ্বারকায় ছিলেন, তৎকালে রাণা আপনাব অধিকাবস্থ বৈষ্ণবদিগের উপর অত্যাচার আবিস্ত কবেন । কয়েক জন ব্রাহ্মণ এই সময়ে মীরাকে আনয়ন করিবার জন্য দ্বারকায় প্রেবিত হন । মীরা দ্বারকা হইতে প্রস্থান করিবার পূর্বে আপনাব আবাধ্য দেবেব নিকট বিদায় লইবার নিমিত্ত মন্দিরে প্রবেশ করিয়া উপাসনা আরম্ভ কবিলেন । উপাসনা সমাপ্ত হইলে কৃষ্ণ-মূর্তি দ্বিধা বিভক্ত হইল এবং মীরা তাহাতে প্রবেশ কবিবামাত্র উহা পূর্কবৎ অবিভক্ত হইয়া গেল । এই অবধি মীরাবাই চিবকালেব মত নবলোক হইতে অন্তর্হিত হইলেন । অদ্যাপি মিবারে বনছোড় নামক কৃষ্ণ-মূর্তির সহিত মীরা বাইব পূজা হইয়া থাকে । সাধাবণে নির্দেশ কবে যে, এই পূজা বনছোড়ের অভ্যন্তবে মীরা বাইর অন্তর্কানের স্মরণ-সূচক ব্যতীত আর কিছুই নহে ।

মীরা বাইর কোন ধারাবাহিক জীবনচরিত প্রাপ্ত হওয়া যায় না । তাঁহাব জীবনী-সম্বন্ধীয় প্রায় সমস্ত ঘটনাই একণে উপকথায় পর্যাবসিত হইয়াছে । মীরা পরমসুন্দরী ছিলেন ।

সৌন্দর্য-গরিমায় তৎকালে প্রায় কেহই তাঁহার তুলনীয় ছিল না ।" কিন্তু তাঁহার বাহ্য সৌন্দর্য অপেক্ষা আভ্যন্তরীণ সৌন্দর্য অধিক ছিল । তাঁহার যতটুকু পবিচয় পাওয়া গিয়াছে, তাহাতেই ঈশ্ব-ভক্তি, ঈশ্ব-প্রেম ও স্বার্থত্যাগেব অসাধারণ চিত্র পরিদৃষ্ট হয় । মীরা দেবভক্তিব নিমিত্ত অতুল বাজত্ব-মুখ ও অতুল ভোগ-বিলাসে উপেক্ষা প্রদর্শন কবিয়াছিলেন । ইহার জন্য তাঁহার কিছুমাত্র মনঃকোভ উপস্থিত হয় নাই । প্রগাঢ় সাধনা ও প্রগাঢ় তপস্যায় তাঁহার হৃদয় চিব-প্রফুল্ল থাকিত । মীরা বাইব অন্তর্দান-ঘটনা যদিও নিবনচ্ছিন্ন কল্পনা-মূলক ও অবিশ্বাস-যোগ্য, তথাপি উহা তাঁহার উৎকর্ট সাধনার পবিচয় দিতেছে । বস্তুতঃ মীরাবাই যে আপনাব সাধনায় অনেকাংশে সিদ্ধ হইয়াছিলেন, তদ্বিষয়ে সন্দেহ নাই । এই সাধনা ও তপস্যাব জন্যই তিনি অনেকের নিকট দেবীভাবে পূজা পাইয়া আসিতেছেন ।

মীরা বাই স্নকবি ছিলেন । তাঁহার হৃদয়ে ভক্তি-প্রবাহ উচ্ছ্বসিত হয়, কবিতাব মোহিনী মাধুবী সহজেই তাঁহার শিবায শিবায সঞ্চারিত হইয়া থাকে । পবিত্র ভক্তিব মহিমায মীরার কবিতাও হিমাচল-নিঃসৃত পবিত্র-সলিলা জাহ্নবীব ন্যায় অবিবল ধারায নির্গত হইত । মীরা বাইব বচিত পদাবলি অনেকে আদব পূর্ষক গ্রহণ কবিয়াছেন । কোন কোন ধর্ম-সম্প্রদায়েব উপাসনা-পদ্ধতি মধ্যে তাঁহার বচিত অনেক সংগীত প্রাপ্ত হওয়া যায় । বচনা-নৈপুণ্য ব্যতীত মীরা বাইর সঙ্গীত শাস্ত্রেও অসাধাবণ পাবদশিতা ছিল । কথিত আছে, সুপ্রসিদ্ধ মোগল সম্রাট আকবর সাহ মীরা বাইব অসামান্য সঙ্গীত-শক্তিব বিবরণ শুনিয়া প্রসিদ্ধ সংগীতবিৎ তানলেনকে সঙ্গে লইয়া তাঁহার নিকট গমন করেন, এবং তদীয় কোমল কণ্ঠ-বিনিঃসৃত

সুস্বাদু গীতাবলি শ্রবণ করিয়া পরিতুষ্ট হন । বোধ হয়, কোন  
 গ্রন্থকার মীরা বাইকে আকবর সাহের সমকালবর্তিনী বলিয়া  
 উল্লেখ করাতেই এইরূপ কিঞ্চিদস্তীর প্রচার হইয়াছে । কিন্তু  
 এই নির্দেশ সমীচীন বোধ হয় না ।

মীরা বাইর নামে একটি স্বতন্ত্র ধর্ম-সম্প্রদায় বর্তমান আছে ।  
 এই সম্প্রদায়ের বৈষ্ণবেরা মীরা বাই এবং তাঁহার ইষ্টদেব রণ-  
 ছোড়কে বিশিষ্ট ভক্তি ও শ্রদ্ধা করিয়া থাকেন ।

---

## মেঘ ।

অসীম জড় জগতের কার্য পর্যালোচনা কবিতা দেখিলে সৰ্বশক্তিমান ঈশ্বরের অনন্ত কৌশল লক্ষিত হয় । বৈজ্ঞানিক পণ্ডিতগণের গবেষণাবলে এই প্রাকৃতিক তত্ত্ব অনেকাংশে সুপৰিকৃত ও সুবোধ্য হইয়াছে । গগন-বিহারী মেঘের বিষয় এস্থলে বর্ণিত হইতেছে । এই মেঘেও বিশ্বপাতাব অপূৰ্ণ কৌশল পরিদৃষ্ট হইবে ।

সূর্য্যের উত্তাপে জলভাগ হইতে বাষ্প উর্দ্ধে উত্থিত হইতেছে । এই বাষ্প উপরিস্থিত আকাশে শীতল বায়ু সংস্পর্শে ঘনীভূত হইয়া মেঘ রূপে পৰিণত হয় । সচরাচর আমরা যে কুজ্বাটিকা দেখিতে পাই, মেঘের সহিত তাহাব কোন বিশেষ বৈলক্ষণ্য নাই । বস্তুতঃ মেঘ ও কুজ্বাটিকা এক উপাদানেই উৎপন্ন হইয়া থাকে । ঘনীভূত বাষ্পবাশি ভূমির অব্যবহিত উপরে বা কিঞ্চিৎ উর্দ্ধে বিলম্বিত হইলে কুজ্বাটিকা নামে অভিহিত হয়, এবং উহা উর্দ্ধস্থিত বায়ু-প্রবাহে ভাসমান হইলে মেঘ নামে উক্ত হইয়া থাকে । সুবিশাল সাগর-তল, উত্তুঙ্গ শৈল-শিখর, সুপ্রশস্ত ক্ষেত্র, বেখানে হউক, জলীয় বাষ্প বায়ু নিম্নস্থিত স্তরে বর্তমান থাকিলেই কুজ্বাটিকা হইল, আর উহা উর্দ্ধ গগনে বিচরণ করিলেই “মেঘ” বলিয়া পরিচিত হইতে লাগিল । কেবল অবস্থান অংশে কুজ্বাটিকার সহিত মেঘের এইরূপ বিভিন্নতা লক্ষিত হইয়া থাকে । আকার ও বর্ণ বিষয়ে মেঘের সহিত কুজ্বাটিকার যে প্রভেদ দৃষ্ট হয়, তাহা কেবল দৃবতা প্রযুক্ত সংঘটিত হইয়া থাকে । মেঘ কুজ্বাটিকা অপেক্ষা বহুদূর উর্দ্ধে অবস্থিত, উহাতে সূর্য্য-কিরণ প্রতিকলিত হইলে নানাবিধ বর্ণ

আমাদের নয়নগোচর হয় ; কুজ্জ্বলিকাতে যদিও সূর্য্য-কিরণ সংস্পৃষ্ট হয়, তথাপি উহা অত্যন্ত নিকটে অবস্থিতি করাতে আগরা উহার বিভিন্ন বর্ণ কিছুই বুঝিতে পারি না ।

মেঘ অতিশয় চঞ্চল । ইহা কখনও স্থিরভাবে অবস্থান করে না । অনন্ত আকাশে বায়ু-প্রবাহ নিয়ত নানা দিকে প্রবাহিত হইতেছে, মেঘ-সমূহও এই বায়ু-বাণিব সহিত নিবস্তন নানাদিকে প্রধাবিত হইতেছে । নিম্নস্থিত বায়ুরাশি যে দিকে প্রবাহিত হয়, উর্দ্ধস্থিত বায়ুরাশি অনেক সময়ে তাহাব বিপবীত দিকে গমন কবে, এইজন্য দেখিতে পাওয়া যায়, নিম্নের মেঘ-খণ্ড যে দিকে পরিচালিত হইতেছে, উর্দ্ধের মেঘখণ্ড তাহাব বিপবীত দিকে ধাবিত হইয়া থাকে । এইরূপে উর্দ্ধস্থিত মেঘ সমূহ বিভিন্ন দিক্গামী বায়ু-প্রবাহেব বলে বিভিন্ন দিকে পবিচালিত হইতেছে । সচরাচর যে মেঘ খণ্ড নিশ্চল বলিয়া প্রতীত হয়, বস্ত্র দ্বারা দর্শন কবিলে তাহাবও চঞ্চলতা প্রত্যক্ষীভূত হইয়া থাকে ।

অসীম আকাশ-গুণ্ডলে অনন্ত বায়ুস্তব বর্তমান বহিসাছে । এই সকল বায়ুস্তবের তাপমান পরস্পর ভিন্ন ভিন্ন প্রকৃতি-বিশিষ্ট । এতন্নিবন্ধন সর্বদা নূতন নূতন মেঘেব উৎপত্তি ও বিলয় দেখিতে পাওয়া যায় । উষ্ণ ও আর্দ্র বায়ু-প্রবাহ অপেক্ষাকৃত শীতল বায়ু-প্রবাহেব সহিত সংস্পৃষ্ট হইলে সেই উষ্ণবায়ুস্থিত বাষ্প সমূহেব কিয়দংশ মেঘাকারে পরিণত হয় । আবার বখন মেঘ-সমূহ উষ্ণ বায়ু-প্রবাহের সহিত সংহত হয়, তখন মেঘের জলকণা সকল বায়ুর উষ্ণতায় পুনর্বার বাষ্পাকাবে পরিণত হইয়া উঠে, স্মৃতবাং মেঘখণ্ড বিলুপ্ত হইয়া যায় । আকাশ-পথে নিবস্তব উষ্ণ ও শীতল বায়ু ইতস্ততঃ ধাবিত হইতেছে, স্মৃতবাং তৎসঙ্গে সঙ্গে সর্বদা নূতন নূতন মেঘের আবির্ভাব ও তিরোভাব হই-

তেছে। মেঘ যতই উর্দ্ধাভিমুখে উঠিত হয়, ততই উহা শীতল বায়ু-রাশির সংস্পর্শে পুষ্টাবধব হইতে থাকে, এবং উহা যতই নিম্নাভিমুখ হয়, নিম্নস্থিত উষ্ণ বায়ু-রাশির সংস্পর্শে অভ্যন্তরস্থ জলকণা সমূহ বাষ্পাকারে পরিণত হওয়াতে ততই উহার অবধব হ্রাস হইয়া পড়ে। মেঘের গতি নিতান্ত অল্প নহে। আগরা যে সমস্ত মেঘ-খণ্ডকে মন্দগামী বলিয়া নির্দেশ করি, দূবগামী বায়ু ববেগে তাহা ঘণ্টায় ৩-১৭০ ক্রোশ পর্য্যন্ত চলিয়া যায়। কখন কখন দেখিতে পাওয়া যায়, পর্কতেব উন্নত শৃঙ্গদেশে মেঘ-খণ্ড স্থিবভাবে লম্বমান বহিয়াছে, বায়ুব প্রবল বেগেও উহা স্থানচ্যুত হইতেছে না। এই আশু প্রতীক্ষমান স্থিবতাব কারণ আন কিছুই নহে, তত্রত্য মেঘ-খণ্ড সকল বায়ুব প্রবল বেগে স্থানান্তরে উড়িয়া যায়, পবে আবার বায়ু-প্রবাহেব শৈত্য ও উষ্ণতাব সংস্পর্শে নূতন মেঘ সমুৎপন্ন হইয়া সেই স্থান পবিগ্রহ কবে। এইরূপে মেঘেব এক খণ্ড স্থানান্তরিত হইতেছে, আব এক খণ্ড উৎপন্ন হইয়া তাহাব স্থান অধিকার কবিতেকে, এই জন্য সহসা দেখিলে এই সকল মেঘ-খণ্ডকে নিশ্চল ও এক স্থানে অবস্থিত বোধ হয়।

পূর্বে উক্ত হইয়াছে, উর্দ্ধ আকাশে ভিন্ন ভিন্ন তাপমানেব বায়ুবাশি প্রবাহিত হইতেছে, কিন্তু উর্দ্ধস্থিত বায়ু-স্তব নিম্নস্থিত বায়ু-স্তব অপেক্ষা শীতল. নিম্নেব বায়ুবাশিব তাপাংশ অধিক হইলে উহা উর্দ্ধে উঠিতে থাকে, এইরূপে উর্দ্ধে উঠিবার সময় উপস্থিত শীতল বায়ুব সহিত উহার সংস্পর্শ হওয়াতে অভ্য-ন্তরস্থ জলকণা সমূহ ঘনীভূত হইয়া মেঘেব আকার ধারণ কবে।

মেঘ দ্বারা আগাদেব অধিষ্ঠান-ভূমি পৃথিবীৰ অনেক উপ-কার হয়। মেঘ হওয়াতেই রষ্টি দ্বারা ভূমি উর্ধ্ববা হইয়া থাকে। অধিকন্তু মেঘ আমাদের চন্দ্রাতপেব কার্য কবিয়া

থাকে । সূর্য্য ও পৃথিবীর মধ্যে মেঘ ভাসমান থাকতে উপনের প্রচণ্ড কিরণ পৃথিবীস্থ ভূগুণ্ণাদি নষ্ট করিতে সমর্থ হয় না । এতদ্ব্যতীত মেঘ পৃথিবীর তড়িৎ আকর্ষণ করিয়া অনেক মঙ্গল সাধন করে । মেঘে সর্বদাই তড়িৎ অবস্থান করে, এই তড়িৎ পৃথিবীর বিভিন্ন প্রকৃতির তড়িৎকে আকর্ষণ করিয়া উহাকে নিশ্চেষ্ট করিয়া ফেলে ।\*

মেঘের সাধাবণ বর্ণ ধূমের ন্যায় । কিন্তু সূর্যালোক উহাতে প্রতিফলিত হইলে নানাবিধ বর্ণ দৃষ্টিগোচর হইয়া থাকে । সূর্য্যরশ্মিতে সাত প্রকার বর্ণ আছে । মেঘসমূহ এই সকল বর্ণের আভাষ রঞ্জিত হইয়া বিভিন্ন বর্ণের দৃষ্ট হয় । মধ্যাহ্নকালীন মেঘ উজ্জ্বল নীলবর্ণ, সূর্য্যোদয় ও সূর্য্যাস্ত সময়ে উহা বক্ত, পীত, নীল, লোহিত প্রভৃতি বিভিন্ন বর্ণে সুরঞ্জিত হইয়া উঠে । সচবা-চর যে ইন্দ্রধনু দৃষ্ট হয়, তাহা আব কিছুই নহে, মেঘস্থিত বহু-সংখ্য জলবিন্দুতে সূর্য্যের কিরণ প্রতিফলিত হইলেই উহা বিবিধ বর্ণে সুরঞ্জিত ধনু ব উপস্থিত করে । †

আমাদের দেশের কবিগণ মেঘকে কামরূপী বলিয়া উল্লেখ করিয়াছেন । এই নির্দেশে অভ্যুক্তি বা কল্পনার বিকাশ নাই ।

\* তড়িৎ দুই প্রকার, যৌগিক ও বিযৌগিক । এক পদার্থে যৌগিক ও অন্য পদার্থে বিযৌগিক তড়িৎ বর্তমান থাকিলে ইহা বা পবম্পব সন্নিগিত হইতে চেষ্টা করে, যদি উভয় পদার্থেই একবিধ তড়িৎ অবস্থান করে, তাহা হইলে এই বিভিন্ন তড়িদ-বিগিষ্ট পদার্থ দ্বয় পবম্পর আকৃষ্ট না হইয়া বিগুক্ত হইয়া পড়বে । এইরূপ আকর্ষণ ও বিক্ৰেপন উভয়বিধ তড়িতের ভিন্ন ভিন্ন ধর্ম । এই ধর্ম্মানুসাবে মেঘের তড়িৎ ও পৃথিবীর তড়িৎ পবম্পব সন্নি-লিত হইয়া নিশ্চেষ্ট হইয়া যায় ।

† একখানি বহুকোণ-বিশিষ্ট কাচ অথবা ঝাডের কলমে সূর্য্যের গুর আলোক নিপতিত হইলে দৃষ্ট হয় যে, উহা হইতে নীল, পীত, হবিৎ প্রভৃতি বর্ণ-শিখা নিঃসৃত হইতেছে । মেঘের প্রত্যেক জলবিন্দু এইরূপ বহুকোণ-বিশিষ্ট কাচের কার্য করে, সুতরাং উহা ব মধ্য-দিয়া সূর্যালোক প্রসৃত হইলে নীল পীতাদি সাতটি কিরণ স্বদূরগগনে ইন্দ্রধনুরূপে পরিণত হব ।



মেঘের আকার নিকপণ করা সুসাধ্য নয়। বায়ুর ভিন্ন ভিন্ন গতিবশতঃ মেঘেরও ভিন্ন ভিন্ন আকার হইয়া থাকে। আকারের বিভিন্নতা প্রযুক্ত প্রাকৃত ভৌগোলিকগণ প্রথমতঃ মেঘের তিনটি বিভিন্ন আকৃতি নির্দিষ্ট কবিয়াছেন :—(১) অলক ; (২) স্তূপ, (৩) স্তব। ইহাদের পবম্পবের সংমিশ্রণে অপর চারি প্রকার শ্রেণী নির্দিষ্ট হইয়াছে :—(১) অলকস্তূপ, (২) অলকস্তব, (৩) স্তূপস্তব ও (৪) স্ফুটপ্রদ। সুতরাং প্রথম তিন প্রকার মৌলিক, শেষ চারি প্রকার যৌগিক। নিম্নে ইহাদের বিষয় বর্ণিত হইতেছে।

অলকমেঘ, যে সকল মেঘ নভোগুণ্ডে চূর্ণিত কুস্তলের স্তায় পবিদষ্ট হয়, তৎসমুদয়কে অলক মেঘ কহে। এই জলদ-জাল কখন বিলম্বিত কেশদানবৎ, কখন বা কুঞ্চিত চিকুকের স্তায় প্রতিভাসিত হইয়া অনন্ত আকাশেব শোভা বর্ধন কবে। এই মেঘ নর্দাপেক্ষা দলু, এতদ্বিবল্লন ইহা নভোগুণ্ডেব উচ্চতম স্থানে অবস্থান ও পবিভ্রমণ কবিয়া থাকে। সচরাচর অলক-মেঘ ভূপৃষ্ঠ হইতে তিন মাইল উর্দ্ধে অবস্থিতি কবে ; কখন কখন ৫০ মাইল উর্দ্ধেও ইহা দেখিতে পাওয়া যায়। এই সকল মেঘ বর্ষা-বাত্যানিহীন সময়ে সমুদিত হয়। কিন্তু যদি ইহা উর্দ্ধে উমিত হইয়া ক্রমে অবনত ও বনীভূত হইতে থাকে, তাহা হইলে ঝঞ্জা বায়ু সম্ভাবনা। সমস্ত দিন উত্তর দিক হইতে বায়ু প্রবাহিত হইবান পব অলকমেঘ উদ্ভিত হইলে লোকে স্ফুট ও বঞ্চা বায়ুর আশঙ্কা কবে। যদি ইহা প্রথমে দীর্ঘসূত্রবৎ প্রভীত হইয়া পবে আসত হয়, এবং ক্রমে বর্ষপ্রদ মেঘের আকার ধারণ কবে, তাহা হইলেও স্ফুট হইবাব সম্ভাবনা। কিন্তু অনেক সময়ে অলক মেঘেব কোন বৈলক্ষণ্য দৃষ্ট না হইলে লোকে সুদিনেবই প্রত্যাশা কবিয়া থাকে।

সুপমেঘ । এই মেঘ প্রথমতঃ স্বল্প মাত্রায় পবিদৃষ্ট হয়, পরে ক্রমশঃ বৃদ্ধি পাইয়া সুপাকাৰে সংহত হইতে থাকে । সূর্য্য-বশিতে প্রদীপ্ত হইয়া সুপমেঘ নানাবিধ আকাৰ ধারণ করে । কখন ইহা তুমার-সমাচ্ছন্ন অভ্রংলিহ শৈলমালাব স্তায়, কখন উত্তুঙ্গ শৈল-শিখরের স্তায়, কখন বিক্ষেপণী-সংযুক্ত তবণীব স্তায়, কখন বা হস্তী অথ প্রভৃতি প্রাণিগণের স্তায় দৃষ্ট হয় । সাধারণতঃ গ্রীষ্মকালেই এই মেঘের উদ্ভব হইয়া থাকে । নিশা অবসানে ইহা ক্ষুদ্র খণ্ডাকাৰে নেত্রগোচর হয়, পবে ক্রমে ক্রমে এই সকল ক্ষুদ্র খণ্ড উর্দ্ধগামী উষ্ণ বায়ুর প্রভাবে একত্রিত হইয়া উর্দ্ধদেশে উঠিতে থাকে ; মধ্যাহ্ন কালে অনেক উচ্চে উঠিয়া গোপুলি সময়ে নিম্নগামী শীতল বায়ুর সংস্পর্শে বাষ্পাকাৰে পবিণত হইয়া অন্তর্হিত হয় । কিন্তু যদি এই মেঘ হঠাৎ রূপান্ত-বিত হইতে থাকে, এবং ইহাৰ সুপ সকল ভাঙ্গিয়া, সূক্ষ্ম সূক্ষ্ম বেখাম পবিণত হইয়া, দৌগিক মেঘের আকাৰ ধারণ কবে, তাহা হইলে বৃষ্টিব সম্ভাবনা । অধিকন্তু এই মেঘ সূর্য্যাস্তের সময় উদ্ভিত হইয়া ক্রমশঃ পবিবর্দ্ধিত হইলে লোকে ঝড়ের আশঙ্কা করে ।

স্তবমেঘ ।—যে সকল মেঘ পর্ব্বতকন্দর ও নদী প্রভৃতি জলা-শয়েব উপর আস্তবণ ভাবে অবস্থিতি করে, তৎসমুদয়েব নাম স্তব । ইহা মধ্যাহ্নকালে নিম্ন আকাশেই সমুদ্ভিত হয় । স্তবমেঘ সুপমেঘের বিপবীত পশ্চাক্রান্ত । সুপমেঘ প্রাতঃকালে সংঘটিত হইয়া মধ্যাহ্নকালে সান্তিময় বর্দ্ধিতাবয়ব হয়, পরিশেষে ক্রমশঃ হ্রাসাব হইয়া অন্তর্হিত হইয়া যায় । স্তবমেঘ সন্ধ্যাব সময় আবির্ভূত হইয়া বাত্রিতে বাড়িতে থাকে, এবং রাত্রিশেষে উহা ক্রমে ক্ষীণ হইয়া বিলম্ব প্রাপ্ত হয় । যদি এই মেঘ প্রাতঃকালে

অস্তুর্হিত না হইয়া ক্রমশঃ পরিবর্দ্ধিত হইতে থাকে, তাহা হইলে শীঘ্র বৃষ্টি হইতে পারে ।

অলক-স্তুপ ।—যে মেঘ প্রথমে অলকরূপে প্রতিভাত হইয়া পরে স্তুপরূপে পরিবর্তিত হয়, তাহাকে অলক-স্তুপ নামে নির্দেশ করা যায় । এই মেঘ, যখন বায়ুবেগে ছিন্ন ভিন্ন হইয়া ক্ষুদ্র ক্ষুদ্র খণ্ডাকারে চারিদিকে পরিব্যাপ্ত হয়, তখন উহা নভো-মণ্ডলে তরঙ্গ-ভঙ্গীবৎ অপূর্ণ শোভা বিকাশ করিয়া থাকে । অলকস্তুপ-মেঘ সাতিশয় স্বচ্ছ । ইহার অভ্যন্তর দিয়া সূর্য ও চন্দ্রের দেহস্থিত চিহ্ন স্পষ্ট নয়নগোচর হয় । অলক-স্তুপ মেঘমালার উদয়ে আকাশ গভীর অনির্কলনীয গোভা ধারণ করে । নীরদনিকর-খণ্ড অলক ও স্তুপাকারে পবন-সঞ্চালিত হইয়া শূন্য দেশের নানাস্থানে নানা ভাবে বিচরণ করিতে থাকে । এই মেঘ উর্দ্ধ আকাশে থাকিলে গ্রীষ্মাধিক্য হয়, এবং নিম্ন আকাশে থাকিলে ঝড় ও বৃষ্টির আশঙ্কা জন্মে ।

অলক-স্তর ।—ইহা প্রথমে অলকরূপে উৎপন্ন হইয়া পরে স্তরের সহিত সংমিশ্রিত হয় । ইহার স্থূলতা অল্প, কিন্তু বিস্তৃতি অধিক । অলক মেঘ-খণ্ড-দ্বয় যদি নভোদেশে সমানান্তবাল-ভাবে থাকিয়া পবনস্রবকে পার্শ্বপার্শ্বভাবে আকর্ষণ কবে, তাহা হইলে অলক-স্তর মেঘের উৎপত্তি হয় । এই মেঘ ঝড় ও বৃষ্টির প্রাক্কালে উঠিয়া থাকে । ইহা যত নিবিড় হয়, ততই ঝড় বৃষ্টির সম্ভাবনা অধিক হইতে থাকে । কখন কখন অলক-স্তর ও অলক-স্তুপ এক সময়ে আকাশে আবির্ভূত হইয়া যুদ্ধোন্মত্ত সৈন্যব্যূহের ন্যায় পবনস্রব পবনস্রবকে আক্রমণ করিয়া থাকে । এই আক্রমণে ইহারা শীঘ্র শীঘ্র পূর্নরূপে পরিবর্তন ও অচিরস্থায়ী নূতন নূতন আকার ধারণ কবে । মেঘ-মালার উদয় সংগ্রাম দর্শন করিলে হৃদয়ে অভূতপূর্ব বিস্ময়-রসের সঞ্চার

হইতে থাকে। অলক-স্তব মেঘের আবির্ভাব সময়ে সূর্য ও চন্দ্রের চতুর্দিকে একটা পবিধি দৃষ্ট হয়। এই মণ্ডলাকার বেখা দ্বারা বাড় ও বৃষ্টির অনুমান করা যায়।

সূপ-স্তব।—সূপস্তর সূপ ও স্তর এই উভয়বিধ মেঘের সম্মিলনে সমুৎপন্ন হইয়া থাকে। সূদূর বিস্তৃত সমতল মেঘ-রাশির উপর এই মেঘ বৃহদাকার সূপের ন্যায় অবস্থান করে। প্রায়ই বটিকা বৃষ্টির পূর্বে এই মেঘের উদয় হয়। এই মেঘ অলক-স্তব মেঘের আবির্ভাব সময়েও দৃষ্ট হইয়া থাকে। অলক-স্তব সূপ-স্তরের পার্শ্বভাগে প্রকাণ্ড দেহের আপাদ-মগ্ধকে অস্পষ্ট বেখার বিলম্বিত থাকিয়া নমন-বজ্রন-শোভা ধারণ করে। জলধান আবোহনে পরিভ্রমণ সময়ে সুবিশাল বাবিধিতল অথবা সুবিস্তীর্ণ নদ নদী হইতে তীব্রস্থিত বিচিত্র বৃক্ষলতা-সমাকীর্ণ বন-ভূমি অথবা গগনস্পর্শী শৈলমালা খেকপ নেত্রপথে প্রতি-ভাসিত হয়, সূপস্তর জলদঘটাও ভঙ্গপ দৃষ্ট হইয়া থাকে। এই মেঘ যদি উর্দ্ধ আকাশে উখিত হইয়া লঘু ও কার্পাস-বাণিব-ন্যায় ইতস্ততঃ বিচ্ছিন্ন হয়, তাহা হইলে বাড়ের সম্ভাবনা, কিন্তু যদি নিম্নে অননত হইতে থাকে, তাহা হইলে বৃষ্টি হইয়া থাকে।

বৃষ্টিপ্রদ মেঘ।—উল্লিখিত ছয় প্রকার মেঘের সম্মিলনে এক প্রকার ঘোর ধূস্রবর্ণ মেঘের উদ্ভব হয়। সূপ-স্তব মেঘ হইতেই প্রায় ইহা উদ্ভূত হইয়া থাকে। কখন অলক মেঘ হইতেও ইহার উৎপত্তি হয়। এই মেঘ প্রথমতঃ নীল বা কৃষ্ণবর্ণ হয়, পরে গীসক-বর্ণ হইয়া উঠে। এই সময়েই বৃষ্টির সূত্রপাত হয়। কখন কখন কৃষ্ণবর্ণ রূপান্তরিত হইবার পূর্বেই বৃষ্টি হইতে থাকে। অলক-মেঘ বায়ু-প্রবাহে সূপ-স্তব মেঘের সহিত সম্মিলিত হইলে বৃষ্টি ও শীলাপাত হয়। যদি ইহা বাড়ের সময় উদ্ভিত হইয়া ঘোরতর কৃষ্ণবর্ণ হয়, তাহা হইলে

বজ্রপাতের সম্ভাবনা । এই মেঘ ভূপৃষ্ঠ হইতে সচবাচব এক সহস্র অবধি পাঁচ সহস্র ফুট পর্য্যন্ত উর্দ্ধে অবস্থিত কবে ।

বৃষ্টিপ্রদ মেঘ ভূতল হইতে অনধিক অর্ধ ক্রোশ উর্দ্ধে সংঘটিত হয়, অলক মেঘ দেড় ক্রোশ হইতে দুই ক্রোশ পর্য্যন্ত উর্দ্ধে পরিভ্রমণ করে । স্থূলতঃ অর্ধ ক্রোশের নিম্নে ও তিন ক্রোশের উর্দ্ধে প্রায়ই মেঘ দৃষ্ট হয় না । সিমলা পাহাড় প্রভৃতি উচ্চ স্থানে অধিবোহন করিলে সময়ে সময়ে নিম্ন ভাগে বৃষ্টি ও ঝটিকার সঞ্চার দৃষ্ট হইয়া থাকে ।

---

## অশোক ।

প্রাচীন ভারতের মে সকল ভূপতি আপনাদের কীর্তি-প্রভাবে পবিত্র ইতিহাসের বরণীম হইয়া বহিয়াছেন, তাঁহাদের মধ্যে মহাবাজ অশোক সবিশেষ প্রসিদ্ধ । ইঁহাব সময়ে বৌদ্ধ ধর্মের বহুল প্রচার হয়, স্থানে স্থানে দীর্ঘিকা, সুপ্রশস্ত পথ, চৈত্য প্রভৃতি নির্মিত হইতে থাকে, এবং ভারতবর্ষের অধিকাংশ স্থলে বৌদ্ধধর্মের আধিপত্য ও সম্মান পবিত্রিত হইয়া উঠে । মহারাজ অশোক সুপ্রসিদ্ধ মগধরাজ চন্দ্রগুপ্তের পৌত্র এবং বিন্দুসাবের পুত্র । ইনি ভারতবর্ষের অনেক স্থলে স্বীয় আধিপত্য প্রসারিত করেন ।

বিন্দুসাবের পৈতৃক সিংহাসন পাটলীপুত্র নগরে ছিল । ইঁহাব জ্যেষ্ঠ পুত্রের নাম সুসীম । একদা চম্পাপুরী হইতে একজন ব্রাহ্মণ আসিয়া মহাবাজ বিন্দুসাবকে সুভদ্রাঙ্গী নামে একটি সর্বাঙ্গসুন্দরী ও সর্বসুলক্ষণবতী কন্যা উপহার দেন । কোন সময়ে একজন দৈবজ্ঞ এই কন্যাকে দেখিয়া ব্রাহ্মণকে কহিয়াছিল, কন্যার যেরূপ সুলক্ষণ দেখা যাইতেছে, তাহাতে ইনি নিশ্চয়ই রাজমহিষী হইবেন । ব্রাহ্মণ দৈবজ্ঞের বাক্যে অটল বিশ্বাস স্থাপন পূর্বক পাটলীপুত্র রাজ্যের নিকট সমুপস্থিত হইয়া কন্যাবত্তাকে উপহার স্বরূপ অর্পণ করেন ।

মহাবাজ বিন্দুসাব কন্যাবত্তা পাইয়া তাহাকে আপনাব অন্তঃপুরবাসিনী করিলেন । সুভদ্রাঙ্গীর রূপ-লাবণ্য সন্দর্শনে রাজমহিষীদিগের হৃদয়ে ঈর্ষাব সঞ্চার হইল । তাঁহারা পিতৃ-পরিত্যক্ত ব্রাহ্মণ-কন্যাকে সামান্য পরিচারিকার কার্যে নিয়োজিত করিলেন । এই সময়ে সুভদ্রাঙ্গীর প্রতি ক্ষৌর-কার্য সম্পাদনের ভার সমর্পিত হইল । সুভদ্রাঙ্গী এই কার্যে ক্রমে

সুদক্ষা হইয়া উঠিলেন । একদা রাজমহিষীদিগের আদেশে সুভদ্রাঙ্গী মহাবাজের ক্ষৌর-কর্ম সম্পাদনার্থ গমন করিলেন । বিন্দুসার সুভদ্রাঙ্গীর ক্ষৌরকর্মে পবিত্র হইয়া পুবঙ্কান দিবার অভিপ্রায় প্রকাশ কবাত্তে সুভদ্রাঙ্গী সলজ্জভাবে বিবাহের প্রস্তাব করিলেন । কিন্তু পাটলীপুত্র-বাজ কন্যাকে নীচ-জাতীয়া ভাবিয়া এই প্রস্তাবে সম্মত হইলেন না । তখন সুভদ্রাঙ্গী করিলেন, “মহাবাজ । আমি জাত্যাংশে নিকৃষ্টা নহি, বাজ-মহিষীদিগের আদেশেই ঈদৃশ নীচজনোচিত কার্য স্বীকার করিয়াছি । আমি ব্রাহ্মণের দুহিতা । রাজবাণী হইব বলিয়াই পিতা আমাকে আপনাব হস্তে সমর্পণ করিয়াছেন । সুভদ্রাঙ্গীর এই বাক্যে সন্তুষ্ট ঘটনা বিন্দুসারের স্মৃতিপথ-বর্তী হইল । তখন বিন্দুসার আব কোন অসম্মতি প্রদর্শন করিলেন না, আদব-সহকাৰে সুভদ্রাঙ্গীর পাণিগ্রহণ করিলেন, এবং তাঁহাকে সর্কপ্রধান বাজমহিষী করিয়া অন্তঃপুবে রাখিলেন ।

মহাবাজ অশোক এই সুভদ্রাঙ্গীর সন্তান । তনয়ের মুখচন্দ্র নিবীক্ষণে জননীৰ সকল শোক দূৰ হইয়াছিল, এই জন্য ভুগিষ্ঠ পুত্রের নাম অশোক হয । অশোকের অঙ্গ সৌষ্ঠব মনোহাৰি ছিল না, এতন্নিবন্ধন বিন্দুসার তাঁহাব প্রতি তাদৃশ স্নেহ প্রদর্শন করিতেন না । অধিকন্তু অশোকের স্বভাব সাতিনয় অপ্রীতি-কর ছিল, তিনি প্রায়ই দুঃশীলতার পবিচয় দিয়া অপবের বিবক্তি উৎপাদন করিতেন । এইকপ বাসচাবী হওয়াতে তাঁহাব অপর নাম চণ্ড হইয়াছিল । মহাবাজ বিন্দুসার বিদ্যা শিক্ষার জন্য পুত্রকে পিঙ্গলবৎস নামে একজন জ্যোতির্কর্তাব হস্তে সমর্পণ কবেন । পিঙ্গলবৎস অশোকের নানাকপ সৌভাগ্য-চিহ্ন পবীক্ষা করিয়া কহিয়াছিলেন, এই বালক পিতৃ-সিংহাসনের উত্তরাধিকারী হইবে । অশোক ব্যতীত সুভদ্রাঙ্গীর আর

একটি পুত্র-সন্তান ভূমিষ্ঠ হয়। ইহাব নাম বীতামশোক অথবা বিগতামশোক।

ক্রমে অশোক বয়ঃপ্রাপ্ত হইলেন, কিন্তু তাঁহার স্বভাবের কোনও পবিবর্ত্ত লক্ষিত হইল না। অশোক পূর্বের ন্যায় উগ্রতা ও দুঃশীলতার পরিচয় দিতে লাগিলেন। এজন্য বিন্দুসাব বিরক্ত হইয়া পুত্রকে স্থানান্তরিত কবিত্তে রুতসঙ্গ হইলেন। এই সময়ে পাটলীপুত্র হইতে বহুদূরবর্ত্তী তক্ষশিলায় ভয়ঙ্কর বিদ্রোহ উপস্থিত হইয়াছিল, অশোক পিতৃ-মিদেশে এই বিদ্রোহ শান্তিব জন্য যাত্রা কবিলেন। অশোকেব কৌশলে বিদ্রোহাগ্নি নির্মূপিত হইল। অশোক তত্রত্য অধিবাসিগণ-কর্তৃক সাদবে পবিগৃহীত হইয়া কালাতিপাত কবিত্তে লাগিলেন। এই সময় বিন্দুসাবেব সর্নজ্যেষ্ঠ পুত্র সুনীম পাটলীপুত্র নগবে সাতিশম উপদ্রব আবন্ত কবাত্তে প্রধান অগাত্য নিবতিশম বিবক্ত হইয়া উঠেন। মহাবাজ বিন্দুসাব অমাত্যেব পদামর্শে সুনীমকে তক্ষশিলায় প্রেবণ কবিয়া অশোককে পুনবায় বাজধানীতে অনিয়ন কবেন।

মহাবাজ বিন্দুসাব ক্রমে ঐহিক জীবনেব চবম সীমায় উপনীত হইলেন, তাঁহার মৃত্যুকাল আগন্ন হইল, যদিও তিনি অশোককে বাজ্যাধিকারী কবিত্তে সাতিশম অনম্মত ছিলেন, তথাপি অমাত্যেব অনুবোধে তাঁহাকে তদ্বিমবে সন্মতি দিতে হইল। স্মতবাং অবিলম্বে অশোক যথাবিধানে বাজ্যে অভিষিক্ত ও নিংহাসনে সনাক্ত হইলেন। এদিকে সুনীম পৈতৃক বাজ্যলাভে স্তাণ হওয়াতে কনিষ্ঠ ভ্রাতাব বিকঙ্গে অভ্যুথিত হইবা। পাটলীপুত্র আক্রমণ কবিলেন। অশোক তাঁহার সূদক্ষ মন্ত্রী বাপাণ্ডেশেব সাহাস্যে সুনীমকে পবাজিত কবিয়া ভাবী অনিষ্টেব নিবাবণ জন্য অমাত্যদিগকে অন্যান্য বাজবংশীদিগের প্রাণ



সংহার করিতে আদেশ করিলেন । কিন্তু অমাত্যগণ এই আদেশ প্রতিপালনে সন্মত হইলেন না । তখন অশোক স্বয়ংই সকলেব শিবচ্ছেদ কবিয়া নিষ্ফল হইলেন ।

একদা অশোক শুনিতে পাইলেন, অস্তঃপূবচাবিনী কামিনীগণ একটা অশোক বৃক্ষের শাখা ভগ্ন কবিয়াছে । এই সংবাদে অশোকেব হৃদয়ে আঘাত লাগিল ; তিনি যানপব নাই জুক্র হইয়া চণ্ডগিবিক নামে একজন ক্রুবপ্রকৃতি ছুবাগ্নাকে গেই সমস্ত বমনীদিগকে অগ্নিতে দক্ষ কবিত্তে আদেশ কবিলেন । চণ্ডগিবিক প্রভুব আজ্ঞায় একটা কুণ্ড প্রস্তুত কবিয়া ছত্ৰাশন প্রজ্জ্বলিত কবিল, এবং একে একে অপবাধিনী কামিনীদিগকে তাহাতে নিক্ষেপ কবিত্তে লাগিল । এইকপে কিয়ৎকাল মধ্যেই অসহায় অবলাদিগেব কমনীয় দেহ ভস্মরাগিতে পবিণত হইয়া গেল ।

জীবনের প্রথমাবস্থায় অশোক বৌদ্ধধর্মেব বিদ্বেষ্টা ছিলেন । তিনি উল্লিখিত চণ্ডগিবিককেই বৌদ্ধ ভিক্ষুকদিগেব বিনাশ সাধনে নিযোজিত কবেন । এই সময়ে একটা বিস্ময়াবহ ঘটনা ব সূত্রপাত হয় । সার্থবাহ নামে একজন ধনবান্ বণিক্ অপবাপব এক শত বণিকের সহিত বাণিজ্যার্থ সমুদ্র-পথে যাত্রা কবেন । দ্বাদশ বৎসব পবে তিনি গৃহে প্রত্যাগমন কবিত্তে-ছিলেন, সহসা দস্যুগণের হস্তে নিপতিত হইয়া, অনুচববর্গেব সহিত নিহত হন । তদীয় সমস্ত সম্পত্তি এই দস্যুদিগেব হস্তগত হয় । কেবল সমুদ্র নামে তাঁহাব একটা মাত্র পুত্র ঘটনা-ক্রমে পলায়ন কবিয়া প্রাণ বক্ষা কবেন । সমুদ্র হতনর্কস্ব হইয়া পবিভ্রাজক বৌদ্ধ সন্ন্যাসী হইয়া নানা স্থান পয্যটনে প্রবৃত্ত হন । একদা তিনি যদৃচ্ছাক্রমে ভ্রমণ কবিত্তে কবিত্তে চণ্ডগিবিকের গৃহে সমাগত হইয়া ভিক্ষা প্রার্থনা করিলেন । ছুরাচাব

চণ্ডগিরিক বৌদ্ধ পরিব্রাজককে নিহত কবিত্তে উদ্ধৃত হইল । কিন্তু সমুদ্রের লোকাভীত কোশলে তাহার উদ্যম কিছুতেই সফল হইল না । চণ্ডগিবিক এতন্নিবন্ধন বিস্মিত হইয়া মহাবাজ্ঞ অশোককে সমস্ত ঘটনা বিজ্ঞাপিত কবিল, অশোক বৌদ্ধ সন্ন্যাসীকে দেখিবাব জন্য ঘটনা-স্থলে সমুপস্থিত হইলেন, এবং তাঁহার নিকট সমস্ত বিবরণ শুনিয়া চণ্ডগিবিকেব শিব-শ্বেদন কবিলেন ।

এই অবধি বৌদ্ধ ধর্মের প্রতি অশোকের আস্থা জন্মিল । অশোক বৌদ্ধভিক্ষুর অলৌকিক কার্য্য দর্শনে বিস্মিত হইয়া বৌদ্ধ ধর্ম পবিগ্রহ কবিলেন । তিনি যশ নামে একজন যতির পবামর্শে কুকুটোদ্যান নামক স্থানে একটী চৈত্য নির্মাণ কবা-ইয়া তথায় বুদ্ধের অঙ্গ-বিশেষ স্থাপন কবিলেন । বামগ্রাম নামক স্থানে আব একটী চৈত্য নির্মিত হইল । ইহার পর অশোক তক্ষশিলাব অধিবাসিদিগেব প্রার্থনায় তথায় ধর্ম্মানু-গত কার্য্য সম্পাদন জন্য তিন শত একার কোটী স্তূপ প্রতিষ্ঠা-পিত কবিলেন । এতদ্ব্যতীত সমুদ্রতটেও এক কোটী স্তূপ প্রতিষ্ঠাপিত হইল । এই সকল ধর্ম্মানুমোদিত কার্য্যে অশো-কেব পূর্ব্বতন “চণ্ড” নাম বিলুপ্ত হইল । সাধাবণে এক্ষণে তাঁহাকে ধর্ম্মাশোক বলিয়া নির্দেশ কবিত্তে লাগিল ।

অশোক উপগুপ্ত নামে একজন বৌদ্ধ যতির নিকট ধর্ম্মতত্ত্ব শিক্ষা কবেন । এইরূপে তিনি ধর্ম্মানুমোদিত কার্য্যের অনু-ষ্ঠানে ও ধর্ম্ম প্রচাবে নিবিষ্ট-চিত্ত হইয়া উঠিলেন । পবিত্র ধর্ম্মভাব তাঁহাকে দুঃশীলতার পবিবর্ত্তে সুশীলতায়, অনুদাবতান পবিবর্ত্তে উদাবতায় এবং ক্রুবতার পবিবর্ত্তে সদাণয়তায় সম-লঙ্কত কবিল । তিনি এক্ষণে স্বীয় অদৃষ্টের নিকট মস্তক অবনত কবিলেন, এবং উদার পদ্ধতি অনুসারে সর্ব্বত্র সমদর্শিতা ও

ন্যাযপরতা প্রদর্শন কবিত্তে লাগিলেন । অশোক ধর্মতত্ত্বে অভিজ্ঞতা লাভ কবিয়া, ধর্মোপদেষ্টার অনুরোধক্রমে প্রধান প্রধান বৌদ্ধ তীর্থ পর্য্যবেক্ষণ মানসে দেশ ভ্রমণে বহির্গত হন । লুম্বিনী উদ্যানের যে ভূকহমূলে বুদ্ধ জন্ম পবিগ্রহ কবিয়াছিলেন, যে স্থান বুদ্ধের যৌবন কালের ক্রীড়া-ভূমি ছিল, এবং যে জম্বু-স্বক্ষ মূলে বুদ্ধ কঠোর তপস্যায় অভিনিবিষ্ট ছিলেন, অশোক তৎসমুদায় পবিদর্শন পূর্কক পবিত্রচিত্ত হন । শেষোক্ত স্থানে অশোকেব যত্নে একটী মঠ প্রতিষ্ঠিত হয় ।

এইকপে অশোক প্রধান প্রধান পুণ্যক্ষেত্র সকল পবিদর্শন পূর্কক বাজধানীতে প্রত্যাবৃত্ত হইয়া প্রচাব কবিলেন যে, বৌদ্ধ-ধর্ম তাঁহার রাজ্যের ধর্ম বলিয়া পবিগণিত হইবে এবং এই ধর্ম সম্প্রসারিত ও গৌববাসিত কবিবাব জন্য তাঁহার সমস্ত অর্থই উৎসর্গ কবা যাইবে । প্রথিত আছে, অশোক পুরুষানু-ক্রমিক ধর্ম পবিত্যাগ কবিয়া বৌদ্ধধর্ম অবলম্বন করাতে প্রধানা মহিষী পবিষ্যবক্ষিতা সাতিশয বিধক্ত হইয়া মাতঙ্গী নামে একটী চণ্ডালীকে বুদ্ধ গয়াব বোধী স্বক্ষ বিনষ্ট কবিত্তে অনুবোধ কবেন । চণ্ডালপত্নী কঠোর ঔষধ প্রযোগে পবিত্র স্বক্ষকে জীবনী শক্তি-শূন্য ও বিশুদ্ধ-প্রায় কবিয়া তুলে । অশোক এই সংবাদে হৃদয়ে যাবপব নাই আঘাত পাইলেন । মহিষী বহু চেষ্টা কবিয়াও তাঁহাকে প্রফুল্ল কবিত্তে পারিলেন না । পবিণেষে পবিষ্য-বক্ষিতাব অনুজ্জায় চণ্ডাল-জায়া স্বক্ষটী পুনর্জীবিত করিল, অশোকও পূর্কবৎ হৃষ্ট ও প্রফুল্লচিত্ত হইলেন ।

মহাবাজ অশোক সুপিণ্ডোলভরদ্বাজ নামে একজন যতিকে তাঁহার সাম্রাজ্যের সমুদয় স্থলে ধর্ম প্রচাব কবিত্তে নিয়োজিত করেন । এতদ্ব্যতীত অন্যান্য ধর্ম প্রচাবকগণও নানাস্থানে প্রেরিত হন । ইঁহারা সকল স্থলেই সাধারণকে পিতা মাতাব

প্রতি ভক্তি, ব্রাহ্মণ এবং শ্রমণদিগেব প্রতি দয়া ও শ্রদ্ধা, সত্য কথা, দান, জীব-সমূহেব প্রতি অহিংসা প্রভৃতি বিষয়ে আসক্ত কবিত্তে সৰ্বদা উপদেশ দিতেন । অশোক প্রতি পঞ্চম বর্ষে ধর্ম পবায়ণ ব্যক্তিদিগকে সাদরে আস্থান কবিয়া, ধর্ম বিষয়ক বিচার শ্রবণ কবিতেন । এই সময়ে বৌদ্ধ ধর্ম নানা সম্প্রদায়ে বিভক্ত হইয়া উঠিয়াছিল । মহামতি অশোক এই সম্প্রদায় সমূহেব একীকরণ মানসে স্বীয় বাজাজ্বেব অষ্টাদশ বর্ষে বাজ্য-স্থিত সগস্ত জ্ঞানী ও ধর্ম পবায়ণ ব্যক্তিদিগকে একটা মহতী সভায় আস্থান কবেন । এই সভায় বৌদ্ধ ধর্মগ্রন্থ সমূহেব শৃঙ্খলা-বিধান ও অর্থ নিরূপণেব পব ধর্ম প্রচাবার্থ স্থানে স্থানে প্রবীণ বৌদ্ধদিগকে প্রেরণের প্রস্তাব হয় । এই প্রস্তাবানুসারে মহাধর্মবন্ধিত নামে একজন প্রধান ধর্মোপদেষ্টা মহাবাষ্ট্রে গমন কবিয়া এক লক্ষ সপ্ততি সহস্র ব্যক্তিকে স্বধর্মে দীক্ষিত কবেন । ইহাদেব ধর্ম-শিক্ষার্থ দশ সহস্র পুর্বোহিত নিযোজিত হন ।

অন্যান্য ধর্ম প্রচাবকগণ হৈমবত প্রদেশে যাইয়া কাশ্মীর ও গান্ধার (বর্তমান কান্দাহার) প্রভৃতি দেশে ধর্ম প্রচার করেন । মহেন্দ্র নামে অশোকেব বিংশতি বর্ষ-বয়স্ক একটা পুত্র সিংহলে প্রেবিত হইয়া তত্রত্য প্রিয়দর্শী নামক রাজাকে সপবি-বাবে বৌদ্ধ ধর্মে দীক্ষিত কবেন । এইরূপে অশোকেব উৎসাহ ও যত্ন-বলে বৌদ্ধ ধর্মেব বহুল প্রচাব হয়, এবং এইরূপে বৌদ্ধ ধর্মপ্রচাবকগণ হিমালয় হইতে সিংহল পর্য্যন্ত বৌদ্ধ ধর্মেব জয়-পতাকা উড্ডীন কবেন ।

মহাবাজ অশোক প্রজাবঞ্জন কবিয়া “বাজ” শব্দ অস্বর্থ কবিয়া গিয়াছেন । তিনি স্বীয় অনুশাসন-পত্রে আপনাব বংশ-ধবদিগকে প্রজাদিগেব হিতৈষী হইতে বাবস্থার অনুবোধ করিয়াছেন । অশোক জীবনেব প্রথমাবস্থায় পাপাচরণ কবিয়া-

ছিলেন বটে, কিন্তু শেষাবস্থায় তাঁহার চরিত্র পবিত্র ও ধর্মানু-  
রক্ত হইয়াছিল। তিনি স্বীয় বাজ্যেব প্রতি অর্দ্ধ ক্রোশ অন্তবে  
কুপ খনন এবং স্থানে স্থানে পশু পক্ষী প্রভৃতি জীবের বক্ষার্থ  
ধর্মশালা স্থাপন কবেন। তাঁহার হৃদয় অনুক্ষণ করুণার  
মোহিনী মাধুবীতে শোভিত থাকিত। তিনি কলিঙ্গ দেশ  
জয় করিয়া পবাক্রিত শত্রুদিগকে কখনও বিনষ্ট অথবা দাস  
কবেন নাই। তাঁহার বাজ্যে ঘোবতর অপবাবীর প্রামই প্রাণ-  
দণ্ড হইত না। তিনি দোষী ব্যক্তিকে শুদ্ধাচাবী ও ধর্মানুষ্ঠানে  
সংযত কবিবাব জন্য ধর্মোপদেশকের নিকট প্রেবণ করিতেন।

অশোক কাহাকেও বল পূর্কক নিজ ধর্মে আনয়ন কবিতেন  
না। তিনি কর্মচাবিদিগকে ভূযোভূমঃ আদেশ কবিয়াছেন যে,  
ভ্রষ্টাচাবিদিগকে উপদেশ দিয। ক্রমে ক্রমে ধর্ম পথে প্রবর্তিত  
করিতে হইবে। তাঁহার বাজ্যে ব্রাহ্মণগণ পবম সূখে আপনাদেব  
ধর্মানুমোদিত কার্যেব অনুষ্ঠান কবিতেন। অশোক ব্রাহ্মণ-  
দিগেব কখনও নিষ্ঠুবাচবণ কবেন নাই, প্রত্যুত তিনি স্বীয়  
ধর্ম-লিপিতে উল্লেখ কবিয়াছেন যে, অগ্রে ব্রাহ্মণ পশ্চাৎ শ্রমণ-  
দিগকে দান করিতে হইবে।

শাসন-কার্যে অশোকেব পক্ষপাত ছিল না। অশোক  
সমদর্শিতা-গুণে সকলকেই সমান ভাবে নিবীক্ষণ করিতেন।  
তিনি উপযুক্ত ব্রাহ্মণদিগকে উচ্চপদে আবোহিত কবিতে কাতব  
হন নাই, এতদ্ব্যতীত অশোক সৎপাত্রে অনেক অর্থ দান করি-  
তেন। এক এক সময়ে তিনি দানশীলতাব পবাকার্তা প্রদর্শন  
কবিয়াছেন। তাঁহার পুল ও মহিষীগণ সর্কদা দান কবিবাব  
নিমিত্ত তাঁহার নিকট অর্থ পাইতেন। পূর্কে উক্ত হইমাছে,  
অশোকেব আদেশে অনেক স্থানে সুদৃশ্য স্তম্ভ প্রভৃতি নির্মিত  
হয়। এই সকল স্তম্ভ ব্যতীত অশোক শিবি নগরেব নিকটে

একটা উত্তম সেতু ও কাশ্মীরে দুটা সুদৃশ্য অট্টালিকা নির্মাণ কবেন । অশোক তাঁহার পিতামহ চন্দ্রগুপ্ত অপেক্ষা রাজ্য বৃদ্ধি কবিয়াছিলেন । উত্তবে কাশ্মীর, পশ্চিমে গুর্জব, দক্ষিণে কর্ণাট পূর্বে কলিঙ্গ এবং বোধ হয় সমুদয় বঙ্গদেশ পর্যন্ত তাঁহার অধিকার প্রসারিত হইয়াছিল । ইহাতে প্রতিপন্ন হইতেছে, ভারত-বর্ষের প্রায় সমুদয় প্রধান প্রধান প্রদেশেই অশোকেব বিজয়-বৈজয়ন্তী উড্ডীন হইয়া তাঁহার মহত্ব, কীর্তি ও প্রতাপকে শত গুণে পনিবর্দ্ধিত করিয়া তুলিয়াছিল ।

মহারাজ অশোক এইরূপ পবম স্মৃথে সপ্তাধিক ত্রিংশৎ বর্ষ-কাল রাজ্য ভোগ করিয়া লোকান্তবিত হন । অদ্যাপি তাঁহার ধর্ম-লিপি ও অনুশাসন-পত্র সমূহে তদীয় মহত্ব-চিহ্ন দেদীপ্যমান রহিয়াছে । মহারাজ ধর্মাশোকেব পবিত্র নাম কখনও পবিত্র ইতিহাসেব হৃদয় হইতে স্মলিত হইবে না । তাঁহার মহাপ্রাণতা, তাঁহার কর্তব্য-বুদ্ধি, তাঁহার উদ্যবতা এবং তাঁহার ধর্মভাব অনন্ত কাল তাঁহাকে পবিদৃশ্যমান জগতেব ববণীয় কবিয়া রাখিবে ।

কথিত আছে, অশোক বিক্রমাদিত্য নব্বতের ২০৫ বৎসব পূর্বে পাটলীপুত্রেব সিংহাসনে অধিবোধ এবং বুদ্ধেব নির্মাণ প্রাপ্তিব ২০২ বৎসব পবে বৌদ্ধ ধর্ম অবলম্বন কবেন । যাহা হউক, তাঁহার পরলোক প্রাপ্তিব পর তদীয় তনয়গণ সুবিস্তৃত সাম্রাজ্য আপনাদের মধ্যে বিভাগ কবিয়া লন । জ্যেষ্ঠ পুত্র কুনাল পঞ্জাবেব সিংহাসনে সমাসীন হন, দ্বিতীয় বাজকুমার জনোক কাশ্মীর গ্রহণ কবিয়া বৌদ্ধধর্মেব পরিবর্তে শিবপূজা-পদ্ধতি প্রচার কবিতে যত্নপব হইয়া উঠেন, এবং তৃতীয় বাজকুমার পাটলীপুত্রেব শাসন-দণ্ড গ্রহণ করেন ।













